

U. S. M.
JAN 1965

70-455

200865

Kütüphane

Es. No. : 566

Remiz : A.C. 265

حکومت عوام

وَطَنُ وَاَنْسَانِيَّتْ

مترجمی :
محمد علی

محرری :
ژ. ژيرو

طابع و ناشری



در سعادت

کتابخانهء عسکری — ابراهيم حلمی —

۴۶ ، باب عالی جاده سی ، ۴۶

۱۳۲۷

کتابخانه اسلام و عسکری

تجار زاده ابراهیم حلمی

آرتین آصادوریان و مخدوملری مطبعه سنده طبع اولمشدر .

افادہ ناشر

ملت کتابخانه سنک اجزاسنی اک زیادہ آثار اجتماعیہ و اخلاقیہ ایلہ تکثیرہ قرار ویردم . آکلابورم کہ مملکتدہ حیات اجتماعیہ یوق . یوزندہ طقسان بشمز حریت نہدر ؟ . مشروطیت نہدر بیلیمورز . حالا اسکی عادات ، تعاملات حکم سوریور . هیچ برشی دیکشیمور ، دیکشمک استعدادینی بیلہ کوسترمییور . انسان روش حالہ باقارسہ مملکت یالکز سیاست دیکشمش ، ادارہ ینہ او اسکی اصول ، ینہ او اسکی عادات ایلہ یاشامقدہ بولنشدردیہ جکی کلپور . یالکز او ادارہ منفورہ استبداد یوق . فقط انتظامسزاق ، کوشکاک ، اویوشناق تمامیلہ حاکم . اگر مملکتسز بویوک برانقلاب اجتماعیہ اوغرامازسہ ینہ بز اسکی ترکلرز ، اسکی ادارہ نک اسکی انسانلری بز .

اهاليز فكر تشيدن ، عزم وقراردن نه قدر محروم ايسه ايش
باشنده بولنان اك نافذ آمرلر مذك برچوغيده خلقمزه جسارت بخش اوله جق
اك كوچوك تشبثاتي توليددن او قدر عاجز كورينيورلر. بعض متشبث
وجسور كنجلر مزي بولونوبده ايشه كيريشك استهلال اولاه حكومتك ايضاع
ايدمكي بيكرجه مشكلات اوكنده بي تاب دوشيور. بر آزارتكار
اولسار دائرلر امواج اوراق ايجنده بوغيهرق اوزون اوزادييه
مذاكرلر نتايجي بلكه مكه محكوم بولونيورلر.

ایش باشند بولانلرک وطنپورلکلرندن ، حسن نیتلرندن شبه ایتمورز . فقط عصرلرک سورکلپوب کتیردیکی اوپله فنا اصولار ایچنده بولنورلرکه قابل دکل غریبه کی شجاعت مدینه یی ، سربستیء حرکاتی ایدینه میورلر . حالا ملت باشقه ، حکومت باشقه تاتی اولونور . الکادی بر فردک بیله حیات ملیء اجتماعیهده بویوک بر حصه سی اولدینی تصدیق اولونمور . حالا حکومت بر آمر مطلق طانیونور . اشخاص بر چوق مؤثرات وعواملک اسیری بولونور ، افراد ابله حکومت آراسنده کی

رابطه نك پك كوشك وسونوك اولديني كوريليور . هر كس حكومتك
 همايه سنى طلب ايدييور . حكومت ايسه كنديني اك بويوك حاي طانيه رق
 افراى او يولده يتشديرمك ايستيور . اها ليز آراسنده حكومتك امرى ،
 اذيني اولمان هيچ برشى ياييله مازمش فكرى كافى السابق حكم سورييور .
 كورينيور كه افرادك سويه سى هنوز پك دون بدرجه ده در . عوام
 شخصيتى ، موجوديتى كوسترمكن عاجز در . چونكه كنديسنده اعطاء ،
 عزم ، جسارت يوق . معنای حریتی ، فیض مشروطیتی آكلایه مامش
 كورينيور . اكر عوام فكرأ تعالى ايدرسه هيچ شبهه يوق بتون قواى
 حكومت يد ملتة پكر . هر فرد حكومتك اك بيوك عضوى كسيلر ،
 حكومت انظار ملتة قورى بر كوكله ، برتمثال عد اولونور .

هيچ شبهه يوق كه آريستو قراسى حكمتى غائب ايدر هر فعال شخص
 باشلى باشنه بر آمر مستقل اولور . بو استقلال حيات ، محيطنده بولسان
 همشهريلرينى اسارت آلتنه آلقله دكل ، آنلى ده كندى استقلالنك
 اجزاستدن حد اتمك صورتيله پايدار اولور .

بودرجه يه يتشتمك ايچون نه يايملى يز؟ معارف ، معارف غريبه يي نشر ايملى يز .
 ده موقراسى يه عائد بر چوق آثار وجوده كتورملى يز . حریتی ،
 عدالتى ، مساواتى حاصلی معنای مشروطیتی خلقه طانتديرمق ايچون حارل
 حارل چاليشملى يز ، بو يولده بر چوق اثرلر طبع ايملى يز . باشقه درلو
 يز عثمانليسرا قابل دكل مشروطيت آدمى اوله مايز . چونكه هر برمرك
 افعال و آنارى ميدانده در . بتون افعال و حرکات ظاهره من كوسترييور كه
 بزده مشروطيت تماميله تأسس اتمه مشدر . مشروطيت ناقابل اندراس
 بدرجه كماله كتيرمك ايچون بتون خلقى مشروطيت پرور قيلملى يز . بوده
 آنجق معارفله ممكن اوله ييله جكدور .

تجارزاده ابراهيم حلى

باشلامه دن

بواثرده بوتون معلومات اخلاقیه مزه حاکم و بزجه قیمتمدار
اولان افکاری جمع ایتدک؛ وانتشارینی تأمین ایچون طبعی موافق
بولدق .

سویلدی کمز شیلرک یکیلکنی اصلا ادعا ایتمیز. فقط تماس
ایتدی کمز مسائل عیدیه ومغلقه نك شبهه سیز دها برچوق زمانلر
حلی میسر اوله میه جنی ایچون بونلره دائر دوشون دکلریمیزی
سویله میکی بروطفه اجتماعیه عدا ایدرز . اکر یازدقلریمز بعض
کیسه لرك بومهم مسئله لر اوزرینه بر آزدها دقتله دوشونمه لرینه
وهله بونلرک فکر آ دها طوغریسی فعلاً حلی ایچون چالیشمه لرینه
دلالت ایدمه بیلیرسه امک وزمانمز ضایع اولماش دیمکدر .

حکومت عوام

وطن و انسانیت

برنجی فصل

اشکال حکومتک عوامه طوغری تکاملی

طبیعتک کندینه تخصیص ابتدیی مرتبه به انسانک مادهٔ
و منناً وصولی یعنی اولاً صاعلام و دینج بر حیوان ؛ صوکره
و خصوصیه عزم قوی ، فکر منور ، و حسیات رقیقه و عالیه
صاحبی بر ذات اوله بیلیمی ایچون جمعیتله یاشامغه محتاج اولدیغنی
هرکس تسلیم ایدر .

اگر انسانلر بو مرتبه به ایریشمش و یا خود هیچ اولمازسه
حیات معنویه حیات حیوانیه و حب غیر حسیاتک سماحتی ،
خود بینلکک ، خست و عقامتہ غلبه ایش اولسه ایدی مختلف
ضرورتلر تأثیریه و نسوق تصادفله تشکل ایدن هیئتلر قوانینه
موبناء علیه شارع و حا که محتاج اولمازدی .

— هر شخص دلالت عقل ایله و اوندن زیاده محبت
سائقه سیله هم جنسک حریتنه رعایت لزومنی طویار و اونلره
کندیله مساوی دهها طوغریسی قارداش معامله سی ایدر ،
هرکس دیگرلرینک صلاح حالی و سعادتی ایچون لندن کلئی
باباردی . اشخاص یکدیگرینه ناصل معامله ده بولنیورسه هیئتلرده

یکدیگرینه قارشى اویله حرکت ایلر وهر نسل کندندن صوکره کلن نسله انسانیتک اثر مشترکنى تعقیب و اکال ایتمکى تعلیم ایدرک برترقى دائمى حاصل اولوردی .

مع التأسف بز هنوز مستعد اولدیغمز مرتبه ده دکلز . افرادک حرکات شخصیه واجتماعیه سنده ، هیئات اجتماعیه نك حیات داخلیه سنده و هیئتلك مناسباتنده حقیقی بر رابطه سزلق حکمفرمادر . بونک ایچون هیچ اولمازسه عین هیئته منسوب انسانلرک یکدیگرینه جهل و یاسو، قصد ایله زیاده فنالق ایتمه لرینه مانع اوله جق قانونلر وضعی لازم کلش ؛ قانون تنظیم ایتمک و قانونه رعایتی ، وقوع بوله جق تجاوزاتى جزا دیده ایدرک ، تأمین ایتمک ایچون بر قوت تأسیسنه مجبوریت کورلمشدر .

قوة سیاسیه نك برنجی و باشلیجه وظیفه سی بوایدی و آلآنده بودر . ممکن اولدینى قدر چوق کیسه نك رفاه مادی و معنویسنی قابل قیله جق ترقیات شخصیه واجتماعیه نك شرائط و وسائطنی توسیع و اکالدن عبارت اولان و وظیفه حامیه نامی ویر یله بیله جک اولان وظیفه سی بوندن صوکره کلیر .

تخمین ایدیله بیلدیکنه کورده اصول سیاست، مبدآنده صرف پدرانه اولوب ابتدائى عائله ده بابا هم حکمدار هم راهب ایدی . عائله قیله وجوده کتیره جک قدر تکثر ایدنجه جد حاکمیتنى عائله هیئته تشمیل ایلدی و کندینه تابع اولان رئیس لرده و کلاسنی تشکیل ایتدی . هیئتى تشکیل ایدن افراد چو غالوب اقامت

ایستدکری یر دخی وسعت پیدا ایدنجه حکومت عائله حکومتی اولمقدن چیقهرق آریستو قراتیک وشاهانه بر شکل آلدی . حکمدار اکثریت اوزره اکبر اولاد اعتباریله برنجی صویندن وزادکان ایسه ایلک عائله رئیسرینک اخلافندن تشکل ایلردی . آرتق اولیای امور عمومک منفعتی ایچون دکل منفعت ذاتیه لری ایچون اجرای حکم ایتکه قویولدیله . صنفله وامتیازات ظهور ایتدی وکوندن کونه چوغالمقده اولان کتله ناس اقلیت ممتازه حسابنه ایشله دلمکه باشلادی . مختلف عائله لره منسوب اولان قبیله لر مجادلات شدیدته تیجه سنده یکدیگرینه قاریش دقلری زمان حال دها فئالشیور ، غالبله مغلوبلری تحت اسارت آلیورلر وهیچ اولمازسه مغلوبله عادات وقوانین وتأسیساتلری قبول ایتدیرمکه اوغراشیورلردی .

بونکله برابر عدداً قوتی کیتدکجه آرتان خلقک انقیادیی ادامه ایچون مهیب برنظام وتشکیلات وجوده کتیرمکه احتیاج وازدی . بو ایجاد ایدلدی . حیات عمومیه دن افرادک حیات خصوصیه سنه وارینجه یه قدر هرشی اینجه دن اینجه یه تنظیم ایدیلدی . بوکون نظام اجتماعی یه قارشو جنایت ، جرم دکل اوافق برتجاوز بیه عدایده میه جکمز حرکات ، شدید وبعضاً غدارانه جزالره چاریلدی . قوای حکومتیه وامتیازاته وضع ید ایتمش اولانلر بیننده کی مجادلات تضییق واعتسافی برقات دها آرتیریوردی . چونکه بومجادلاتک کرک دوامی مدتجه وکرک ختامندن سوکره

ضرری خلقه ایدی. بومدعانك صحتنی بوتون آوروپا اقوامنك
تاریخلری باخصوص فرانسه تاریخی هر صحیفه سنده ارانه ایدر.
خلقك اطاعتنی تأمین ایچون بر یاندن وظائف وقانونه
حرمتی تلقین ایتمکه برابر بر یاندن ده حقوقك جاهلی براقق
لازمی. حکمدارلر وزادگان رهبانه مراجعتله بوکا موفق
اولدیلر.

شبهه سز دین منبعنده صوك درجه شایان تحیلدر: فکر
بشرك کندی وجود وعاقبتی اسرارینه نفوذ احتیاجنی افاده
ایتدیکی کبی اولومك حیاتك صوك حدی اولدیغنه وکیدن سوکیلی
وجودلرك بزم ایچون تماماً ضایع ایدلمدیکنه اینانق احتیاجنی ده
ارانه ایدر. دینك بر منشیء ده دنیاده اجرای حکم ایدن ولو
ظاهری ~~حقبیزلانی~~ قارشو سنده حس ایدیلن درین بر عدالت
صرفه آرزوسیدر. اوصورتله که بوتون ادیانك عقیده اساسیه سی
ابدیت روحه اعتقاددر. الهه اینانق بونك بر فرعیدر. فی الحقیقه
تألیس عدالت ایچون حکیم وعادل وقوانینك واضی وقوای
طبیعه یه آمر بر حاکم لازمدر. دین طبعینك روحی بودر.
قواعد وعقائدی اول امرده مبهم بر صورتده فرق ایدیله بیلمش
وحتی جهل ومنافع واغراض ایله تحریف ایدیش تفکرات
اخلاقیه وفلسفیه سایه سنده کیت کیده وضوح کسب ایتشدرد.
فن بقطه نظرندن دینك قیمتی هر نه اولورسه اولسون
انسانلرك مساعیسنه ظهیر، آلام واکدارینه تسلی یاب اولدینی

واونري عدالت و خيرہ سوق ايتديکي ايجون قيمت معنويه سي بويوکدر . فقط يازيق که انسانلر ديني سوء استعمال ايتيش و ايجلرندن بعضيلري الوهيت نامنه سويليوب حرکت ايتديکلريني ادعا ايدرك عقائد و عباداتي غدر و اعتسافه آلت ايتشلردر .

برچوق دفته حکمداران و زادگانك نفوذ رهباني قيرمنه چاليشدقلري معلومدر . فقط ايکي طرفده اوزلاشمقده کی منفعتي چابوق تقدير ايتديکندن ارباب امتياز امور و باخصوص اعمال دينيه رعايت کوسترمکه باشلاديلر . هر درلو قصور لر ينك مسامحه ايدله سي مقرر اولديغندن بورعايت اونلر ايجون قولاي برشي ایدی . زادگان ورهبانك يکديکرينه مظاهرتي بويلهجه تأسس ايتدی که ارتجاعيونك اقتدار حکومتی الده ايتک ايجون کوستردیکی مساعیده بوکون دخي تظاهراتی کورمکده يز .

بيکلرجه سنه راهبيلر قوه سياسيه نك جناب حقندن کلديکني و بوکا تعرض کفر اولديغني تعليم ايتديلر . في الحقيقه يونان متفکريني و آرقه لرندن بعض لاتينلر حقوق عقلی ادعا ايله بر درجه يه قدر حریت شخصيه يي مدافعه ايتديلر . فقط مدافعات پک محدود بردائره داخلنده قاليوردی . في الحقيقه خريستيانلق دخي اوائل نشئتنده بوتون انسانلرک نظر حقده مساوی اولديغني وعظ ايليوردی . فقط بر ياندن ده هبوط و حضرت عيسانک ذنوب بشرک عفوی ايجون فدای نفس ايلديکی اعتقاديني تعليم ايليور و حیات دنويه يي انجامی نجات و يا عذاب

ابدی اولان بر امتحان کبی کوستریوردی . بو امتحاندن سلامتله قورتوله بيلمک هر حالده نائل عفو اولمغه متوقف اولوب عفو ايسه مراسيم مخصوصه دينيه نك اجراسيله قابل و بو مراسيمك اجراسنه انجیق راهبر صلاحيتدار ایدی . نجات امر عظيمه اوقدر اهميت ويريلسيوردی که دیگر جهتلر بونک ياننده تماماً غائب اولويوردی : « روحی غائب ايتدکن صوکره دنيايی قازانق نهيه يارار . » بناء عليه انجیلک محتوی اولديني قواعد اخلاقيه نك کوزللكيله برابر دين عيسوی باخصوص دردنجی عصرده کی تشکیلاتی اعتباريله حکمدارلر ، زاده کان ورهبان النده اعتساف وجر منفعت ایچون دهشتلی بر آلت اولمغه مستعد ایدی . علائق دنیویه دن تجرد ایله قوته قارشو حرمت وهردرلو مزاحمه تحمل امر ایدیور، کذلک عقله عدم اعتماد ، فن و فلسفه یه وباخصوص نظارت و تفتیشی قبول ایتمیان فن و فلسفه یه عداوت تعلیم ایدیوردی . حلقک بیلکيسنی طوغدیني محیطده قالب یاشایه جق معلومات ابتدائیه حصر ایتمک ایسته یور وعقائد دینه تدریسنه وباخصوص عباداتک تعلیم وایفاسنه بویوک براهیت ویریوردی . قوللر ودارالفنونلرده کی معلملرک درس لرندن زیاده تدریسات عوام اوزرنده صیق بر نظارت اجرا ایتمک چالیشیوردی . بو افکار و تمایلات ایله ناصل اولورده هیئت رهبان حائز اولديني اقتدار معنوی یی آرتیرمق ایچون حکمدارلق وزاده کانلق ایله عقد اتفاق ایتمز ؟

ناصل اولورده حکمدار و زاده کان حکم و نفوذینی ادامه و تقویه
ایچون بو اتفاقدن استفاده یه شتابان اولماز ؟ ناصل اولورده بونلر
انسان اولدقلری یعنی جهل خطایه معروض و منافع و اعراضک
تأثیراته تابع بولوندقلری حالده حائز اولدقلری امتیازاتی توسیعه
چالیشمازلر ؟ قوت و امتیازلرینک ابدیاً الدن کیمه سینه ناصل
رضا کوستر بونلری تکرار الله ایتک ایچون بو کونده
کورلدیکی اوزره لاینقطع تشبثلرینی تجدید ایتکدن ناصل فارغ
اولورلر ؟ قابلیدر .

مع مافیه خلق حریت فکریه و سربستیء حرکاتنه قارشی
کیتدجکه آرتقمده اولان موانعه رغماً سفالتنی و دوچار اولدینی
مظالمی درک ایتدی . قوای عمومیه نك غایه حقیقیسندن
انحراف ایتدیکنی ایجه حس ایدیئوردی . چونکه عمومک
رفاهنه خدمت ایده جک یرده اکثریتی بر قاچ کشی یه فدا
ایتمکده ایدی . آره صره مفدورین بویوندورقدن قورتولوق
ایچون صرف غیرت ایدیئور ، زنجیرلرینی پارچالور و انقاضیه
مستبدلره مقابله بالمشده بولونیوردی: فقط تشکیلاتک ورؤسانک
فقدانندن و یابه ییله جکنی و ایستدیکنی آچیقجه کوروب آکلایه
مادیقندن طولایی یه چابوجاق ربقه تابعته دوشویورو حرکات
احرارانه مشوقلرینک دوچار اولدینی مجازات مدهشه قلبلری
تدهیش ایده رک اوزون بر مدت ایچون انتظامی اعاده یعنی
اصحاب امتیازک امتیازلرندن کمال سکون ایله استفاده لری تأمین
اولونیوردی .

برکت ویرسون که خلق مخاصملری آرمسند بیه بیهلرک بیلیمه رک کندیله یاردیم ایدن آدملر بولویوردی. حکمدارلر زاده کان ورهبان آرمسند انسانیتک مستننا نمونه لری ظهور ایتدی. بونلر اصول حکومتک مظالنه قارشى عصیان ایده رک چاره ساز اولمغه تشبث ایتدیلر ؛ فقط بریاندن خلقلک وبریاندن امتیاز صاحب لرینک مقاومتنه چارپیلهرق انجق ناملرینه اضافه ایدیلن عاقل ، عادل وملت باباسی کبی لقب لره تقدیس ایدیلن بر خاطرۀ شکر کزاری برآقه بیلمشلردر . بوخاطرات کیتدجکه آغیرلشان بار استبدادی زیاده حس ایتدیرمکدن باشقه برایشه یارامیوردی .

بو حالک اصل علاجی فنالفک آرمه سندن ذادکانک ، بینلرنده و حکمدارلره قارشى مجادلاتندن ، قوۀ دینیله قوۀ جسمانیله آراسنده کی اختلافاتدن ، علما وفلاسفۀ عیسویه بک دوشدکلری خطا و غرابتلردن ظهور ایده جکدی . نهایت ۱۵ نجی عصرک نصف اخیرنده و بوتون ۱۶ نجی عصرده یونان ورومامتفکرینی یکیدن تبع ایدیلهرک عقل حیثیت و قوتی ادراک ایتدی ؛ بوصورتله کلیسا ودولتک مدعیات مستبدانه سنه خاتمه چکیدی . حریت فکریه آرتق بوتون موانعه غلبه ایدرک ماهیتلرینی اییدن اییله تدقیق و ظاهره چیقاردینی استبداد سیاسی ودینی نی تخریب ایلدی .

بونک اوزرینه اوج اساس وضع اولوندی :

۱۔ قوہ سیاسیه نك سبب وجودی ملتك سعادتی اولدیغندن بوقوت طوغریدن طوغری یه ملته عاندر . وملت اولسه اولسه بعض کیمسه لری بونی کندی نامنه اجرا ایتك ایچون توکیل ایدر . وبو وکالتك صورت اجراسنی تفتیش حقنی حاندر . وکیلی شرائط وکالته رعایت ایتدیکی تقدیرده عزل ایده بیلیر .

۲۔ دین صرف امور شخصیه و وجدانیه دندر . هرکس آخرك حقوقی و نظام اجتماعی بی خللدار ایتماك شرطیه ایستدیکی دینی اختیار و احکامی اجرا ایتك وحتی هیچ بر دینه سلوك ایتماك حقنی حاندر .

بونلردن استنتاج اولونان اوچنچی اساس : اقتدار حکومت طوغریدن طوغری یه ویا طولایسیله هیچ بر طریق مذهبی و یا هیئت دینی یه منسوب اولما مالیدر .

۱۶ نجی عصردن اعتباراً کمال شدتله مدافعه ایدلکه باشلانان بو اسلر کیت کیده دائره انتشاری توسیع ایلدی . ایجابات عقله موافق اولدینی ایچون بو طبیعی ایدی . بر جدیدك کشفندن اعتباراً حیات خصوصیه و عمومیه بی دریندن درینه او قدر تعدیلاته اوغراتان وقایع سیاسیه و اقتصادیه دخی بو اسلر ك انتشاری تسهیل و تعجیل ایلوردی .

سیقولاستیکك وصایتندن قور تولش اولان علمانك کشفیاتی، طباعتك ایجادی دخی (راسیونالیزم) ك ترقیاتنه پك زیاده یاردیم ایتمشدر . افکار جدیده ده قارتدن زان زاق روسویه قدر

باخصوص فرانسه ده توسع ایتکده ایدی : اون دردنچی لوئیک
 مملکتی خراب ایدن دلیککری ، ره ژانسیک و اون بشنچی
 لوئی سلطنتک اسراف و سفاقتی اسکی اصولی بوسبتون کوزدن
 دوشوریرایکن کنج آمریقا جاهیر متفقہ سی ده بر ملتک ایسته .
 دیکی وقت یاپه بیسه جکی شیئی کوستریوردی . نهایت فرانسر
 قومی بوربونلرک چورومش تخت سلطنتی زیروزر ایتدی
 و بوسقوطک حصوله کتیردیکی صدار آوروپاده حکومات
 مطلقه نک وفاتی و ده موقراسینک جلوسنی اعلان ایلوردی .
 مع التأسف ملتک تربیه سی تمایلاتی درجه سنه واصل
 اولمامشدی ؛ حرکاتی اداره ایدنلر ایسه نظریات عتیقه ایله
 مشبوع و حقایق حادثاته و اقوام جدیدنک احتیاجات عیدیه
 و مغلقه سنه کافی درجه ده واقف دکلدیلر . بونک ایچون
 ماضینک خرابه سی اوزرینه ینه اونک انقاضیلہ یکی جمعیتی بنا
 ایتک ایجاب ایدنجه اک عالی مقاصدی تعقیب ایدهرک اک بیوک
 خطالره دوچار اولدیلر . صرف نظریاتیجی و فکرپرست اولان
 بو ذاتلر تصورات مجرده لرینی موقع فعله قویمغه قالدیلر .
 کرک انسانلرده و کرک اشیاده کوردککری مقاومت اونلری
 برغیض و نفرت ایتدی . مقصدلرینه ایریشمک ایچون نه
 درجه ده شدت کوستردککری معلومدر . بو ، حال سابقک
 رجوعنه ، دیرکتوار و بونا پارطه و بوربونلرک عودتنه یول
 آچق و وسائط احضار ایتکدی . فقط بوربونلر دستور

معروف و جہلہ ہیچ برشی اوکر نہ دن اُکری کلدیلر ؛ ماضی بی
 تماماً اعادہ و تأسیس ایتک ایستورلردی . فرانسز عسکرینک
 برّ عتیقی اکئنہ بویئہ قاریشدیررکن اکمش اولدینی افکار
 و حسیاتی نظر اعتبارہ آلمایہ رق سائر اوروپا حکمدارلری ده
 بو آرزوده ایدیلیر . فقط ہیچ برشی بر آقار صویي منبعنه
 طوغری آقیتہ ماز . ایسترا ایستہ من مطلقیت امتیاز و مساعده
 طریقہ داخل اولدی .

ایکنجی فصل

حکومت عوامک معارضلری

ده موقراسی نهریه سنک لزوم و امطانی

۱ — حکومت عوامک معارضلری .

بر نهرک منبعنه طوغری آقیتله میه جغنی درمیان ایتمشدک .
فقط هر حالده نهرک جریاننه نظارت و اوئی تنظیم ایتمک
ممکندر ، اکبر بر چوق مشئوم فلاکتله معروض اولماق
ایسته نیرسه بونی یایمق الزمدر .

شبهه سزده موقراسینک غایه خیالی پک پارلاقدر . هب فاضل
و کافی درجه ده منور فکری اولان افراد ملت دائما منافع
عمومیه بی منافع خصوصیه تقدیم ایده جکک و بالذات و یا خود
اک مستعد و اک اهل وکیللری واسطه سیله تنظیم ایده جکلری
منفعت عامیه اک موافق قانونلره اداره اولنه جکلردر . فقط
خیال حقیقتدن نه قدر اوزاق !

حقیقتده ده موقراسی عددی قیمته ، جماعتی کزیده لره
تقدیم و ترجیح ایتمیورمی ؟ خلق هیئت عمومیه اعتباریله
عقله تابع اولمقدن زیاده احتراصاتنه قایلیر . و حسیاتی اکثریا
عالیجنابانه و اصیلانه اولسده تمایلاتنده شدتیه غایت شایان
اسف افراطلره دوشر . دائما بویله اولمش و دائماده بویله
اوله جقدر . زیرا باشقه درلو اوله بیلمک ایچون شرائط عادیه

حیاتیہ کورہ اکتساب هر کسه میسر اولمایدان بر درجهٔ عرفاندن بوتون افراد ملتک نصیبه دار اوله سی لازم کلیر .
 فی الحقیقه فن حکومت و صنعت حکومت او قدر چوق و متنوع معلومات ایستر و حل ایدیله جک مسائل نظریه او قدر مغلق و اقتحام ایدیله جک مشکلات عملیه او قدر آغیردر که بونی پک آز کیمسه لر تحصیل ایدوب او کر نه بیلیر . زنکین برعائله دن طوغوب ارثی بر استعداد مالک اولان کیمسه لر انجق بوکا موفق اوله بیلرلر . بناءً علیه اقوامک همان کافه سنده اولان سب و ثانیاً آلدق لری مساعد بر تربیه ایجابیه فن و صنعت حکومتی کندینه تخصیص ایدن زادکان صنفی واردر . غرض و منفعته قابل مقسزین و هیج اولما زسه اکتساب شان و شرف آرزو سیله فداکارانه ادارهٔ حکومت ایده جکلر انجق بو صنف افرادی ایچنده بولنه بیلیر .

کثلهٔ عوام بو صنف ممتاز آراسندن اک ایلیزینی اقتدار و مزیتنی بحق تقدیر ایدرک ناصل تفریق ایده بیلیر ؟ و بونلرک حرکاتی نه صورتله تفتیش ایلیه بیلیر ؟ کزیده انسانلرک عمومک توجهنی جلب ایله قازاندق لری محبتی ادامه ایده مه میسی پک محملدر . افعال و حرکاتده محافظهٔ اعتدال ایدرک خلقتک تمایلاتی عقله توفیق ایچون تعدیل توجیه ایله مخالفتده بولنورلر . خلقدده فکرأ و اخلاقاً عادی اولان حریص لری دیکله مکه و اونلری تعقیبه مجبور اولور . بو ایسه هر شیدن اول منافع

ذاتیہ سنی دوشونن ویاخود یشواسی اولدیفنی ادعا ایتدیکی حالده
حقیقتده سائقه منفعت ویا حرص ایله اسیری اولدیفنی برجامتک
بر زمره ، بر هیئتک منفعتنه چالیشان عادیلرک اجرای حکم
ایتمه سی دیمکدر . آرتق فرقلر بیننده ودها طوغروسى اولنری
سوق ایدن سفیل حریصلر آره سنده مجادلات باشلار . بونلر
موقع اقتداره کلنجه قوتلرینی آنجق کندیلری کبی دوشونمیان
کیمسه لری محو ایچون استعمال ایدرلر . بو حال ایسه حکومت
عوامک قورقونج بر « قاریقاتوری » اولان « ده ماغوزی »
دیمکدر . بونک نهایتده غایت فنا بر استبداده منجر اوله جفنی
افلاطون پک کوزل ارائه ایتمدر . و فی الحقیقه حادثات ده بو
نظریه نك طوغریلغنی اثبات ایتدی . عادى پولیتیکه جیلرک
رقابت سفیلانه و مجادلات منفوره لری کورمیورمی یز ؟ بو
بو چیرکین منارعاتله وطنک هم شانی لکدار هم ده امنیتی
اخلال ایدیلیمور .

ده ماغوقلرک سوء استعمال ایتدیکی حسیات ایچنده عدالت
احتیاجی ایله انسانیت محبتی برنجی صریه قومیق ایجاب ایدر .
بو سوء استعمال ک زیاده وطن فکرینی ووطنپرورلکی محو
ایتمکده در . بونک نیچون وناصل اولدیفنی کورمک قولایدر .
تشکیلات اجتماعیه نك نقایصندن طولانی برچوق کیمسه لر
طوغدقلرندن اعتباراً بوتون حیاتلری ماده و معناً غایت سفیل
بر حیاته محکوم اولدقلری حالده بر قسم قلیل طالعک بوتون

مساعدا تندن بلا استحقاق مستفيد اولور لر . تسليم ايتمليدركه
 بو آچيق حقسزلنه اك باشلى سبب اخلاق وعادات وتاسيساتك
 تكاملندن وفنونك ترقياتيله صنايع بشريه نك تطبيقات عديده
 سندن نشأت ايدن فعاليت اقتصاديه نك شرائط حاضره سيدر .
 هر قومك صنوف مختلفه سي بننده واقوام آراسنده زمين اقتصادده
 موجود اولان بومجادات كيتدكه شدتي آرتيره رق هوبسك:
 (Homo homini lupus انسان انسانك قورديدر)
 كلام مشهوريني تسليم ايتديره جك درجه يه كلكده در .
 حتى بعض فلسفه مكتبلىرى بو احوالى **Struggle for life**
 مجادله خيات نظريه مشهوره سيله حقلى كوستر مك ادعاسنده
 بولونقمده در . داروين ، هربرت سپنسر ونيچ امثالاً ترقياتك
 حصولى ايجون ضعيفلرك اورتهدن قالمه سي وبالكز قويلرك
 بقاسى لازم كلديكي واك ممتاز كيمسه لك انسان سورولرينى اداره
 ومقاصد مخصوصه لرينى استحصال ايجون اونلرى كندى اسلوبلرينه
 كوره تنظيم وتشكيل ايتمه لرى وكندى قوتلرينى جمعيتلره سرايت
 ايتديره رك اونلرى مجادلاته سوق ايله كندى حرص اقباللرينى
 تسكين ايتمكه برابر جمعيتكده تفوقنى تأمين ايتمى لازمدر .
 مثلاً برنجى ناپولئون او حددن افزون حرصيله اوروپانك
 وبوتون دنيا نك مدنيتنى سيرسريع ايله ايلرولتمكه سبب اولمديمى؟
 ديزلر .

فقط صنوف واقوام بويله شدتله يكديكريشه چاريدجه

فعالیت اقتصادی نك اشكال مختلفه سی آراسنده موجود اولان
 راوبط دها زیاده ظاهر اولمده وانسانك قواسنی وطبیعتك
 کندینه بخش ایتدیکی منابع ثروت قدرتی نه قدر دلیجه صرف
 واستهلاک ایتدیکی دها ای کورولمکده در. اویوشوب یکدیگری نه
 معاونت ایده رک پک کوزل کچمه سی ممکن اولان مخلوقاتك
 سفیلانه مقاتله و محوینی موجب اولان حربك نه قدر عبث و چیرکین
 اولدینی کیتدکجه دها ای آکلاشله قده در. وقوملر قارده شلریله
 ایتدکلی محارباتی وطن نامنه اجرا ایتدکلی ایچون بعض
 متفکرین وطن دنیلن شیئه نفرت ایتشلر در. بونلر وطن
 فکری اصحاب امتیازله ملتی کندی حسابلرینه چالشیران
 کیمسه لرک محافظه سنه اوغراشدقلی افکار و اخلاق وحشیانه
 بقایاسندن عد ایدر لر. اونلره کوره بو اسکی صنمه تعبددن ،
 ومحافظلری نك حکم ونفوذندن قور تولق ایچون بوتون مملکتلرده کی
 بچارکان اهالینك یکدیگری نه معاونت ایتسی لازم کلیر .

بو تشویقات هر طرفده حسن قبوله مظهر اولدی . زیرا
 وسائط مخبره نك تعددی سایه سنده آرتق افکار ایچون حدود
 یوقدر ومدنیلرک افکاری بیننده یواش یواش حصول بولان
 اتحاد آز چوق یاقین بر استقبالده اخلاق وقوانین وتأسیساتك
 یکنسقلغنی موجب اوله رق نهایت اقوام آراسنده کی مبیانی ازاله
 ایلیسه جکدر . بونکله برابر وطن فکریله انسانیت فکری
 آراسنده جدال باشلامشدر . بونلردن برینك مغلوب اولسی

وانسانیت محبتنک ضدی اولان وطن محبتنی قالدیرمسی لازم
کلیر کبی کورونور .

بزه قالیرسه بوراده ازاله ایدیلسی بک زیاده لازم فنا بر
سوء تفهم وار : بوده ایلک نظرده ظن ایدیلدیکی قدر کوچ
برشی دکدر . آزیحق حسن نیت ايله محاکمه ایدیلیرسه
دهموقراسینک تکمل طبیعی ومنطقیسی نتیجهسی اوله رق تقایصندن
تجرد ایدمچکی وائی آکلاشیلان وائی اجرا ایدیلن وطن
محبتنک انسانیت محبتنک ترقیسی ایچون بر مانعه اولمسی شویله
طورسون ، بوترقینک حصولی ایچون بر شرط لازم اولدیغی
درحال ظاهر اوله جفنه قانیر .

بوندن صوکره کی بیاناتر بونی اثبات ایدمچکدر .

۲ — دهموقراسی تربیه سنک لزوم وامکانی

خلاصه ایتدیکمز شو اعتراضات انسانی اقناع ایدمچک کبی
کورونور . اگر بونلرک رد وجرحی قابل دکله دهموقراسیدن
قطع امید ایتک لازم کلیر . حد اولسون که بویله دکدر ؛ بو
اعتراضات جدی برتدقیق اوکنده اهمیتنی غائب ایدر . وکوروکورکه
مختلف وغایت مغلق بر طاقم مسائلک یکدیگرینه قاریشمه سندن
نشئت ایتشد . تدقیق ایدم .

۱ . — اول امرده ملتک خیر ونفع حقیقیسی آکلامقندن

و کندی نی اداره یه مقتدر و امنیته لایق کیسه لری. تفریقدن عاجز اوله سی طوغری میدر ؟ بونی خاطره کتیر مایز .

شبهه سز سفیر لک و قوماندانلق ، معدن مهندس لکی کبی خصوصی وظائفه لایق کیسه لک رأی عام ایله حسن انتخاب ایدیه جکی موضوع بحث دکلدرد. حتی صلح حاکم لکی کبی اوافق ماموریت لری بیله انتخابه براقق تدبیره موافق دوشمییه جکی تجارب عیدیه ایله ثابت اولمشدر . فقط قانون یاقمقه موظف اوله جق کیسه لک انتخابی بویله میدر ؟

۱۷۸۹ انقلابی قوای تشریعیه، و اجرائیه و عدلیه نك تفریق اساسنی پك مسعود و قطعی بر صورتده وضع ایلدی : بوا اساس بوکون هیچ اولماز سه نظری اوله رق عمومیتله قبول ایدلمش کیدر .

قوة تشریعیه دن نشئت ایستیکی جهته وظائف اجرائیه و عدلیه هر حالده ملتک نظارت و تفتیشی آلتنده بولنمغه برابر بونلره احوال فوق العاده مستثنا اوله رق مداخله ایتماسی قبول ایدلمشدر . بویله اولونجه مسئله ملتک کندی نامنه قانون تنظیم ایده جکلری حسن انتخابه موفق اولوب اولیه جغنی تعییندن عبارت قالیر . بومسئله یی آریستو بوندن ایکی بیک سنه اول میدانه قویه رق کمال وضوحه و عقل سلیمه پك موافق بر صورتده حل ایتمشدر . ملت کندی و کیلی اوله بیله جک کیسه لک کرک حیات خصوصیه و کرک حیات عمومیه لر نده کی افعالنه باقه رق قیمت عقلیه و اخلاقیه سنی

تقدیر ایدہ بیلیر . بر آدم ای بر عائله رئیس ، اموالنی حسن اداره یہ مقتدر مدبر وفعال بر چفتجی ، بر صنعتکار ویا تاجر ایسہ واکر عفتنی وحقشناسلغنی وخیر خواهلغنی اوزون بر مدت افعالیله اثبات ایتمشه بوآدمه مصالح عامه نك تمشیقی بلا اندیشه تودیع ایدیلہ بیلیر . اول امرده مثلاً ناحیه ایشلری کبی محدود بردائرہ داخلنده واکر اوراده ابراز لیاقت ایلر و حیات خصوصیه ده اظهار ایتدیکی اوصاف عقلیه و اخلاقیه سنی ارائه ایلر سه قانون یاقق و اجرا و تطبیقه نظارت ایتک وظیفه سنه وارنجیه قدر صره ایله ده بویوک وواسع وظیفه لره دعوت ایدیلہ بیلیر .

فی الحقیقه هیچ برماضی سیاسی اولمیان و منافع عمومیه به خدمتی سبق ایتمه یان بر طاقم حریص کنج لرك رای قازانمق ایچون کال تهالکله چالیشدقلری اکثریتله کورلمکده در . فقط ملت حاکمه بو خود بسندلری تواضعه دعوت ایدرک تحصیله ویا ایشلری باشنه کوندرمکده کجیکمبور .

فقط دینه جک که ناصل اولیورده انتخاب بعضاً او قدر عادی دوشیور و بعضاً ده او قدر فنا چرپشیدرلش قانونلره معروض قالیورز .

اول امرده یالکمز فرانسه یی اله آله لم عجبا مبعوثلر او قدر فنا و بیاغی آدملر میدر ؟ مبعوثان واعیان ضبط نامه لرینی جریده رسمیه ده اوقویکمز . چونکه دیکر غزته لر مشتریلرینک آرزو سنه

کوره بۆنلری قیرپه رق سستونلرینه کچیرلر . مختلف فرقلره منسوب خطباتک افکارعالیه و نزاکت بینانه حیران اولور و خلقل وکیللرینی حسن انتخابه مقتدر اولدیغنی کوره رک مطمئن اولورسکز . — فرانسه پارلمنتوسی ایچون سویلیدی کمز اجنبی پالمنتولری وبالخاصه هپسینک آغا بکی صاییلان وبر چوق نقاط نظردن حالاهپسینه نمونه اتخاذا ایدلمکده اولان انکلتزه پارلمنتوسی ایچون ده تکرار ایديله بیلیر .

منتخبدرک اتخابلرنده بعضاً و حتی اکثریت اوزره آلدانقلرینی قبول ایتسه ک بيله عجا بونی چاره سی بولونمز بر فنالقمی عدا ایدم جکمز ؟ بز بویله طن ایتمز . بلکه عکسینی ادعا ایدرز . ایشته دموقراسینک تربیه سی مسئله سی میدان چیقار . ده موقراسی هیئت مجموعه سیله نظردقته آلنجه تربیه سنک هیچ اولمازسه موجودیتندن وقوتندن کندینی خبردار ایدم جک وبقاسنی متاتله ایستیه جک صورته اجرا ایدلمکده اولدیغنی کمال جسارتله سویلیه بیلیرز .

اداره ایتک بهانه سیله اسکی ویا یکی شکل اسارته کرفتار ایتکه اوغراشانلر طرفندن ایدیلن خدعه لری ملت بر سوق مخصوصه تبعاً حکمسز براقیورمی ؟

فرانسه نک ۳۸ سنه لک سیاست داخلیه سی تاریخی بو افاده نک صحتنی تحقیق ایتک ایستیانلره کافیدر . حال حاضرده روسیه ده کنججه بردوما ده موقراسینک حریتی استعمالده

نه قدر چابوق کسب مهارت ايتديکني بزه کوس تريور . في الحقيقه حال حاضرده استفاده ايتديکي حریت غايه کمالی دوشونولورسه پک محدود در. فقط پک ياقين بر ماضی به قياس ايله ده پک بويو کدر .

ديگر طرفدن افرادک حریتني يالکيز افعال خارجيه لری اعتباريله دکل بلکه قدرت اراده و سلامت محاکه و وسعت و نزاکت حسيات ايله کنديلرينه مالکيتی تأمین ايدرك معناده کيتدکجه آرتيرمق و طيفه سی جمله سندن اولدينی قدر منافی اقتضاسندن بولوندينی دخی ده موقراسی پک کوزل آکلامقده در. بونک ایچون که اولاد مملکتک تایلک چو جو قلعندن سن رشنده وصولنه قدر تربيه سنی تنظيم ايله بوکا نظارت، وکیللرينه تأمین ايتديکی امورک اک باشليجیه سی و حتی برنجيسيدر :

هرکس تسليم ايدركه چو جقلرك وکنجلرك تربيه مدنيه سی مسئله سی ده موقراسينک حل ايتمک مجبوريتنده اولدينی مسائلک مهملرندن بری بلکه اهميدر . زیرا بونی حل ايتمک ایچون ابوينک ، چو جو غک و دوائتک حقوقنی نظر دقنه المق ایجاب ايدر .

على الاطلاق حق ابوت وارميدر؟ برچوق کيمسه لر بونک موجود اولدينی ظن و ادعاسنده درلر . چو جو قلرينی ايستدکلری کبی بويوتمک و اونلرک تحصیل و تربيه و مسلک لرينی کندي آرزولرينه کوره تنظيم و انتخاب ايتمک و نهايت اعتقادات سياسيه

ودینه لرینی تلقین ایتکده حراولدقلرینی سویلر لر . بومدعیاتک
اسبانی ایضاح ایتک اولدجه قولایدر .

ابوین چوجقلرینک استعداد ، اخلاق و تمایلاتی هرکسدن
ای بیلدکاری ایچون اونلره مناسب اولان شیئی ده هرکسدن
ای تقدیر ایتملری لازم کلزمی ؟ چوجوقلرینی اک مساعد
شرائط حیاتیه ایچنده یاشاتمغه چالیشان بابا و انا کندی حیات
معنویه لرینک وجه استقامتنی تعیین ایدن افکار و حسیاتی
چوجوقلرینه تلقین ایتک ایسته مسونمی ؟

مع مافیه ابوینک اساساً محدود و پکده منور اولیان محبتی
چوجوقلرک روحنی تماماً کندیلرینه بکزمه سندن قورقولور .
ابوین باخصوص ارکک چوجوقلرینک فکرآ و معنآ نه اولملری
لازم کله جکنی تابستادن کله برر لر . و بوقرار لر چوجقلرک
خیری دوشونیلرک دکل عائله ک استفاده و شرفی دوشونولرک
و کورنکی محافظه املیه ویرلمشدر . بناء علیه ابوین نه قدر حسن
نیت بسلسه چوجوقلری استقباله کوره دکل ماضی به کوره
یتشدیره رک ای بر تیجه الده ایدمه جکلری محتملدر . طبیعتده
هرشی قاعده تکامله تابعدر . بناء علیه نسل جدید شبهه سز ،
ماضیدن استفاده ایدرک فقط اوکاسیر اولمق سزین محیطله برابر
تکامل ایدمه جک صورتده تربیه ایدلملیدر . ابوین اوغل و
قیزلرینی کندیلرینه بکزمک ادعاسنده بولنورلر سه نظام طینی به
مخالف حرکت ایتش اولور لر . و بونک بوتون مسئولیتی

کندیلرینه راجع اولور . فقط بوصولته حرکت ایتکه حقاری وارمیدر ؟

حقیقتده ابویئک تربیه خصوصنده طوغریدن طوغرییه بر حق یوقدر . بلکه بو باده حق صاحبی اولان چوجوق دولته قارشی بر وظیفه ایله مکلفدرلر .

چوجوق کندینی دنیایه کتیرنلردن بالذات دوشونور ، حرکت ایدر عاقل وحر بر مخلوقه لایق بر صورتده یشامق وسائطنی ایستر . بو چوجوغک حقیدر . ابویئک نفوذ و حاکمیتی والد اولق مسئولیتندن تولد ایدر . بو نفوذ برحقه دکل بر وظیفهیه مستنددر . واکر ابوین بونفوذک ماهیتی لایققله آکلایهرق استعمال ایدرلرسه چوجوقلرک بالذات کندیلرینی اداره ایتک استعدادینی کرک نفسلرینه وکرک جمعیه قارشی حرکتلرنده مسئول اولق حسنی تزید ایدرک بونفوزده یاواش یاواش لزوم قالمایه جق صورتده حرکت ایتهلری لازم کلیر .

دولته کلنجه ، افراد مستقبله نک تربیه فکریه و اخلاقیه سنه تشکلات بدنیه لرینه وجتی تربیه اقتصادی لرینه علاقه دار اولماماسی قابل دکلدر . جمعیت ترقی ایتدکجه یکدیگریله مناسبت و ارتباطی آرتان افرادک قیمت اجتماعیه سی برقات دها ظاهر اولمقده در . بناءً علی ذلك منفعت عمومیه و طوغریدن طوغرییه چوجوقلرک منفعتی نفوذ و حاکمیت ابوتک سوء استعمالنه مانع

اولق ایچون واضع قانونک مداخله سنی ایجاب ایلر .
 افلاطونک دیدیکی کبی چوجوقلرک تربیه سی وظیفه سنی
 تماماً عائله دن آلوب دولته می ویرملی ؟ اشتراکیونک بعض
 خیالیرست طرفدارلری میاننده بوفکری بوکون دخی مدافعه
 ایده جک کیمسه لروار . فقط افلاطونک تصورایتدیکی جمهوریتک
 خیالی اولدیفنی ایلك آکلایان آریستو بوفکری تازمان قدیمده
 رد وابطال ایلش ؛ پک طوغری اوله رق « عائله بوتون فضائل
 اجتماعیه نك الزم بر مکتبدر . » دیمشدی . باخصوص بوتون
 وطنداشرلی قرداش وهیج اولمازسه دوست کبی تلقی ایتک و
 بلکه بعضاً پک بویوک فداکارلقده بولونه رق اونلره ایسلك
 ایتمکه سوق ایده جک اولان خیر خواهلر و تعاون حسیاتی
 عائله ده اکتساب ایدیلیر .

لکن حسن نیتلری ، قدرت مادیه و معنویه لری نه درجه
 اولورسه اولسون ابون مربیلک وظیفه سنی تماماً ایفاایده میورلر .
 معلملرک و مکتبلرک معاوتنه محتاجدرلر . مکتب کوچولولش
 بر حیاتدر دینیر . چوجوقلرک تربیه اجتماعیه سی ایچون بر
 شرط لازمدر .

بوراده ده نازک بر مسئله میداننه چیقار . دولت شهابک
 تربیه و تحصیلنه نه درجه ده قاریشمه لیدر ؟

دولتک بوتون چوجوقلرک نیم تحصیلدن مستفید اولماسنی
 طلب ایتسی لازم کله چکنه اعتراض ایده جک یوقدر . اولیای

امورک معلملرک قیمت فکریه و اخلاقیه سنی تفتیش ایتمک حق و وظیفه سنی و معلملرک چو جو قلمره و کنگلره نظام اجتماعیته ک اساسی اولان قوانین مکتوبه و غیر مکتوبه طرفندن تأیید ایدیلن قواعد اخلاقیه به مخالف عقائد تعلیم ایتماه لرینه نظارت ایتمه لرینه ده هر کس تسلیم ایدر . قوانینی اخلاسه و یا خود تحقیر و تزییفه سبب اوله بیلرک ، وطنداشیر آراسنه عداوت القا ایدرک تدریسات بلا مرحمت منع ایدملی و معلملر عدالت اجتماعیته تعقیباتنه اوغرایه رق جزا دیده ایدملیدر .

فقط دولت ده ایلری کیتلی ، بالذات مکتبلر آچوب اداره ایتلی و معلملر یتیشدیر ملیمیدر ؟ نظریاتجه منازعه فیه اولان بومسئله ملل متمدنه طرفندن بالفعل مختلف صورتلرله حل ایدلشدیر . بز بوراده تدقیقاته کیریشمک ایسته میورز . یالکز دیرزکه حیات اجتماعیته شرائط حاضره سی دولتی بوتون چو جو قلمرک مکتبه کوندرلمسنی طلب ایتمه و قسماً اولسون تدریسات عمومییه درعهده ایتمه و پروغراملری تنظیم ایلر نتایجنی مفتشیر ، امتحانلر هر درلو مسابقه لرله تقدیره و مسالک مختلفیه سلوک ایدرک طلبه نکه اهلیتینی تعینیه اجبار ایدر .

اقوام متمدنه ده بویولنه بر جریان مشهور اولمقده یعنی دولتک بوتون درجات تحصیله مداخله سی کیتدکجه آرتقمده در . شو مطالعاتی خلاصه ایدر سه ک دیه بیلررکه : تربیه خصوصنده اصلاً و ضروری اوله رق انجق بر حق واردرکه اوده

چو جو غو غکدر ، ملټک افراد مستقبه سندن بری و ترقیات اجټما-
عیه نټک عاملی صفتیه بر تربیه شخصیه کورمک چو جو غو غک
حقیدر .

چو جو غک بو حقندن صو کره جمعیتی یعنی سعادت مادیه و
معنویه لری تربیه و حریتلرینی تأمین و توسیع ایچون یکدیگرینه
ظہیر افرادک هیئت مجموعه سنی تمثیل ایدن دولتک حق دها
طوغریسی و وظیفه سی کلیر .

بناء علیہ ابوینک حق غایت مقیددر . زیرا بو حق انحق
مربی اولمق صفتیه عہده لرینه ترتیب ایدن وظیفه دن نشئت ایدر
و وظیفه لرینی تسہیل ایدہ جک بر واسطه دن عبارتدر .
تربیه نټک بواسطه دائرہ سننده اولان عائله ده وبعده
مکتبده ونہایت حیات اجټماعیہ ده صورت اجراسنی تدقیق
ایدہ جکز .

اوچنجی فصل

ده موقراسیده عائله نك وظیفه سی

افلاطونك جمهوریت نامنده کی کتابنده عائله علیهنده بولونمهنی موجب اولان اسباب ومطالعات بوکون وارد دکلدر .
عائله ازمئه قدیمه ده کی حتی بوندن بر عصر اولکی کبی تماماً معین وباشلی باشنه بر حیات صاحبی ، مستقل بر وجود واکثریا دنیلدیکی کبی بر حجره اجتماعیه حالنده دکلدر . حتی پك زیاده رفاه حاله مظهر صنوفده بیله عائله اسکی رونق و عمراتی غائب ایتکده در . ابونك ایشی اکلنجه سی وار ، اکثریا آیریدر لر ، پك آز بر زمان بر آرده بولونه بیلر لر . چو جقلرده ایرکندن بو مثالی تعقیب ایدر ، هربری انتخاب ایتدیکی بر محیطده خصوصی بر حیات کچیرمه باشلار . جمعیتك مرفه صنوفنه منسوب عائله لرده حال بویله اولنجه صنوف عادیه سنده ده بویله اولمی ضروریدر . بو عائله لرده حیاتك احتیاجات ماده سی ترقیات اقتصادیه نك ایجاب ایتدیکی شرائط مساعیه انضمام ایدر لار ککی ، قادینی و حتی چو جقلری ازیجی بر سعیه محکوم ایدر . کون بیتنجه عادی ، پس بر مسکنده اوزرینه راست کله بیه جك بر قاچشی قونمش بر ماصه باشنه یورغونلقدن بی تاب ونشهنسز بر حالده دوشر لر ؛ بو حال ایله بر آراده بولنقی

ذوقندن متلذذ اولمق قابلیدر؟ ولوله، ازدحام ایچنده واکثریت اوزره مخرب واک مستکرمه تهیجانه طاله رق آوونمق ایچون تکرار غلبه لغه شتابان اولور لر .

بو حالک اصلاحی عجباً ممکن دکلیم ؟ بعض کیمسه لرله برابر عائله اولور ، عائله اولدی دیمکه قدر وارالمی ؟ بونی خاطره کتیرمه یز و فناءلک چاره سی ینه کندنندن چیه جقدر اعتقادنده یز . اول امرده بوبوزوقلنی عقللی آدم لک آکلامامسی ، بوکا متأسف اولامسی قابل دکلدر . دیگر جهتدن بو حاله یکانه چاره ساز اوله جق شیئه یعنی چوجق لک حسنی تربیه سنه واوندن اول باخصوص کندی تربیه معنویه لرینه لازم کلدیکی درجه عطف اهمیت ایتمه دکلی ایچون ابوینده مسئولیتلرینی البت حسن ایدر لر . ازدواجک اصلاحی حقنده بوراده تفصیلاته کیریشیله مز . فقط عائله لرده انتظام سز لک الک زیاده ازدواج لک طرز وقوعندن نشئت ایتدیکنی سویله بیلیرز . ذوق ومنفعت ملاحظاتی مع التأسف ملاحظات سائره غلبه ایتمکده ، دیگر طرفدن ازدواجک تولید ایتدیکنی وظائف یرینه تأمین ایدم جکی حقوق نظراعتباره آلتقمبده در . آرتق ناصل اولورده زوجین اوزون بر مدت سعادت مشترکه لری ایچون معاونت متقابلده بوله رق وفاق وسکون ایله یاشایه بیلیر ؟ آز زمان ایچنده کندیخی بللی ایدن اختلافاتک سهولته بویویه رک مجادلاته ونهایت روابط زوجیه نک انقطاعنه بادی اولمسی ضروری دکلیدر ؟ کچیمسز ایکی کشی نک بریورد ،

بر اوجاق تأسیس ایدرک بوکار بط قلب ائمه لری، بونی چو جقلرینه سودیره بیلمه لری قابلیدر ؟ بالعکس ابوین آراسنده کی منازعات و مجادلاته ابتداری برر شاهد و صوکره لری بر حاکم و ضعیفه محزون و ساکت نکران اولان چو جو قلعائله نك وظیفه اجتماعیه سی حقنده فنا بر فکر حاصل ایده جکلردر . عائله تشکیلی نوبتی کندیلرینه کلدیکی زمان بونی ممکن اولدینی قدر تأخیره اوغرا- شه جقلری و انجق آنا و بابائری کبی خود بینانه وعادی اسبابه قایلانه رق ازدواجه طالب اوله جقلری شبه سزدر .

فقط بدینلکی افراطه واردیرمه لم . فداق نه قدر بویوک اولورسه اولسون ایچنده بر فیلز، اولاد محبتی واردرکه عائله یی و جمعیتی قورتاره جق اودر . فقط اول امرده بو محبتک اصلاح ایدیله سی لازم کایر .

عمومیت اوزره ابوین چو جوقلرینی یولنده سومزلر ، و تعبیر معروفیله شمارتیرلر . چو جو غنی شمارتمق اوئی لزوملی لزومسز او قشامنی اکلنجه ایدنمک اصلا لم چکمه سنی ایسته مامکدر . حال بوکه استحقاق کسب ایدیلن الملمر ملکه تفکری تنبیه ایلر . چو جو غه هر درلو اسباب ذوق ابدال اولنور ، ذوقه فرط انهمک ، المدن خوف حصوله کتیریلرسه ، تشبث شخصی ، ذوق حرکت آزالیر ، قوه اراده کوشر و یا خود بوزولور .

خلاصه چو جو غنک قابلیت طبعیه سنی تغیر ایدرک بر انسان کامل اولمسنه مانع اولور . بو صورتله یتیشن بر شخص بالا آخره

ناصل اولورده مجادله، حیاتییه کریشه بیلیر، ظهور ایدن مشکلاتی
اقتحام ایلیه بیلیر، باخصوص احتراصاتنه ناصل غلبه ایده بیلیر؛
خودیین بویودولمش چوجوق بویوب جمعیه قاریشه نهجه افعال
وحرکته منفعت شخصیهدن باشقه برمحرك طائماز. هر چه باد
آباد تحریر، حظوظاته قویولور. نظرنده حیات آنجق قوت
وخذعه ایله تأمین مظفریت ایدیله بیله جک برجدالیدن عبارتدر.
بوتون بونلر چوجوقلری کندیمز ایچون سومک، برکون
کلوبده فعال و مسئول اعضاسی اوله جقلری جمعیتی دوشونما بکدر.
اگر ابون مربیك وظیفه سنی لایقیله آکلایه رق حسن ایفا
ایتمک ایسترلسه نتیجه بویله اولماز، چوجوقلری تحمل
ایده میه جکلری آلامه معروض اولمقدن وقایه ایتمکله برابر
کندیلیرینی دوشونوب حرکت ایتمکده سربست بر اقدیرلردی.
چوجوق یا ککش حرکت ایتمه بیله نایجهده دوشونه رك خطاسنی
کندیلکندن تصحیح ایدر. آنجق بو صورتله چوجوقلر
حیاتک جدیتی، قیمت، معنویه سنی کشف ایله دوشونوله رك
یامیلان حرکتک ویردیکی ذوقی طویه بیلیرلر.

بوندن باشقه ابون چوجوقلرینه آجیه رقی، شخصیت
نوشکفته لرینه حرمت ایده رك منافرت و ضدیت صحه لرینی اونلرک
نظرندن صافلامیدر. چوجوق آناسنک، باباسنک بر برینه
تحقیر و غیض ایله باقیشدیغنی کوردجه، حقارت آمیز سوزلر تعاطی
ایتمک لرینی طویدجه یورکندن جریحه دار اولور؛ بوعادیلک قارشیسنده

ازیلیر . نازه روحلرك آدینی بویاره لر اصلا التیام بولماز .
ابون مربیلک وظیفه سنی و حیثیت ذاتیه لرینی دوشونه رک
آرالرنده وفاق و محبت اولدیغنه چوجوقلرینی ایناندرمالیدر .
بو مجاهده نك مكافاتی ده برابر در : اکر آراده وفاق یوقسه
تأسس ایدر . عین مقصدی تعقیب ایدرك فكر و قلبلر یاقلا شیر ،
بربرینی طایمینی ، تقدیر اتمکی نهایت سومکی اوکره تیرده ازدواجك
اساس تشککنده کی خطایی اولاد محبتی اصلاح ایلر ؛ براوجاق ،
یورد میدانلر کلیر : اولا افرادینه وبعده بوتون جسم جمعیتیه
نتایج حسنه بخش ایده جك اولان عائله حیات بولور .

زیرا فكر عائله جمعیت ایچون مضر در دیمك طوغری
اوله ماز ؛ بو فكر قرون سالفه ده طوغری اوله بیلیردی . او
زمانلر حیات اجتماعینك شرائط سیاسیه و اقتصادیه سی زمین
فعالیتی دارالتیوردی . حال حاضرده ایسه بو قابل دکلدر .
آرتق عائله چوجوقلرك کمال امنیتله بویویه جکی برملجا و بویو-
کلرك مساعی اجتماعیه آراسنده تبلی واستراحت بوله جنی بر باب
سکوندر . بوکون کندی عائله سنی سومك دیگرینه قارشى لاقید
بولونمق و یانفرت اتمکی ایجاب ایده جکی ادعایلیه جك برکیمسه
بولونه ماز . بالعکس عائله ده خیر خواهلر ، عدالت و تعاونی
اوکرشمش اولان بر آدمك قلبی بوتون بشریت ایچون آچیلمشدر .
بونك ایچون متأخرین «تهرانس» ك شو کوزل شعرینك قیمتینی دها
ای تقدیر ایدر لر : *«Homo sum, humani nihil a me alienum»*

puto «انسانم، انسانلغه تعلق ایدن هیج برشی بکا یبانجی قاله ماز» اکثریتله چو جوقلرک تربیه سنده ابونک وظیفه سی نه قدر مهم اولورسه اولسون بوایش ایچون لازم کلان وقت و وسائطدن محروم بولونمقده درلر. تربیه عمومییه احتیاجی بورادن نشئت ایدر. — بوندن باشقه ایون چو جوقلرینی یانلرنده آلیقویه رق تماماً کوزلری اوکنده تربیه ایتک ویا ایتدیرمک ایچون وقتلری، معلوماتلری و ثروتلری مساعد اولسه ده تربیه عمومییه مراجعت هر حالده فائده لی و بلکه الزمدر. ذاتاً بونی مونته نده سویله مشدی: «اوتهدن بری معرفت و قدر؛ بر چو جنی ابونک آلفیشلری ایله تربیه ایتک معقول دکلدر. بونلرک پک طبیعی اولان محبتلری، حتی اک عاقل اولانلرینی بیله، بو خصوصده رفته کتیره رک وظیفه لرنده قصور ایتلرینه سبب اولور.»

تالیرانک بیان ایتدیکی وجهله «تربیه یتیه ده چو جوق باش تاجیدر. مدایح و تقدیرات ایله مست اولور» بناء علیه چو جوق ضروری اوله رق کندینه فوق العاده بر اهمیت و بریر و قیمت شخصیه سنی پک بویوک کورور. بوندن باشقه عائله لرک اخلاق، سیاست و دینه متعلق بر جوق مسائلده کندینه مخصوص افکاری عادتاً خرافات، اعتیادات و اعتقادات مخصوصه سی واردر. عائله بر هوای معنوی کبیدرکه چو جوق خارجی هب بونک ایچندن کورور. بو هوای محیط حائر اولدینی قوه انکساریه دین طولانی حقیقی بر منشور کبی دائماً کوستردیکی اشیانک اشکال والوانی براز تغیر ایدر. اونک ایچون تماماً

عالمه سی ایچنده بویومش اولان برکنج خارجه چقینجه استقامتی
 غائب ایدر : هیچدن متحیر اولور تقدیر ویانفرتده دایمافراطه
 دوشر ، اوافق بر مانه فوق العاده تهییج ویا انکسارینی بادی
 اولورده بو آکلامدینی محیطده یابرسبب شورش اولوب کیدر .
 ویاخود حیات عمومی دن مستفید اولیه رق یالکز باشه قالیر .
 بونتیجک ایکسی ده باعث تأسفدر . سببی ازاله ایتلی . دنیانک
 اوافق بر نمونه سی و حیات اجتماعینک تجربه کاهی اولان مکتبه
 چوجوقلرک دوامی لازمدر . اوراده چوجوق کندندن ذکی
 وچالیشقان آرقداشلره تصادف ایدرک آرزوی تقدم ایله چالیشه جنی
 کبی عین زمانده قیمت شخصیه و حقیقی مساوات نه اولدیفنی ده
 اوکره نیر . دیگر محیطدن چیقمش ، اعتیاداتی ، افکاری ، آرزولری
 باشقه چوجوقلره مصادف اولورده کورولورکه بوتون روحلر
 بوتون سجهلر عین قابله دوکوله مز . آرقداشلریله کوزل کچنمک
 ایچون اضرار ایتمک کافی اولیوب اونلره ایلک ایتمک ده لازم
 کله جکی اوکره نیر . بوندن باشقه تربیه عمومی مناسب وجهله
 اداره ایدلیدیکی تقدیرده چوجوق عدالت ، خیرخواهلیق ، انصاف
 و نزاکتی ، حرمت و خدمت متقابله بی چابوق اوکره نیر ؛ تعاونک
 بوتون فوائد مسعوده سی حس ایله خلاصه طریق انسانیتده
 سریع خطوه لرله ایلرولر .

تربیه عمومی دیگر بر نقطه نظر دنده لازمدر . آریستونک
 تعلیم ایتدیکی وجهله انسان ، بو حیوان سیاسی آنجق حیات

سیاسیه سایه سنده تماماً تکمل ایدر ده درجه اقداری نی کوستره بیلیر .
 بناءً علیه بوکا حاضر لئق ایجاب ایدر . « رولین » دخی بویله
 دیمشدی : « افراد مملکتی وظائف مختلفه سنی ایفایه احضار
 ایده جک شی ایی بر تربیه دن باشقه نه اوله بیلیر ؟ شباب ، دولتک
 بر فدانلغیدر . او سایه ده تازه لئبر ، ودوام ایدر . بوتون عائله
 بابالرینی ، بوتون مأمورین ، نظار خلاصه موقع اعتبار وشرفده
 بولونان کیمسه لک هپسی اورادن کلیورمی ؟ بوموقعلری اشغال
 ایده جکلرک تربیه سنده کی اییلک وفنالغک بوتون وجود دولت
 اوزرینه اجرای تأثیر ایده جکی وبونک عادتا بوتون ملتک روح
 ووصف مشترکنی تشکیل ایله جکی محقق دکلیدر ؟ »

فقط شبابی حیات سیاسییه احضار ایچون تربیه عمومییه
 ازمدر . « رولین » ده بونی هویلیور : « چوجوقلر خانه
 پندزه و صورت خصوصیه ده دکل بلکه عمومی معلملرله عین
 تربیه آلتنده صورت عمومییه ده بویودملیدر . تاکه اونلره
 کوچوک یاشدن وطن محبتی ، قوانین مملکته رعایت ومنسوب
 اولدقلری دولتک اصول و دساتیرینه میل ورغبت تلقین ایدیله
 بیلسون . زیرا هر حکومتک مخصوصاتی آیریدر . حکومت
 جمهوریه نک روح ووصفی باشقه بر حکومت مطلقه نک کی باشقه در . بونلر
 ایسه تربیه ایله اوکره نیلیر . » [۱]

بک معنیدار اولان بوسوزلر متقدمینک دائما قبول ایتمش اولدینی

بر نتیجه موصولدر . یعنی یوقاروده اشارت ایتش اولدینمز
 وجهله تربیه شبابه مداخله ایتک دولتک حتی ده طوغریسی
 وظیفه سی اولدینغی صورت قطعیه ده کوستر . معلملردن آرانه جق
 اهلیت ولیاقتی تعیین ایده جک ، پروغراملری ، نظاماتی تنظیم
 ایده جک ، چوجوقلرک صحت مادیه ومعنویه سنک محافظه سنه
 نظارت ایده جک دولندر . مختلف امتحانلر وتفتیشات ایله
 قوللانیلان وسائطی ، استحصالی ایدیلن نتایجی تفتیش ، اجرا
 ایدیه جک اصلاحاتی تحری وترقیاتی تعقیب ایده جک ده اودر .
 فقط یالکز اداره ونظارتدن عبارت قالمایه رق افراد مستقبلی
 بالذات بویوتک وظیفه سنی ده درعهده ایتلیدر . هرکس طرفندن
 قبول ایدلیکی اوزره دولت ، زراعت ، تجارت وصنایه ،
 امنیت خارجییه وداخلیه عائد مصالح عمومیه بی اوزرینه آلیر
 ایکن ناصل اولورده کندینی تشکیل ایده جک افرادک تربیه سی
 دولتک حقوقی ده طوغریسی وظائفی جمله سندن اولماز .
 « تأسیساتمکز ایجاب ایتدیکی اوصافی ، وحریتک مدار حیاتی
 اولان اخلاق عمومیه بی ملته ویره جک تربیه ملیه دن باشقه بر
 شی اوله بیلیرمی ؟ » [۲]

افراد مستقبله نك تربیه سی ، مؤسسات تدریسیه ،
 پروغراملر ومعلملر حقنده کی قوانین اجتماعیه نه قدر حائز اهمیت
 اولورسه اولسون ابوینک بوبابده اشتراک ومعاونتی الزمدر .

همان همان صرف کنیدیلهینه توجه ایتمکه اولان ایلک تربیه
وظیفه سنی یوقاروده ایضاح ایتدی کمز وجهله آکلایوب ایفایتمش
اولسه لر ایدی معلملرک ویره چکی ایکنجی تربیه یه فوق العاده
حاضرلشمش شاگردلر یتشمش اولور وبوتربیه برنجیسی دوام
ایتدی پردی .

یازیق که بویله اولیور . بر چوق معلومربیلر وباخصوص
مربیه لر کنیدیلهینه تودیع ایدیلن چوجوقلر ایچون هیچ بر
شی یاپلیدیغدن وبایلش اولسه بیله یکیدن ایشه باشلامق ایچون
اسکیلری بوزمق لازکله جکندن شکایت ایتمکه درلر . چوجوقلر
مکتبدن چیققدن صوکره عائله محیطده مکتبده اوکره نیلن شیلره
قارشى استهزا ونفرت طویمسه لر بیله هر حالده بویوک برلاقیدی یه
معروض اولمقده درلر . معلملرک بوندن شکایت حقلری درکاردر .
بو حالک کنج فکرلره القایده چکی شبهه وتردد اوائل حیاتی
تلخ ، بوتون حیاتلری اوزرینه سوء تاثیر ایتمه سی ضروریدر .
مع التأسف کوربیورز که اهمالچی ولاقید بر چوق ابوین
حتی چوجوقلرینه اکثریتله کوستردکلری فنا مثاللر ایچون بیله
سرد ایدمک بهانه لر بولیورلر . بونک ایچون حلقک بحق
خیر خواهی اولان بمض ذوات مکتب سنه لری ظرفنده ، او
زماندن اول وصوکره بویوک وکوچوکلری ماده ومعناً صیانت
ایدمک مؤسسات تدریسیه وجوده کتیرمشلردر . اوراده
چوجوقلر انی عائله باباسی وایی مربی اولق ایچون لازم کلان

معلومات و باخصوص اعتیاداتی اکتساب ایده چکلردر . شباب ، وطن و انسانیت خادمترینک تشبثات عالیجنابانه لری مشکور اولسون .

فقط بوتشبتات ابویژک معاونتندن استغنا کتیره مز . ابوین نه نام ایله اولورسه اولسون چو جو قلیزینک تربیه سنی المریسه تودیع ایتدکاری کیمسه لک مساعیسیله علاقه دار اولمیدر . اولنره دائما ظهیر اوله لری ، چو جو غک اطاعتنی و کندینه ایدیلن خدمت و اهتمامه قارشو شکر کذارلنی تأمین ایتمه لری لازم کلیر . مساعیده بو اشتراک اولماز سه معلملرک آووج طولوسی آته جقلمی تخمدن هیج بری فدیله مز . ابویندن بکله نان خدمات ایسه اوقدر آغیر دکلدرد . بو خصوصه دائر یازلمش لطیف بر صحیفه یی نقل ایتمه دن کچه مدک :

« مکتبه کیرن چو جو غک حیاتنده شایان تدقیق بر تحوّل حصوله کلیر . نهازی ایسه آقشام سفره باشنه اوطورلدینی وقت کوندوز صنفده کچن شیلری برر برر آکلاته جقدر . لیلی ایسه هفته نک وقایعی آکلاتمق ایچون آنجق بر بازار کونی واردرد . اسکی ویکی آرقداشلرینک یابدقلمی ؛ معلملرک ، مبصرلرک سویلدیکی ؛ ویریلان مکافاتلر ، اجرا ایدیلن مجازاتلر هپسی حکایه اولنور . بوتون بوشیلره آیری آیری قیمت بیچر . صرف ایتدیکی سوزلر اطرافدن آلمه در فقط ذکی چو جو قلم بونلری غایت شخصی بر حس ایله کندیلرینه مال ایدر . آکلایشلی آنا

بابا ایچون بواسرار نه بیوک برغنیمتدر ! چوجوغک اخلاقده
 حصوله کلکده اولان تحویلاتی ، ایچنده بویودیکی محیطی کشف
 ایتک ، احتراصاته قابلقدن منع ایلک اسبابی آکلایه مدینف رفق
 وشدتی ایضاح ایتک ، قلبنده حس اعتماد وحرمت او یاندزمق
 ومحاسبه نفسه آلدیرمق ایچون نه قیمتدار فرصتدر . » [۱]

دردنجی فصل

افراد مستفید نك تربیه فکریه و اخلاقیه سی

بوندن اوچ عصر اول باقون « انسان نه قدر بیلیرسه
اقتدار ده او قدر آرتار » دیوردی . باقونك كمال ایجاز ایله
افاده ایتدیكى شی دائما معلوم اولقله برابر هر وقت ای آكلاشیله مامش
بر حقیقتدر .

انسانك اقتدار شیبه سز بیلکیسی نسبتنده در . فقط بو
اقتدار صرف معلوماتدن نشأت ایتمز . علم انسانه انجق کندینی ،
اجزاسندن اولدینی طبیعی بیلدیره رك پایه بیله جکی و یاهمسی لارم
كلن شیرلی ونه کبی وسائطله مقصده وصول ممکن اوله جغنی
کوستر .

فن بو صورتله تصور ایدلدیكى تقدیرده بیله نشر ایتدیكى
انوار معرفت واستلزام ایتدیكى تربیه ایله انسانك قیمتنی زیاده سیله
تزیید ایلر . بناء علیه (ده موقراسی) نك معارف عمومیه نك
اتشاری ایچون صرف ایتكده اولدینی مساعی شایان تقدیردر .
بو نقطه نظرده پروغرام و تدریسی یکدیگرندن آیرمیلیدر .

پروغراملر اوزرینه تفصیلاته کریشمیه جکز . یالکزشونی
سویلزکه پروغراملر بوتون ملکات فکریه نك انکشافنی تأمین
ایده جك ، بالخاصه تربیه سنی تأمین ایلیه جك صورتده ترتیب
ایدلمیلیدر .

تحصيل تام و مكمل اولمليدر . فقط بوندن مقصد هر كسه هر شئك او كره دلمسى دكلدر . بوشه سز عبثدر . هر كسدن استعداد و قوتنه كوره بر شى بكه نير . معلم كرك مجادله حياتده و كرك وظائف شخصيه واجتماعيه نك ايفاسنده عمومه لازم اولان معلوماتدن طلبه نك هېسنى مستفيد ايتمكه چالشمقه برابر تمايلات و استعداد شخصيلرى تعيينه چالشمه رق چو جوقلرى اك زياته استعداد كوستردكلرى ، ذوق آلدقلى شيلرك نظرى و عملى تحصيلنه سوق ايتمليدر . بو اساس وضع ايديلنجه هيچ بر چو جوغك و هيچ بر كننجك طبيعه استعداد كوسترديكى بر تحصيلدن نسب و عائله سنك موقعى طولاييسيله محروم قالماسى تمنى اولنور . بو محروميت بوتون جمعيت ايچون بر زياندر . ايشته تحصيل تام بوصورتله تفسير ايديله رك نظامات تدريسونه نك دائما بوغايه يه متوجه اولمى لازم كلير . ذاتاً بوواديده ترقيات مشهود اوليور . هر هانكى صنفه منسوب اولورسه اولسون مستعد و چالیشان چو جوقلرك تحصيلك درجات عاليه سنه قدر ايلروليه بيلدكلرى كورلمكده ، فنون ، ادبيات و صنايعك و فعاليت اقتصاديه نك ترقياتى ايچون پك كوزل اميدلر ويرمكده در . فقط تحصيلك هر درجه سى بالخاصه تربيه يه خدمت ، ملكه دقتى ، خاصه مشاهده و تفكرى ، محاكمه شخصيه يي تميه ايدهر ك ، قيصه بر افاده ايله شخصى كندى كندينه دوشونمكه آليشدير مليدر . كندى كندينه دوشونمك نه ديمك ؟ البته كيمسه نك خاطرينه

کلیان فکر لر ایجاد دیځ دیکم ډکل . زمین عرفانده تجدیدیک مشکلدرد ؛
 بونی حصوله کتیرمک پک نادر کیمسه لره نصیب اولور . بوکون
 اوقدر عادی کوردیکمز حقایقک کشفی ارباب دهایه نه قدر وقت
 وزحمته مال اولدیغنی تاریخ فنون بزه کوستریور . فعالیت فکریه
 ایچون مواد ابتدائیه وایلمک بر تشکله احتیاج واردر : دوشونمک ده
 یورومک ، کینمک و بسلمک کی اوکره نیلیر . بونلر اوکره نیلیر ایکن
 قزانیلان اعتیادات بوتون حیات اوزرینه اجرای تاثیر ایدر .
 اوصورتله که انسان ، ایچنده بولوندیغی محیط اجتماعیه کوره
 دوشونور . صباوت و شباب معلملرینک وظیفه لرنده کی اهمیت و
 نزاکت و کندیلرینه توجه ایدن مسئولیتک و ستمی بوراده پک ایی
 ظاهر اولور . صاقینیه جق تهلمکه ایکی طرفلیدر . کنج فکر لری
 لایتغیر بر طاقم عقائده زبون ایتمک و یا خود اونلره هیج بر تحصیل
 مثبت و یرمیه رک و هیج بر اعتقاد اتقین ایتیمیه رک ضعیف فکر لری
 عطالته محکوم ایتمک قورقوسی واردر . فقط حمد اولسون که بو
 تهلمکه لردن قور تولق ایچون بر چاره ده وار : اکر معلم بیلیدیکنی
 یقیناً بیلور ، ایناندیغی و سودیکی شیلرک اسبابی ایضاح ایده
 بیلورسه ، اکر معتقداتنک فکر و قلبه ضرر و یرمیه جکنه قناعتی
 وارسه اونلری کمال صفوتله و بوتون قوتیه عرض و تبلیغدن
 چکیناملیدر . الویررکه عین زمانده کنج سامعلرنده تفکرات
 ذاتیه یه میل و آرزو اویندر منزه ده چالیشسون .
 پروا غراملرده معلمک وظیفه سنی تسهیل ایدر . بریاندن مولد

فیه نك تحصیل و تطبیقی افکارده وضوح و ترتیب ، مشاهداتده صحت ، واثباتده قطعیت احتیاجاتی کیتدکجه آر تیرر. دیگر یاندن یکی واسکی کزیده مؤلفلرک آثارینی تتبع ایله تفسیر و محاکمه ایتمک و تاریخنک بیطرفانه مطالعه سی کنج روخلرده انسانیت ایچون مدار شرف اولان تمایلاتی تنبیه مدار اوله جنی کبی تفکرک قیمت عالیه سنی تقدیره و انسانک کرک نفسنه و کرک همجنسینه قارشی حرمت کوسترمکه مجبور اولدیغنی ده آکلامغه باعث اولور . معلملری طرفدن بو صورته سوق ایدیلن چو جو قور کدی کندیلرینه دوشونمکی اوکره نیرلر یعنی مجاهدۀ ذاتیه لریله افکار مقبوله و مستحسنه نی تمناه و افاده نك معنای مقبولیه سربست دوشونور آدم اولمغه موفقی اولورلر .

سربست دوشونمک اکثر کیمسه لرک ظن ایتدیکی کبی اولو اورته بعض اعتقاداتی رد ایدرک دیگرلرینی قبول ایتمک ، بر عقیده نك طرفدارلنی یرینه دیگر بر عقیده یه مصرانه طرفدار اولمق دکلدر . سربست دوشونمک، قناعت وجدانیه صاحبی اولمغه چالیشمق و یقیناً بیلدکلرینی چکیمه دن سویلک و افعالی ده اقوالی کبی بونلره توفیق ایتمکله برابر آخرک عکسی ثابت اولونجه یه قدر صمیمیتنه شبهه ایدلماک لازم کلان قناعت وجدانیه سنه ده حرمت کوسترمک ، اعتقاداتی اظهار و مدافعه حقنی کندی ایچون اولدینی کبی دیگر ی ایچون ده ادعا و تسلیم ایلمکدر . بو وجهله سربست دوشونن آدم اعتدال و تواضعی محافظه ایدر ، دیگر-

لرینه قارشى مساعبدولنور، تمصب کوسترمز. ضلالت مطلقه نك
وجودينه قانع اولمدينى ايجون قبول ايتديكى مسالك ومذاهبده
اولان حقايقدن مستفيد اولمق اوزره تدقيق وتحريدن فارغ
اولماز

بوصورتده کى سربست دوشونش ترقیات شخصيه واجتماعيه
ايجون بر عامل مؤثر در ؛ بلا استثنا تقدیر ایدیلور ، وسائط
ممکنه ايله ترغیب وتشویق ایدیلیدر .

فقط تفکر يالکز ويابالخاصه ذکاتک اثرى دکلدرد : بلکهدها
زياده ارادتک وحى قلبک خلاصه بوتون روحک اتریدر .
انسان بالذات دوشونمکه موفق اولمق ايجون نه قدر مشکلاته غلبه
ايتک ايجاب ايدر : اوائل حياتده قازانيلان اعتياداته، تنبلكه،
احتراسات ومنفعتپرستى به، بونلرک هېسنه غلبه ايجون خير و حقيقته
نه قدر شديد و خالصانه بر عشق ايستر ! بناءً عليه دينيله بيلير که
« برانسانک حياتنده ايشلديکى الک مقدس ايش حقيقتى حس
ايدوب سويله مسيدر . » چونکه بونده بوتون موجوديتى
حصه دار در . دوشونمک دائما سوز ويا فعل ايله طوغريدن
طوغرى به ويا طولاييسيله اظهار ايديله جکندن بر انسان يالکز
کندى ايجون ديگرلرى ايجونده دوشونمش اولور . بو جهته
تفکرک قيمتى برقات دهآ آرتار. مثال ونمونه نك تاثير اجتماعيسى
بر چوق کرملر اثبات اولونمشدر . فقط سوزک قيمتى حقنده
سويلنان سوزلر بلکهده کافي دکلدرد . شبهه سز سوز (هومر)ک

تعبیر لطیفی وجهه او چوب کیدر. فقط اکثریتله روحلرده
براقدینی سیلنمز ایزلر طیراننده کی سرعتدن آزدکلدر. یازینک
بر شکل مادی ویردیکی سوزلره نه دییه جکز؟ مؤلفلری یوزلرجه،
بیکلرجه سنه اول اولمش کتابلر بزه حالا ایدیلن ایسک و فالفلری
حکایه ایدیور !

بناءً علیه، معلم طلبه سنه اپی و سربست دوشونمکی او کرتملی
وانسانک کرک کندی شخصته و کرک دیگرلرینه قارشو اولان
مسئولیتی لایقینه حس ایتمه لرینه چالیشمیلدر .

مملکتک افراد مستقبله سنه دوشونمکی او کرتمک اخلاقلری نه ده
تربیه ایتمکدر . زیرا دوشونمک ایشلمک صایلیر وبر انسانک
دوشونمکی شی اخلاقک بر نشانه سیدر . بوفونک « اسلوب
بیان عینیه انساندر . « سوزینه اعتراض ایدنلر وار . مع مافیه
نجه غایت طوغریدر . هیج اولمازسه مؤلفک صاحب اولق
ایستدیکی اخلاق و مسلکی کویسترر واکر او آدمک عزمنده
کافی درجه ده قدرت اولسه یدی حقیقه او اخلاق و شخصیه
مالک اولوردی .

اخلاق شخصک علامت مخصوصه سیدر . عادت حاله
کچمش اولان بوتون تمایلات طبیعیه نک محصله سیدر که اک قوی
بر استعدادک تحت تأثیرنده بولنه رق استقامت مخصوصه آلمشدر .
بوتون سوزلرنده و بوتون افعالنده آز چوق کنیدی کویسترر .
اخلاق قدر شخصدن شخصه دکیشن شی یوقدر . کرک جبلی

وڪرڪ ڪسي اولسون بر ڪره تشڪل ايتدڪدن صوڪره اخلاق
قدرده ثابت قالان برشي يوقدر .

مع مافيه هرڪس شخصيت صاحبي دڪلدر . بر طاقم ڪيمسه لر
واردر ڪه محيطلرينڪ تاثيرات مضيقه سي آلتنده قاله رق ، ابويني
طرفندن افساد ايديله رڪ شخصيتلريني غائب ايتمشلر اعتيادات سيئه ،
احتراسات مختلفه قز اتمشلردر . ايجابات احواله تابع اوله رق حرڪت
ايدرلر ، حريان حياتيه قاپيلوب سـ وروڪلنيرلر . ديڪر جهتدن
عزم صاحبي بعض ڪيمسه لرده واردر ڪه افڪار باطله لرينه ، منافع
واحتراصات خود ڪامانه ايه اسيردرلر ، ڪرڪ ڪندي وڪرڪ ديڪرلري
ايچون صوڪ درجه شاين اسف حرڪات مفرطه ايه قاپيليرلر .
تاريحڪ اسملريني ضبط و اجرا آت مشئومه لريني حڪايه ايتديڪي
حريص منفعتپرستلر بوجه دندر .

خلاصه انساني اشيا نڪ ، وياخود آرزجوق حيوانلا شمش
امثالنڪ آراسندن شڪل مخصوصيله آيرد ايدن شي وقتيله
رواقيونڪ اوقدر تجميل وئنا ايتدڪلري شدت عزم و ارادتدر ،
ڪه افعاله ، عقل وظيفه ايه موافق اوله رق بر وحدت آهنگدار
ويرر ؛ حياتي آريستونڪ ديدديڪي ڪبي حقيقي بر اثر صنعت قيلار .
ايسته مڪ ايچون سومڪ شرطدر . بر بديعه خياليه سي اولميان
شخصيت ومسلڪ صاحبي اوله ماز . (ره نان) نه ابي سويلشدر :
» انسانڪ دڪري ايزانديني وسوديڪي قدردر . «

بناء عليه انسان ايچون غايه ڪمال قوي بر ارادته ، منور بر

عقلی ، سلیم بروجدانی ، رقیق و عالیجناب بر حساسیتی جمع ایتمکدر .

ده موقراسی مربیلرینک طلبه لرنده بالخاصه قابلیت ذاتیه لرینه استناد ایدهرک بویوتملری لازم کلان بویوته بیه جکلری اوصاف ده بونلردر . عقلی نه صورتله تربیه ایدهرک بکلرینی اولجه سویلدک شمدی ده وجدان و قلبی نه وجهله تربیه ایدهرک بکلرینی کوره لم . وجدانک تربیه سی تدریسات اخلاقیه ایله اجرا ایدیلهر جکلر . برچوق زمانلر تدریسات اخلاقیه تدریسات دینه ایله برابر اجرا ایدلمش ، بونلرک یکدیگرندن آیریلی غیر قابل ظن اولونمشدر . مع مافیه بویکی درس آراسنه ضدیت القا ایتمکسزین یکدیگرندن آیریمق غایت عاقلانه بر مطالعه دن نشئت ایدر .

کرك اعمال و كرك اعتقاد جهتندن مخالف برچوق ادیان موجود اولدینی حالده نه دینورسه دینسون احکامی عمومیه شامل بر قانون اخلاق موجوددر . یک نظر ده منفعت و وظیفه مسلکلی بر برینه نه قدر ضد کور و نسه ده فعلیاتده برلشیر . سهولته آکلاشیله بیلرکه لایقیه تقدیر ایدیلان منفعت کافه احوالده وظیفه نی ایفا ایتمکدر و حسن اخلاق یعنی ناموسکارلاق وظیفه نك امر ایتدیکی شیئی منفعتی دوشونمکسزین وظیفه یه و کندی نفسنه حرمت ایدهرک ایفا ایتمکدر .

وظیفه ایسه انسانه عقلک استقلالنه و ارادتک مختاریته رعایت ایتمکدن باشقه نه امر ایدر . قانت حیات اخلاقیه نك قواعد اساسیه سنی

شایان حیرت بر صورتده ضبط ایلشدر : « شخصه حرمت ایت »
 — « کرک نفسنده و کرک آخرده انسانیتی مقدس طوت »
 — « شخص انسانیتی دائماً بر مقصد اوله رق تلقی ايله ، اصلا بر
 واسطه عد ايله » — « اوصورتله حرکت ایت که مسلک عموم
 ایچون شایان امتثال اولسون »

بواساسلر وضع ایدلدکن صوکره فضائل شخصیه واجتماعیه
 کمال سهولتله تعین ایده چیکی کبی فضائلک یکدیگریله مناسبات و
 درجاتی تأسیس ایتکده سهولت پیدا ایلر . کوریلور که بر آدم
 نفسنه قارشی ایفاسنه مجبور اولدینی شیئی یا مامله آخره غدر
 ایتیش اولور . چونکه کندنده خیری طانیق سومک و ایسته مک
 قوتی ضعفه دوچار اولمش دیمکدر . کذلک درین برحس تعاون
 و ائسای جنسنه قارشی منور ، فعال بر محبت صاحبی اولمق سزین
 عدالتک تمام اولیه جفی و حتی وجود بوله میه جفی ظاهر در .

ایشته بر صفت دینییه حائز اولمیان اخلاق تدریسی بویله
 اولمیدر . همان شونی ده علاوه ایده لم که اخلاقک دینی اولماسی
 دینی منکر بولونمسی دیمک دکدر . هر نه قدر مسائل مذهبییه
 حل ایتمز و حتی بومسائله هیچ یا ناشماز سه ده اهمیتنی وعین زمانده
 نزاکتنی تصدیق ایلر و شخصی بشره قارشی حرمت حسنی و
 عدم تعصبی تلقین ایده رک ابوینی مسئولیت کامله لری تحتنده
 چو جو قلیرنه ایستدکلری مذهبی تعلیم ایتک و یا ایتمکده تماماً
 مختار قیلار .

اخلاق دنیوی ادیان بینده کی و دهها طوغروسی بونلره
منسوبیتله تفاخرایدن کیمسه لر آره سنده کی مجادلات منفورده دن
کنج فکرلری وقایه ایلدیکی ایچون دینه ظن ایدلدیکندن زیاده
یاقلاشیر .

عقله مستند اخلاق قواعد واساسلرینی تعلیم ایتک پک
اعلادر ، فقط مزبیلره توجه ایدن وظیفه نك برقسمی تشکیل
ایلر . قلبره بوقواعدی اجرایه قابلیت ویرمک ، سودیرمک ده
لازمدر .

متقدمین خیرک یالکز نفع ایلهدکل بالخاصه حسن ایلده ده متحد
بولوندیغنی پک کوزل آکلامشلردی . انسانی فائده یی آرشدیروب
کوزللکدن ذوقیاب اولنه سوق ایدهرک نهایت خیره محبت
باغلاته جق تدریجی برتربیه تصور ایدرلردی . بو نقطه نظر دن
متاخرین یکی برشی سویله مامشلردر . آنجق فنک معاوتی سایه سنده
اسکی تصویره ده از یاده وضوح ویره بيلمشدر و بونی موقع فعله
قویق ایچون ده جوق وسائط الده ایده بيلمشلردر .

ابتدائی مکتبندن اعتباراً چوجوقلر طبیعت و صنعتده کی
کوزللکی بوتون اشکالیه طایفه و اوکا محبت و پرستش ایتمه
سوق ایدیله بیلیر . کرک اطرافده و کرک کندنده ترتیب و انتظامه
رعایت ذوقی چوجوغنی برچوق نقایصدن قورتاریر . تدریسات
فیه طبیعتده حکمفرما اولان ترتیبده کی کوزللکی کوسبتره رک
افعالی بو ترتیبه توفیق ایتک آرزوسنی آرتیرر . ذاتاً منفعتده

بو نظام طبيعی به توفیق حرکت ایتمکده در. والحاصل قانتک دیدیکی
کبی چو جو غک روحنده «باشلریمز اوزرنده بولونان قبه نجمداره
حیرت و حرمت» او یاندر دقندن صکره «قلبلمر مزده کی قانون
اخلاق ایچون» ده عین حسیاتی تلقین ایتمک او قدر کوچ بر
شیمیدر؟ بو نقطه نظرندن انافس آثار فکریه نك مطالعه سی و
تاریخ تحصیلی بویوک بر منفعت تأمین ایدر.

آز بر زمان اول برو تیه ر طرفندن فنک او قدر ولوله ایله
اعلان ایدیلن افلاسی مقام اعتراضده در میان ایدیه مز. زیرا
اول امرده شونی سویله لم که فن وظیفه اصلیه سنی ایفادن هیچ
بر وقت عاجز قالمشدر. بو وظیفه که دینه، مابعد الطبیعیاته
واخلاقه عائد خصوصاته اصلا مشغول اولمق سرین موجودات
و وقوعاتک (ناصل) و (یچون) نی آراشدر مقدر. استحصال
ایتدیکی نتایجی نظریات صورتنده عرض و بونلره اصلا بر قیمت
مطلقه اسناد ایتیه رک بشریتک ترقیات مادیه و معنویه سنه یارديم
ایدن تطبیقات عملیه ایله اکتفا ایلر.

دیگر جهتندن فنک اخلاق نقطه نظرندن افلاسنه ناصل
حکم اولنه بیلیر که انسان ایچون سعادت اخلاقه فنک بیلدیر مک
چالیشدینی خلقتیه و ترتیب طبیعییه موافق اوله ر ق نه اولمق لازمه
اونی اولمقدر. یالکیز شوراسی صحیحه رکه بعضاً ارباب فن ده
متافزیک علماسی آز چوق فرضی بعض نظریاته پک زیاده
اهمیت ویره رک بوندن مشکوک و بناء علیه مدهش بر طاقم نتایج

تطبیقه استخراج ایدر لر. نه کیم تکامل عمومی نظریه مقبوله سنی مجادله حیات قواعد اخلاقیه سنه اساس اتخاذ ایدرک سوء استعما لاتندن فنی مسئول ایدهمیه جگمز ایچون فنک ایفا ایتدیکی خدمت کندینه خاض دائره داخلنده منحصر قالدینی تقدیرده بیه حائر اوله جفی قیمت اخلاقیه بی تعلیم ایتک ایجاب ایدر .

فی الحقیقه انسانک ماهیت ذاتیه سنی وواصل اوله بیه جکی مرتبه کمالی آکلامق وعلی التوالی الک ناموسکارانه یعنی شخصی بشره حرمت اساسنه الک موافق حرکت هانکیسی اولدیفنی تعیین ایتک ایچون کندی کندینه دوشونمهی کافی ایهده تسلیم ایتلیدرکه بوخط حرکتک فنک فیض وانواریه استناد ایتکسزین سلامتله تعیین ایدیله مز .

دیگر جهتدن (فکر علمی) بالضروره اخلاقی دکلیدر ؟ حریت تفکر حقنده تربیه بخشنده سویلدکلریمز بونی اثباته کافیدر. زیرا فکرک استقلال بوتون عظمتی، لطافت وفائده سیله انجق عالمرده تجلی ایدر ، شبهه سزدر .

بناءً علیه فنک افلاسندن بحث ایتکه لزوم قالماز . فنک وجدان بشر ایچون الزم برمعاون اولدیغنه قیمت اخلاقیه سنه اولان اعتماد محقمزی اخلال ایده جک برسب متصور دکلدرد . فقط شخصیت اوزرینه مؤسس اولان بو اخلاق قیمتیه نه اوله بیلیر ؟ قوای تأییدیه سی نه در ؟ فعلیاتده بوکا مدار استناد اوله جق امیدلر نه کبی شیلردر ؟ دیه رک دیگر براعتراض درمیان

اولنه بیلیرسه ده بوکا جواب ویرمک قولایدر .
 اشیانک مبدأ و عاقبتی خصوصنده الکی غیر مساعد نظریاتدن
 اولان مادیون و شکیون نظریاتنه کوره دخی بو اخلاق بویوک
 بر قیمتی حائر در .

فکر و شخصیتک بر عالم هرج و مرجده ظهوره کلن بر طاقم
 حادثاتدن عبارت اولدینی و شمشک کبی دهشت و ظلمتی بر آن
 تنویر ایدرهک غائب اوله جنی طوغری اولسه بیله حرمت
 و ترجمه سز اوار اولما ماسی اقتضا ایتمز . بوندن باشقه بو نظریه یه
 کوره آتی یه نفوذ ممکن اولمادیغندن کار عاقل حیات مدرکه دن
 ممکن اولدینی قدر استفاده ایتمکدرکه بوده انجق دنیاده چکیلن
 محن و آلامک مجاهدات خالصانه ایله تنقیص و تخفیفنه چالیشمقله
 قابل اولور .

فقط برکت ویرسون بو نظریه حقیقت و عاقبت اشیاءوزرینه
 یاپلمسی ممکن اولان تک بر نظریه دکلدیر . ده ا معقول نظریات
 موجوددر .

فن ایلر ولدیکجه عقلک کندینه اولان اعتماد طبعیسی برقات
 ده ا آرتار . تحریرات فیه اساساً موجودات و وقوعاتدن طبعیتک
 پالانی کشف و استخراج دیمکدر . تطبیقات فیه ایسه اوله جق
 شیء اولدن کورمکدر . ایمدی ایکی جهتمده دخی علم اقرضیه لرینک ،
 استدلالاتنک اکثریتله صحتنی مشاهده ایتمکده در . بوندن تفکره
 رهبر اولان عقل ایله طبعی اداره ایدنک اساساً عین شیء اولدینی

حقیقی استخراج ایدله بیلیر .

فقط بو حالده وجدان ، فکر ، شخصیت کائناتده کلوب
کچیجی برتصادف دکل بلکه اشیانک تکامل منتظمینک نتیجه سیدر .
وبونلرک غائب اولوب کیده جکندن قورقوله جق یرده کیتدجکه
توسع وتتمو ایدرک تکامل عمومی به دائما آرتان بروقوف وقوتله
یاردیم ایدم جکنه اطمئن حاصل ایتک لازم کلیر . آریستو
وقتیله « کائنات فکره متوجهدر . » دیمشدی . متأخرینک
آریستوسی صاییلان هربرت سپنسرکده عین نتیجه واصل
اولدینی کورولمکدهدر .

بوندن بالسهوله دیگر بر فرضیه استنتاج اولنه بیلیر ومنطقاً
استنتاج ایدلملیدرده : اکر کائنات فکره متوجه ایسه مبدأده
کنندینه تماماً متصرف بر فکرک وجودی لازم کلزمی؟ آریستو
بونو تعلیم ایدردی . هر وجود متفکرک عدالت ، حقیقت
وحسن وخیره اشتیاقنی تسکین ایچون حیات دینویه حدودی
خارجنده ده موجودیت شخصیته نک دوام ایدم جکندن امید
وار اولسی ایجاب ایلزمی؟ سوقراطدن (له پینیچ) و (له پینیچ) دن
(قانت) ه قدر الک بیوک مابعد الطبیعیات علماسنک قناعت
قویه لری بومرکزده ایدلی .

کورولیورکه اخلاق دنیوی هیچ برکیمسه ایچون موجب
اندیشه دکلدر . شخصی بشری ، رضاسی خلافتنه اوله رق برطاقم
اساسلره ، قواعد واعتقاداته اسیر ایدرک ، تحقیر ایتکه قالدیشان

مسالکدن باشقه سیله نزاعی یوقدر . بناءً علیه انسانلری تفرقه یه
 اوغراته جق یر ده آراالنده کی سوء تفهیماتی ازاله ایله حرمت
 متقابله وحسن معاشرتده جمع ایلر :

بشنجی فصل

نریهٔ اجتماعی — نماره

مقدما حیات اجتماعی مدنی و سیاسی دیه صورت قطمیه ده ایکی قسمه آیریلیردی. فعالیت سیاسییه برهوسه ویاخود احوال مخصوصه نك ایجاباتنه تبعاً اجرا اولنه رق افراد قلیله یه منحصر قالیر؛ انسانلرک قسم اعظمی قوای عمومیه یه وضع یدایدنلرک نظارتی آلتنده حیات مدنیهلرینی امرار ایله اکتفا ایدرلردی. بر آدم انی بر زوج وانی بر پدر اولور، کیمسه یه ایلشمیوب قانونه اطاعت ایلر، ویرکولرینی کوزلجه تأدیه ایلرسه انی بر مملکت آدمی عد اولنوردی.

بو کون ایسه بویله بر تفریق نه حقوقاً ونه ده فعلاً لزوم واردر. زیرا معاملات خصوصیه ایله معاملات عمومیه صیقی صیقی یکدیگرینه باغلانیدی پی ظاهر در. اک خصوصی بردائره داخلنده فردک ایشلیدیکی شیلرک هبسی بر قیمت اجتماعی یی حائزدر. فعالیت سیاسی نك غایه سی شبهه سز حیات خصوصیه ومدنی یی مادهٔ ومعناً تسهیل واصلاح ایتکدر. بناءً علیه دینه بیلورکه صرف دنیوی بر نقطهٔ نظر دن اخلاق اجتماعینک اک اساسلی نقطه سی تعاوندر.

معاونت متقابله یی تأمین ایدن مؤسسات وجمعیاتک کیندکجه چوغالمقده اولیدی پی شو عصرده فکر تعاونک انسانلر بیننده کی

مناسبات جدیدہی ارانہ ایدن یکی بر مفہوم اخلاقی اولدینی کورلمکده در .

مع مافیہ اخلاق وافکار جدیدہی قیمتدن دوشورمکہ چالیشانلر تعبیراتہ اعتراض، ومعنا ایله استہزا ایتکده پک غیرتلی طاورانیورلر . حریت ، مساوت ، اخوت اساسلریله برابر تعاونی دہ کمال غیرتله تنقیدہ قویولیورلر . اونلرہ اینانیرسہق بوکلہلر ہپ بوشدر، معنالنری پک مبہم ویاخود روحسز برطاقم مجرداتدن عبارتدر . (حب غیر — Altruisme) تعبیریله برابر بوتون بونلر شو کوزل مرحمت کلہسنک یرینہ قونق ایستہ نیورمش . مرحمت روح وقلب ایچون نہ قدر مونس ومعنیدار برکلہدر؛ فقط منشأ و اوصافی عیسوی اولدینی ایچون ایدیلیر دیرلر .

حال بوکہ تعاون کلہسی مبہم دکلدر . غایت واضح وکوزل بر معناسی وارد ؟ بز بوکا قانعز . افادہ ایتدیکی فکر وحس صرف یکی ودنیویدر . بیانات آتیہ مز بونی اثبات ایدر . « مرحمتی آنجق خرستیانلق آکلامشدر . بونی ایلک تطبیق ایدن وبوکون دہ مرحمتہ حقیلہ واقف اولان آنجق خرستیانلقدر . » ادعاسنی چوق کرہ ایشیدیورز .

بلا اعتراض بویله بر فکری قبول ایتک قرون قدیمہ نک مشاہیر متفکرینی تحقیر دیمک اولدینی کبی غیر عیسوی بو قدر اقوامک تاریخی دہ انکاردر . یالکز سوراقطہ باقلم بودات فلسفہ

یونانیه نك تمثالی دیمکدر : عادل اولمغه برابر کر مکار اولمق ده لازم کلدیکی ، فنالره آجیمقی ایجاب ایتدیکنی ، فنالغه اییلکله مقابله ایتکی سقراط آچیقدن آچیه سویله میورمی ؟ مارق اورلک ، او حکمدار حکیمك آثارنده خرستیانلغک مرحمت قواعدینه مائل دساتیر بولیورمی یز ؟ فی الحقیقه رومانک دور انقراضنده ، وحشت عصرلری ائساننده خرستیانلق انسانلرک مساوات واخوتی ، قویله ضعیفلری کوزتمکی ، زنکینلره ققرايه یارديم ایتکی وعظ ایتدی ؛ بیچارکانک حیثیت اخلاقیه سنی یوکسلمکه اوغراشدی ؛ مؤسسات و آثار خیریه یی چوغلانیدی . فرانسا داسیز ، و نسان دونول کبی برچوق خرستیانلر فلاکتزده و بدبختلره اولان صفوت و فرط محبتلریله قهرمانلق درجه سنه واردیلر . کندیلریله برابر بر طاقم همجنسارینی ده او مرتبه یه چیقاردیلر . فقط شوده صحیحدرکه خرستیانلرک اکثریتیه نظراً بوکزیده آدملرک مقداری پک محدود قالیر . اکثریت بدبخت قرداشلری ایچون انحق فضله ماللرندن مادی اوافق بر فداکارلقده بولمغه اکتفا ایدیوردی . بو فداکارلنی ده بخیل زنکینلرک معروض قالدینی تحقیر وتهدیددن قورتولمق و یاخود دنیاده ویریلان بر بارداق صویه مقابل آخرتده وعد ایدیلان یوز مثلنی قزانمق ایچون اجرا ایدرلردی .

عمومیت اعتباریله خرستیانلق مرحمتنک بویله محدود وعادی بر طرزده اولمדיغنی فرض ایدوبده انجیلک کماله واصل

اولی ایستہ یان انسانلرہ کو ستردیکی دساتیر واسعہ یہ توفیقاً اجرا ایدلایکنی قبول ایتسہک بیلہ ، خصمکارانہ بر مقصد تنقید بسلہ مدیکمز حالہ ، خرسٹیانلقده کی مرحمت مفہومنک عدم کفایتنی سویلکدن چکنمیز۔ چونکہ انسانک ماہیت حقیقیہ سی وواصل اولہ بیلہ جکی مرتبہ کمال حقندہ بوکون بیلنان شیلردہ دہا علویت واردر .

خرستیانلغک مرحمت دستوری معلومدر . « جناب حق ہر شیدن زیادہ وقومشوکرزی اللہ عشقی ایچون کندیکز قدر سویکزر.» فقط جناب حقہ محبت ایدلمز ویاخود خرسٹیانلغک قبول ایتدیکی طرزہ تصور ایدیلوب سویلر سہ و باخصوص اگر جناب حقہ اعتقاد ایدلمز سہ بی نوعنی سومک و اونلرہ ایلیک ایتکی ایستہ مک قابل اولیسہ جقمی ؟ بو حالہ مرحمت قالمز می ؟ خرسٹیانلر بوکا معتقددر لر۔ فقط حکما بونی رداید ر۔ دیگر دین دیگر مذهب اولماسہ دہ مرحمت و محبت مذہبی باقی قالیر دیر لر۔ فعلادہ بو ثابت دکلیدر ؟ مادیوندن دینن آدملرک اکثریتلہ اونودلماز فدا کارلق نمونہ لری ابراز ایتسکلرینی کور میور می یز ؟ بو آدملر نہ دنیا دہ ونہ دہ عقبادہ بوحرکتلرینہ بر مکافات بکلہ مز لر .

فقط ہمجنس مزہ محبتدن باخصوص مرحمتدن اول ایفاسنہ مجبور اولدیغمز برشی وار سہ اودہ عدالتدر۔ شبہ سز خرسٹیانلق

فقرک ، معلولیت وضعفک شایان حرمت اولدینی اعلان ایتدی .
فقط بوسبوتون باشقه بر نقطه نظر دن . بدبختلر حضرت عیسانک
محتشکشلکنی ارانه ایدر عداولنیوردی . بو محنت واضطرابک
مدح و ثنایسی سفالت و مسکنتک خوش کورلمسی ، قبول ایدلمسی
نتیجه سنی ویریوردی . بوندن باشقه حیات دنیویه نک حیات
اخرویه یاننده هیج بر اهمیتی اولمدینی وجنتک اذواقنه نائلیت
ایچون بر امتحاندن عبارت بولندینی دخی عقائد خرستیانییه
جمله سندن دکلیدر ؟ بویله اولنجه فقر دن ، المدن ، سفلیتدن
قاچه حق یرده بونلری کمال تهالکله آرامق لازم کلیر . نتیجه
منطقیه بودر . قتولیک کلیساسنک مقدس ذوات میاننه کچیرمک
لزومنی حس ایتدیکی (به نوادولابر) کبی بعض کیمسه لر منطقاً
اولدینی کبی فعلاً ده بو نتیجه یه واصل اولمشلردر .

برکت ویرسون بویله لری مستثنا قییلدن . پک آز کیمسه لر
بودرجه یه وارده بیلمشلردر . قواعد اخلاقیه نک شدتیله ، نفس
و قلبک ضعفی بیننده بر واسطه ائتلاف بولقده امشکلات چکیلماش
اکثریت اعتبار یله مرحمت خرستیانییه محقرانه دکلمه بیله هر حالده
لاقیدانه ویریلان و ذلتله النان بر اعانه مادیه دن عبارت قالمشدر .
مرحمتک بوصورتله تصور ایدلمی قتولیک ، پروتستان اقوام
خرستیانییه یی بویوک بر مصیبه کرفتار ایتمش بر قسم خلقی بر
سفالت دائمه یه کرفتار ایلشدر . بو اساساً معاونت و خیرک تقدیر

ایدلماه سندن وکړک عمومی وکړک خصوصی اولسون حسن صورتله عدم اجرا سندن ایلر وکله در .

فضله شینه مالک اولانلر بونک بر قسمنی البته محتاج اولانلره ویرمسیدر . فقط تصدق ایدن بر صاحب قلب نه حس ایدر ؟ نائل اولدینی وشو فعلیه اثرینی کوستردیکی رفاه مایدن مضطرب اولمازمی ؟ معاونت ایتدیکی آدمده کوردیکی ویا تخمین ایتدیکی مزلندن هیئت بشریه نلک آلا دینفی کوره رک متأثر اولمازمی ؟ تشکر ایدن نظر و طورده عنایتک متضمن اولدینی تحقیره مقابل طونوق بر علامت غیض کورمزمی ؟ بر طاقلری محروم ایکن کنیدیسی مستفید اولدینی ایچون ولو غیر اختیاری اولسون مدخلی بولنان بر نوع اجتماعی حقسزاق موجود اولدیننک فرقنه و ارمازمی ؟ ای تنظیم ایدیه جک بر جمعیتده فقیر قالمیه جنی و عاجزلر لکده حقلری اولان معاونته هیئت شخیصیه لرندن هیچ بر شی فدا ایتمکسزین مظهر اوله حقلرینی آکلامازمی ؟ انسانیتی بوغایه خیالیسه طوغری ایلرولتمک وظیفه مقاومتسوزینی حس ایتزمی ؟ بو صورتله مرحمتله دکل ، تعاون حسیله ملهم اولمش دیمکدر .

بک اعلا . تعاون نه در ؟

اجسام عضویه نلک اقسامی بیننده بر ارتباط مخصوصی وارددر . اعضانک کافه عناصری و بوتون اعضاده وجودک تنم و محافظه سنه معاونت و اشتراک ایدر . وظائف عضویه نلک بر مقصد مشترک بو معاونتی ، بو آهنگ ، جسمه محیطک تاثیرات مخربه سنه مقاومت

ایچون بویوک بر قوت بخش ایدر . اوصورتله که بر وجود ذی حیات بر جسم جامد دن دها قوی ، بر صولوجان بر غرایت پارچه سندن دها طیانقلیدر .

اپی زماندن بری انسان جمعیتلری عضو یاته تشبیه اولونمقده در . اکثریتله افراطه واردیر لان مقایساته کیریشمکسزین بو تشبیه طوغری دینه بیلیر . جماعات بشرک تاریخنده زمره حیوانیده کورولن آهنگ عضوی به ممائل بر تکامل مشهوددر .

ابتدالری کلوب کچی مقاصدی تعقیب ایچون واکزیت اوزره حیات عضویه نك محافظه سی یولنده ساده جه یان یانه کله رک موقت و دوامسز هیئتلر تشکیل ایدن افراد بشریه بیننده حیات اجتماعیه نك چوغالتوب اینجلندیکی هر نوع احتیاجاتك دفع و استحصالی ایچون آن بان ارتباط / آرتمشدر . اودر جه ده که بر آدم مدنی بر محیطده بویویوب تربیه ایسه جمعیتك خارجنده بحق یاشامغه موفق اوله ماز . بو ارتباط یالکزر بر زمانده وعین خطه ده یاشایوب طوغریدن طوغری به مناسبته بولونان انسانلره منحصر قالمایوب هر نسل بطون سالفه نك دوشونوب حصوله کتیردیکی ایله یاشار و بطون مستقبله نك حیاتی احضار ایدر . انسانیت ایلر ولدکجه « بنی آدم اعضای یکدیگرند » حکمتی دها وضوحه عیان اولمقده در .

انسانك همجنسیله برلشوب مساعی سندن بر قسمی منفعت عمومی به حصر ایتمه سنی یالکزر منفعتی ایجاب ایتمز ، بلکه موجودیتی

مقتضیاتندن اولان بر احتیاج شدیدایله وحب غیر دنیلن سومک، سویلک احتیاجی ایله بوکامل ایدر . حب غیر انائیمک بر شکل مخصوصیدر . حتی اک فداکارانه افعالده بیله مشوقینه انسانک نفسنه محبتیدر دنیلیر ووروشفو قولدک ادعاسنی تکرار ایتمش اولور لر . بومطالعه آنجق قسماً طوغریدر .

شبهه سز باشقه لرینی سوه بیلیمک ایچون اول امرده نفسنی سومک لازمدر . فقط مناسبات اجتماعیه نقطه نظرندن بر برندن فرقلی وحتی طبان طبانه ضد ایکی شکلی واردر . بری ذوق و منفعت شخصیه سی ایچون دیکر لرینی آلت اتخاذایدوب بوندن طولانی بوحرکتک ویره چکی نیجه یی اونلرک ولو موجب فلاکتی اولسون هیچ دوشونماکدر . اصل خودیینلک بودر . دیکری کندی ایچون بر مضرت و محرومیتی موجب اولسه ده همجنسینه اییلک و خدمت ایتمکدن ذوق آلمق ، مسعود اولمقدر . بوده حب غیر ، ایسترسه کز مرحمت دیک .

شبهه سز فداکارلقده بولونان بر آدم مقابلمنده بر ذوق مخصوص طویار . فقط بوذوقی طویه جق حاله کلک ایچون نفسنه قارشی مجادله ده بولمق و سومک ، سویلک احتیاجنک خودیینلک تمایلاتنه غلبه سنی تأمین ایتمک ایجاب ایدر .

خلاصه شو اوصافی کوستردیکمز حب غیروحب نفسک ایکسی ده عمومیتله کندندن خبردار اولان موجوداتک وبالخاصه انسانک طبیعتندن آریلاز . ابتدائی حسیاتدن معدو اولقله برابر

جمعیات بشریه نك اوائلنده وكذا بوكون دخی حیات شخصییه نك
ابتدالرنده اك زیاده ظاهر اولان خود بینك دركه رقابت حیاتییه
مجادلاتنی تحریك وتشدید ایدره رك ضعیف لری دائماً قویلرك منفعتنه
آلت ایتمشدر . كیت كیده منفعتك لایقیله تقدیری وتجارب حیات
انسانلره مساعدات متقابله ده ویکدیكره خدمت وحسن معامله ده
بولغنی اوكرتدی . بوالفت ومناسبات سایه سنده سومك و
سودیرمكده کی حالات آكلاشیله زق نتایجندن صرف نظر
کندیلكندن بر قیمت مخصوصه یی حائر اولدیغنی تظاهر ایتدی .
بوندن ذوقیاب اولق ایچون بویوك فداكارلقدرده بولغنی قابلیتی
حاصل اولدی . بر احتیاج حالنده باشلایان بو حس بالآخره
سوق طبعی شكلنی آله رق انسانلری حصوله كتیره جکی ذوقی
بیاه نظر دفته آلمق سزین فداكارلقده بولونمغه سوق ایتكده در .
فقط بوتكامل ، بوترقی دواملی مجاهدات نتیجه سیدر ؛ زیرا
جبلیتده خود بینك زائل اولماز وحتى بعضاً عصیان ایدر .
او كا غلبه ایتك كه عمومیتله فداكارانه حرکاته قارشى اظهار
ایدیلن حیرت وتقديره بحقی سزا بویوك بر عزم و متانته متوقفدر .
اخلاق وتأسیسات اجتماعیه نك کسب صلاح ایتمه سنده حب
غیرك ترقیاتی بویوك بر تأثیری حائر در . زیرا انسان هیئتلرنك
تشكلنی ایجاب ایدن اك باشلی شیك منفعت اولدیغنی اونو تاملی یز .
جمعیت حالنده یاشایان انسانلر بیننده مادی وشخصی مساوت سزلق
سرعتله تأسس ایتمش واك قوتلی اولانلر امتیازاتی تأمین

و محافظه ایچون قانونلر وضع ایله بونلره مصون و مقدس حقوق نام و شکلی ویرمشلردر . خیرات ، قویلرک عاجزلره ویردیکی برنوع تضمینات ایدی . او واسطه ایله عاجزلرده بالمقابله اصحاب امتیازدن جبر منفعت ایدیورلردی دینه بیلور .

فقط یواش یواش فن و فلسفه ایلرولیه رک حریت فکریه ترقی ایدیور . علما انسانک حیثیت اخلاقیه سنی دهایی آکلایه برق اطرافنده کیلرده آکلاتیوردی ؛ نهایت انسانلرک مساوات طبیعیه و معنویه سی اعلان ایدلدی . بومساوات مخلوقاتک عبودیتده مشترک اولسی اساسی اوزینه دکل بلکه عقل ، ارادت و شخصیتده مشترک اولسی اساسی اوزرینه تأسیس ایدیلیوردی . و حقوق قانونیه بی حقوق طبیعیه نامنه مواخذه و محاکمه ایدرک طالع و نسبک الجآت و تصادفاتنه استنادایدن هر نوع امتیازاته اعتراض ایله هرکسک قانون نظرنده مساوی اولماسنی ادعا ایلیرلردی . بوفلسفه درس لرینک یالکزر عوام و صنف متوسطده دکل صنوف ممتازهنک ایلری کلنلری طرفندن بیله ناصل حسن قبوله مظهر ولدینی معلومدر . ژان ژاق روسونک مساواتسزلق حقنده کی نطقی ، مقاولهء اجتماعیه سی بو صولک اثرک نشرندن اوتوزسنه صوکره فرانسه ده دوشون بوتون آدملرک عادتاً دعا کتابی حالنی آلمشدی . عقله و حقوق طبیعیه یه مغایر امتیازاتک لغوی ایچون حب غیرک خود پرستلکه غلبه سی منظره علویه سنی ۴ آغستوس کیجه سی بارلاق بر صورتده کوسترمشدر .

۱۷۸۹ انقلابنك وقوعاتی ورجالی حقمنده نه دینورسه
 دنیلسون بوسایه ده انسانیتك ایلری به طوغری برآدیم آتدیغنی،
 اسکی دورایله ازمنه جدیده آره سنده درین برخندق قازیلدیغنی
 وبونك کیتدکجه کنیشنلوب درینلشهرک ماضی به عودتک امکان
 خارجنه چیقیدیغنی، بوانقلابك اشدتلی معارضلری بیه نصدیق
 ایتبه کرکدر. حقوق بشر بیاننامه سنك تطبیقاتیله بر ملتك
 افرادی تبه لقندن چیقارمق **Citoyen** - وطنداش صفتنی
 اکتساب ایتدی. قوه سیاسیه آرتق برقاچ کشینك ویا بر آدمك
 مالی اولمقندن چیقارق عامه طرفندن بعض کیمسه لره تودیغ
 ایدیلن بروکالت حالی آلدی. بو حقیقتی آکلایه میانلر تجربه ایله
 جبراً وبعض کرده قهرراً اوکر نمکه مجبور اولدیلر. بو کون
 اسکی اصولك اشدلی طرفدارلری بیه حاکمیت مطلقه نظریه
 سنك مدافعی اولدقلرینی آچیقندن آچینه سویله مکجه جسارت
 ایده میورلر.

اقوام جدیده متمدنه نك تأسیسات سیاسیه سی ید واحد
 ایله اداره اولندقلری حالده بیه اساساً عوامپرور اولدیغنی ودائماً
 بویه اولمغه سعی ایتدیکنی سویلشدك. بوتون انسانلرک سعادتنی
 امر مشترکنه چالیشمق ایچون کافه اقوامك عقد ائتلاف
 ایله برصلح عمومی وجوده کتیره جکلری کونك یا قلاشدیغنی ده
 کیتدکجه ظاهر اولمقده در.

اخلاق وتأسیسات اجتماعیه ده وجوده کلن بو تکامل

افکارده دخی تکامل حصوله کتیره رک اخلاقک یکی بر استقامت
 آلمسی موجب اولمش و بویوک آلمان حکیمی امانوئل قانت بویکی
 اخلاقک قواعدینی ضبط و تدوین الکی در عهده ایتشدر . بوندن
 بویله وظیفه او امر مختلفه دینیه خرسیانیه به کور کورینه اطاعتدن
 عبارت دکلدرد . وظیفه نک اساسیه حقک اساسی برلشدی . ایکسی ده
 شخصی بشرک قیمت و مزیتنه مستندر . و هر انسانه ای یی
 کوتویی تفریق ایچون کندی کندینه دوشونمکی توصیه ایتلیدر .
 او هائی ، حس منفعت و احتراصاتی تسکین ایدنجه هر کس
 محکمه وجداننده دها طوغریسی و یردیکی حکم لرده یا کیلمیان
 بر حاکم بوله بیلیر . « وجدان اخلاقی دیرکه : سن بر شخصسک
 یعنی عاقل و حر بر موجودسک . عقل و اختیاردن محروم بر
 وجود کی حرکت ایتمکدن صاقینمق ، ذکا کی تنویر ، محبتی
 تزئید ایدمک ، عزمنه متانت و یره جک شیلری ایفا ایتمک
 نفسنه قارشی بور جکدر . »

انسان کندی نفسنده شخصیه حرمت ایتمکه مجبور اولدینی
 کی دیگر لرینه قارشی ده بونکله مکلفدر . عقل و اراد تنسندن
 بر درجه به قدر واز کچه رک نفسنه قارشی اولان وظیفه سنی آفاق
 آلتنه آلدیجه .

بوصورتله ظاهر اولورکه اک باشلی و مقدم وظیفه اجتماعیه
 ایی اولمق دکل عادل اولمقدرد . و عادل اولمق ایچون وجدانده
 یازیلی اولان قانون طبعینک دائما عادل بر تقلیدندن عبارت

اولان قوانین موضوعه به رعایت کفایت ایتمز ؛ اخلاقاً سبب کافی بولنمدینی حالده آخرک حیثیت بشریه سنی تحقیر ایده جک حرکت وانکشافنه ولوبک جزئی مانع اوله جق هر درلو افعال وحرکاتدن توقی ایتمک لازمدر .

فقط دهاسی وار . تعاونی دهاسی صحیح ومکمل اوله رق آکلایهلم . فی الحقیقه حرمت یالکز اجتنابی ایجاب ایتمز . بلکه یایمنی دهاسی زیاده مقتضیدر . هرکس دیکر لرینه قارشی وظیفه سنی بوصورتله تلقی ایدنجه معاملات عمومک ترقیاتنه خادم بر شکل آلیر . اووقت دیکر لرک حقوقنه رعایت ایدلمسی وقابلیتک کمال سربستی ایله انکشافی ایچون مظهر معاونت اولسی هر کسجه اهمیت مخصوصه ایله تلقی ایدیلیر . طوغریدن طوغری به ویا طولایسیله آخرک شخصیتنه تعرض ایتماکله اکتفا ایدرسک عادل بر آدم صاییه مایز . ودستور قدیمه کوره همجنسمزه بورجلی اولدیغمز شیء ادا ایتمش اولمایز . بلکه اوکا حقوقنی ادعا ومدافعه کندی حقوقمزی ادعا ومدافعه ایدرجه سنه مظاهرت ایتمک لازمدر . خلاصه هرکسک دیکر لری ایچون چالیشمسی ومقابله ده عین معاونت مظهر اولسی بوتون معاملات اجتماعیه مز ایچون قاعده اتخاذا ایدلملیدر .

بوصورتله دوشونجه عدالتک مرحمته ، حرمتک محبتنه انقلاب ایده جکی آشکاردر . فقط صرف حسدن عبارت بر مرحمت تصدق شککنده وهر حالده ویرن ایله آلانک عزت نفسنی جریحه دار

ایده جک بر خیر دکلدر . بو ، دو قونديغنی تصیفه و اعلا ایده رک صفوت بولان و یوکسلن بر محبتدر . ، قلبک ایصتدینی و فکرک تنویر ایتدیکی بر عدالتدرکه ایی قلبی آدمیری وظیفه لرینی تماماً اجرا ایده مامک قورقوسی ایله وظیفه لرندن فضله سنی یاغنه سوق ایدر .

وظائف اجتماعیه نك بو طرز تلقیسندده هیج بریکالک یوقدر دیمکه جسارت ایدیه بیلیرمی ؟ منشئی ، اوصاف و نتایجی نظر دقته آلتیجه بوکایکی بر نام و یرمک لزومی تصدیق ایدلزمی ؟ بو حالدده تعاون تعبیرندن دهاموافق بولنه ماز . بوکله همجنسمزه قارشیکافه وظائفمزی خلاصه ایدر . و هرکسک دیگر لر ایله و دیگر ایچون چالیشمسی لازم کلدیکنی و انسانلرک کیتدکجه برو عین وجودک و یاخود عینی عائله نك یعنی انسانیتک اعضای حالی آلمقده اولدیغنی کوسترر .

کوریلیرورکه تعاون مرحمت و خیره مغایر دکلدر ، حتی اوندن باشقه برشی . دکلدر . یالکز دهامواسع و دهادرین . قرون قدیمه و متوسطه ده هر نه قدر حس ایدلش ایسه ده آنجق ازمئه جدیدده فیضلنمشدر . حرکت مزی ایجاباته توفیق ایتدیکمز حالدده غایت مبذول ثمرات اقتطاف ایدیه جکنه شبه اولماز .

یوقاریده ده سویلیدی کمز وجهله تعاون (حریت ، عدالت ، مساوات) اساسلرینی اکمال ایدر . فی الحقیقه آده قیمت معنویه و یرن هرشیدن اول ارادتنده کی حریتدر . انسان اشیایی آکلامق

وايضاح ايتك ايستهديكي ايچون عقلی ادمان ايدر ؛ بعده افعاله عقلنك و وجداننك اشعاراتنه توفيقاً بر انتظام ويرر . بونككه جماداتن حتى الكذكي حيوانانندن عالی وكندي كبی صاحب ارادت همجنس لریله مساوی اولديغنه قناعت كتيرر . بنساء عليه بوتون انسانلرك مساوات طبعیه و معنویه سنی حقوق اساسیه لرینك و دهاز ياده وظائف متقابله لرینك مساواتی ايجاب ابدن شی حریتدر . فقط انسانلرك معناً حر و مساوی اولسی کافی دكلدر : سربست حرکت ایده بيلمه لری و نظام اجتماعینك بخش و توسيع ايتديكي وسائط فعلیه يي تملك و استعمال خصوصنده دخی بر مساوات موضوعیه مظهریتلری اقتضا ايدر . بو ايسه اخوت اولقسزین ممکن اوله بيليرمی ؟ هر كسك قدرتی كندی اسباب قدرتنه وابسته قاليرسه بوتون آمال و مطالبك بوش و عقيم برر خلیا شكلی آلمسی ضروریدر .

بو حالده انجق بر قاچ صاحب امتیاز اکثریت عظیمه ايچون غیر قابل مرور بر دائرة محدوده ايچنده ادعای مساوات ایده بيليردی . فقط اخوت سایه سنده قویلر اکتساب حریت ايچون ضعیفله ظهير اولور ، مادی و معنوی هر نه صورته اولورسه اولسون بر تفوق احراز ايدنلر ديكر لرینی ده بو مرتبه يه چيقاروب يوكسلمك ايچون يارديم ايدرده تعاون بو صورته تمام اولور . بنساء على ذلك حس و فكر تعاون صاحبي اولمق يالكز انسانلرك بر برینه محتاج اولديغنی آكلامق دكلدر . بلکه انسانك همجنسنه

حیاتی بورجلی اولدیفنی بیلیمک وحس ایلمکدر . هر نه صورتله اولورسه اولسون بر رحمان وتفوق احراز ایتک دیکر لرینی سومک واونلره ممکن اولان ایلمکی ایفا ایتک وظیفه سنه بر شکل قطعیت ویرمکدن باشقه بر شیشه خادم اوله ماز . ذاتاً باشقه درلو ناصل اوله بیلیر ؟ بردها تکرار ایده لم که هر شخصک حیات مادیه ومعنویه سی انجق برابر یاشادیفنی آدم لک وکندندن اول کلن لک مظاهریله دائمدر . دیکر لرینه لندن کلن ایلمکی یامامق اک بویوک نانکور لک واک آجیق حقسنز لقدر . فقط تعاونی ناصل اجرا ایتلی ؟

بر لاتین شاعرینک شوقیمتدار مصراعنی اولجه سويلشدک :

Homo sum humani nihil a me alienum puto .

« بن انسانم ؛ ایسترم که انسانلره تعلق ایدن هیچ برشی بکا یبانی قالماسون » اک عادی تفصیلاته وانجه یه قدر تاریخله و بالخاصه زمانمزده بکن شیرله علاقه دار اولماز لزومی بوندن ایی افاده اولنه ماز

حقیقه بعضاً اک عادی وقوعات والیتسه حادثات مهمه عالم مدنیته نه درین انعکاسلر حاصل ایدیور . هر طرفدن رنجیده اولان وازیلنلره ترحم ومخالصت واحمقلره غیض ونفرت یاغیور . فقط آجیمق کفایت ایتز فعلیات کک .

تعاون نامنه ایجاب ایدر که اصحاب علم اطرافه نشر عرفان ایتسون ؛ قوت صاحبی اولانلر بونی ضعیفلرک آزادیسی ایچون

صرف ایلسون . ثروت صاحبی اولان کیمسه لر فضله لرینک
 بویوک بر قسمی عقیم و حتی اکثریت اوزره مضر تصدقاته ذکل
 معاونت متقابله اساسی اوزرینه مؤسس یعنی فقیرلره ذلت حس
 ایتمکسزین سفالتدن قورتولوق چاره سنی و معناً آلمالان ماده
 یوکسلمک و سائطنی احضار ایده جک آثار وجوده کتبرمکه وقف
 ایتسون . تعاونک بوصورتله آکلاشیلوب تطبیق ایدلمکده
 اولدینی عوامه مخصوص دارالفنونلرک ، سندیه لرک ، تحصیل
 قلوبلرینک ، معاونت متقابله جمعیتلرینک ودها نیجه نیجه آثارک
 کوندن کونه آرتمه سی کوستریور .

تربیه عوامک طریق سالمنده ایلرولدیکنی واستقبال ایچون
 بک کوزل امیدلر بسلنه بیله جکنی بوراده ده مشاهده ایتمکله
 محظوظ اولیورز .

آلتنجی فصل

تربیه عامه و مسئله اجتماعیه

دهموقراسینک حل ایتکه چالیشدینی اک مهم و نازک مسائل میاننده مسئله اجتماعیه ایلک صیره یی طوتار : بومسئله هم بر قومک افرادی بیننده کی معاملاته و همده اقوام بیننده کی مناسباته تعلق ایتدیکندن بوکا قارشی هیچ بر کیمسه لاقید قاله ماز . بالعکس هر کس وسعی داخلنده مسئله یی لایقیله احاطه ایدهرک حلنی تسهیل ایچون صرف جهد ایتلیدر . تربیه چوجوقلری وکنجملری حیاته حاضرلیه جفی ایچون بومهم بحثه تامکتبدن باشلانهرق اونلره نظری و بالخاصه عملی اولهرق مسئله نک حقیقتی ونه کی اساسلره کوره حلندن امید وار ، اولنه بیله جکی کوسترملیدر . بزجه مسئله اجتماعیه شو صورتله خلاصه ایدیه بیلور : اخلاق و تأسیساتک حال حاضرنده افراد مملکتک بر چوغی نسیبلرندن طولانی ماده و بالخاصه معنای عادی و اکثریا سفیلانه بر حیاته محکوم اولیورلر . کونلری تأمین معیشت ایچون مفرط بر سعی ایله کچور . انسانه یاقیشیر بر حیاتدن استفاده ایچون نه قوت قالیر نه وقت ، نده بر هوس طویا بیلیرلر . بالعکس قبا و اکثریت اوزره حیثیت بشریه یی آچالشان اکلنجهلر آراشدیرلر . نهایت قوت و طاقتلری بوتون بوتون کسلیلر ؛

درین ، آغیر بر او یقو سفالت حاللرینی موقه اولسون اونو تدریر جق ،
قوتلرینی تازه لیه جکلدر .

فی الحقیقه چکدکلری سفالت واضطرابک بر قسمنه کنیدیلری
سبیدر . ده دور اندیشانه چالیشوب اعتدال واقصاده
رعایت ایدهرک سفالتلرینک اوکنی آلق نمکندر . غایت غیر
مساعده شرائط ایچنده دنیایه کلدیکی حالده مجاهده ذاتیه سیله
صیریلوب یوکسلن آدملر نادر دکل . فقط بوکا مقابل عطالت
وسفالتک بوبوک بر قسمی هیئت اجتماعیه نک احوال عمومیه سندن
نشئت ایتدیکنی اونو تامملی .

هر حالده بوفناقلره چاره ساز اولق لازم ؛ بونک ایچون اول
امرده پک متعدد ومغلق اولان اسبابی طایبق ایجاب ایلر .
مؤلفلرک بر چوغنه کوره سفالت اجتماعیه یکهانه دکلسه ده
باشلیجه سبب تملک وتصرفک شخصی اولمسیدر . ژان ژاق
روسو دخی مساواتسزلنک منشئی حقنده کی نطقنده بویله
دیئوردی : « بر طوپراغک اطرافنی چویره رک بو بنمدر دیمکه
ایلک جسارت ایدن جمعیت مدنیه نک واضع حقیقیسیدر . چیتک
قازیقلرینی سوکهرک یاخود خندکی طولدیره رق بویالانجی به
اینانمایک ، میوه لر هرکسه عائددر ، یر بر آدمک اوله ماز ؛ دیه
همجنسلرینه باغیران کیمسه بشریت ایچون جنایتلر ، محاربه لر ،
قتاللر ، سفالت ودهشت جلب ودعوت ایتمکدن خالی قالماشدر . »

(ایکنجی قسم) . بوحالده (تملك مسئله سی) مسئله اجتماعیه نك دوکوم یریدر .

انسانك منابع ووسائط طبیعیہ نی احتیاجاتی ایچون قولالانمق؛ احتیاجات آتیہ سنی رفع و سائطنی اولدن حاضرله مق ؛ سعیله ، ذکا و ارادتندن خلاصه شخصیتندن برشی علاوه ایتمش اولدینی مواد طبیعه نك استعمالنی كرك منفرداً و كرك مشتركاً كندینه حصر ایتك حقنه جدی صورتده اعتراض ایدیله مامشدر . کیمسه یه عائد اولیان شی هرکسکدر دستوری منطقاً و فعلاً قبول ایدیله میه جك بر مدعای کندینه دلیل اتخاذایتمکدر . طوغریسی کیمسه نك اولیان شی کیمسه یه عائد دکلدرد . طبیعتك عرض ایتدیکی شیئی کندینه مال ایدن کیمسه سرقت ارتکاب ایتمشدر دینه من . اگر بو بوش ادعا تماماً تطبیقه فالقیشیلسه حصوله کله جك نتیجه انسانه قارشو لاقید طور دیغنده شبه اولیان ، هر حالده آزو متفاوت صورتده محصول ویرن طبیعت قارشو سنده سفالت عمومیہ نك تمادیسی ؛ احتیاجك حقه غلبه سیله انسانلر آراسنده مجادلات متمادیه ظهوری دیمکدر . باقیلیرسه بشریتك اوائلی هپ بوحالده چکمش .

بونکله برابر شو سؤال دائمـا وارد اولور : ۱ حق تملك اساس صحیحی نه در ؟ ۲ حق تملك شخصی می یوقسه مشترك می اولمیدر ؟

۱ — حق تملکی بعضلری اشغال و بعضلری ده احتیاج یا خود

سعیه استناد ایتدیرمک ایسته مشلردر. بونلر آیری آیری نظر
اعتباره آله حق اولورسه اثبات مدعی ایچون کفایت ایتدیکی
کوریلور .

کیمسه یه عائد اولان بر شیئی اشغال اوشیئک صاحب اولمق
ایچون کافی اولسه ایدی برکشینک ویا برهیئتک احتیاجاتندن
افزون منابع طبیعییه حتی آچوب ایشلتمکسزین صورت مشروعه ده
مالک اوله بیللمه لری ممکن اولوردی . حالبوکه دیگر طرفدن بر
طاقم کیمسه لر نه قدر حسن نیت صاحب اولسه لرینه بونلرک
کیف و آرزوسنه تابع اولقمسزین چالیشمقدن محروم قالردی .
بونک ایچون اشغالک فعلی اوله سی وایشلتمکله مترافق بولمسه سی
عمومیت اوزره قبول ایدلمشدر .

الزم و ضروری اولان احتیاج طبیعی بو احتیاجک دفعی
ایچون انسانه کندینه عائد اولیان شیلری تملک حقنی ویردیکنی
قبول ایتسه ک حوایج ضروریه ایله ساده جه فائده لی ویا خودزاند
اولان حوایج آراسنده بر حد فاصل تعینی مشکلاتی ظهور
ایدر . حق تملکی حوایج ضروریه پی دفع ایده جک منابع ثروته
حصر ایتک ایسه نوع بشری ماده و معنای سفیل بر حیاتیه محکوم
ایتمکدر . حالبوکه کوندن کونه آرتوب اینجلمکده اولان احتیاجات
فکریه و ذوقیه و اخلاقیه یه مخصوصی بر ثروت صنایع و جوده
کتیرمک اقتضا ایتشدر . دیگر جهتمندن ده بوتون احتیاجاتک چاره
دفعی تحری برحق اوله رق قبول ایدیلورسه ثروتک بعض

کیمسه لک ایادیء انحصارینه کچه رک مجادلات شدیدہ پی موجب اولوق تہلکہ سی وارد ر .

انسانک، سعبہ اشیایہ شخصندن بعض شیلر علاوہ ایدہ رک کندینہ مال ایتہ سی کیفیتی اعتراض کو تورمز . فقط دیگر برانسان ویاخود دیگر بر ہیئت دخی مواد ابتدائیہ پی اونک قدر بلکہ دها ای ایشله یوب بر اثر صنعت وجودہ کتیرہ بیلیر . بودہ محقق . — بوندن باشقه بر شخصک ویاخود بر ہیئتک یالکز باشنه چالیشوب برشی وجودہ کتیرمی اندر اوله رق وقوع بولور . انسانیت ایلر ولدجہ سعی ده اشتراک و تعاونک آرتدینی کورولمکده در ، اوصورتلہ کہ هر کسک یابدینی شی دیگر لرینک یامقده اولدینی شیئک بر قسمیدر . بناءً علیہ هر کس دیگرک ثمره سعیندن بر حصہ ادعا ایدہ بیلیر .

افادات سالفه دن مستبان اولدینی اوزره حق تملکک منشأ ابتدائیسی احتیاجدر . اشغالی و بالتیجہ کرک اشغال ایچون وکرک منابع طبیعه دن استفاده ایچون تملکی موجب اولور . سعی سایه سنده ثروت واونکله برابر رفاه ووسعت آرتدجہ انسان قیمت، مغنویه سی ، احتیاجاتی ، وظائف و حقوقی دها آچیق صورتده آکلایه رق حق تملکک اساسی حیات آدمیه یعنی حیات مغنویه وآنک ضمننده اولان حیات مادیہ پی ادامه و توسیع ایتک و بونک نتیجہ سی اوله رق ضروری و حتی مفید وسائطی الہ ایتک حکمی ویرمکده در .

۲. — تاریخه باقیلورسه حق تملك بدایتده مشترك ایکن بالآخره شخصه مخصوص اولغه باشلادینی کوریلور. حق تملكك شخصی اولماسنك آثاری بدایتده بیه مشهوددر. هرکس کندی ذوق وظیفه سنه کوره بر شکل مخصوص ویردیکی سلاحرینی، البسه سنی، تزیناتی منحصر آتصرف واستعمال ادعا سنده آیدی. دیگر طرفندن ده حق تملكده اصول شخصیتی اك ایلری یه کورتورمش اولان جمعیتلرده بیه اسکی ملکیت مشترکه نك بقایاسی وحتى بعضاً بوکا عودت تمایلاتی موجوددر. تصرفك بو ایکی شکلی ده بر درجه یه قدر طوغری کوستره جك دلائل وار :

شخصی اولسی حب نفسی و عزت نفسی اوقشار امنیت ورفاه آرزوسیه میل استقلاله موافق دوشر ؛ مشترك اولسی ده سعادت و ترقی یه نائل اولمق ایچون اینسانلرک یکدیگری نه ماده اولدینی کبی معناً وحق وظیفه نقطه نظرندن دخی مظاهرتی اساسنه موافق. بناء علیه بو ایکی شکلدن هانکی سنك نظریات و تطبیقاتجه دیگرینه ترجیح ده شایان اولدیغنی تعیین ایتمك لازم کلیر .

حق تملكده شخصیتك ایلروله سی ثروتلر آراسنده کی مساواتبزلنی تزید ایله فقیرلرک زنکیلر حسابنه چالشمه سنی موجب اوله رق اقتصاداً و اخلاقاً پك مؤسف نتایج تولید ایتدیکنی تسلیم ایتلیدر . بونك ایچون اشتراکیون بو اصولك تبدیلی و یاهیج ولمازسه ثروت شخصیه نك الی نه یه آرتمه سنه

مانع اوله جق بر حد تعیینی و هر حالده مخاذیرینک رفع و ازاله سنی ایسته یورلر .

تقسیم اموال مسلکندن طو توکده حق تملکک تحدیدینی، سعیک و سرمایه دارن ایله عمله آراسنده کی مناسباتک تعیینی کافه عجزه و قاصرینه معاونت ایچون مؤسسات مخصوصه وجوده کتیرلسنی کافی کورن نظریه به؛ قومو نزم و قولکتیویزمدن کچرک انار شیزمه وارنجه به قدر هبسی سوسیالیزم ک ماضیده و حالده آلمش اولدینی اشکال مختلفه در .

بو مختلف مسلک لارک اوزون اوزادی به تفصیل و تنقیدینه کیریشیمکسزین هربری حقنده بر ایکی سوز سویلک فائده دن خالی قالماز .

تقسیم دوری مسلک نه طرفدار اولان قالماشدر . بو اصولک تأثیری پک محدوددر . چونکه مساوات بر آن ایچون تأسیس ایدلسه بیله در حال زائل اولور . برده تقسیم کیفیتنک افرادک قوه استحصالیه سنی، اقتصاد هوسنی آزالته رق سفالت عمومیه بی انتاج اتمه سی ضروریدر . بو اصولک الان دوام ایتدیکی مملکتلرده بیله ارتق مخاذیری اکلاشلمش اولدیفندن ترک ایدلمک باشلامشدر .

قومو نزمک اک مشهور مدافع لری بابوف، اودان وقاده در . بو مسلک کوره هرکس دیکری ایچون قوت واستعدادینک اولدینی مرتبه ده چالیشه جق ؛ و جماعت ایسه صاغلام، قاصر

ومعلول بوتون اعضاسنه محصولك هيئت مجموعه سندن حوايج مصيبلريني بول بول دفع ايده جك بر حصه تايمين ايده جك. بوه سلك طرفدارلري اموال شخصيه يي تماماً قالدير مقله مادي معنوي بوتون سفالترك، بالخاصه جناياتك سبب اصليسي ازاله ايدلمش اولور ظن ايدر لر .

قومونيزم كرك سى وكرك محصولاتك توزيى ايچون تشكيلات مخصوصه اجتماعيه استلزام ايلديكي كبي افرادده اويله بر تربيه اخلاقيه نك وجودينه متوقفدر كه منفعت شخصيه دن تماماً تجرد ايده رك كمال خلوص ايله هر كى كندى نفسى ايچون چاليشدينى قدر ديكر لري ايچون چاليشسون، محصول مساعيسى اوزر نده هيچ برحق ادعا ايتسون . — حال حاضرده ايسه بوكي تمايلات انجق جهت اقتصاديه تعلق ايتيان افكار و حسيات تحت تاثير نده اوله رق پك نادر كيمسه لرده كوريله بيلور. شهبه سز بونك ايچوندر كه اك ياقين زمانلره قدر قومونيزمك مسالك مختلفه سنى تطبيق ايچون اجرا ايدلمش اولان تشبثات عقيم قالمشدر .

بوندن بشقه فردى هيئته پك زياده زبون ايتديكي وكرك احتياجاتك دفعى وكرك مساعيسى خصوصنده نظامات شديده يه تابع قيلدينى ايچون نظريات جهتندن دخی (قومونيزم) . اعتراض ايديلير .

قولكتيويوزم شو صورتله خلاصه ايديله بيلير : بوتون

وسائط استحصالیه بی یعنی هر نوع سرمایه بی جمعیه مال ایدوب
 بونلری افرادك و كرك هیئتلك تشبثات خصوصیه سینه آماده
 بولندیره رق ثروت مستحصله دن استفاده ده تماماً سربست
 براقق فقط خصوصی سرمایه و ثروتلر تشككنه مانع اولق. بو
 مسلك طرفدارلری شو صورتله فردك حقوقله جمعیتك حقوقی
 تألیف ایدیله بیله جکی فکرنده درلر . صاغلان آدملك ثمره
 مساعیسی اوزرنندن آله حق واردات اداره عمومیه متعلق
 تداییر و مصارفك باخصوص چوققلرك، خسته لك، معلولین
 واختیارلرك اعاشه سنی تأمین جمعیه عائد اوله جقدر. حوایجك
 و بونلری دفعه مدار اوله حق شیلرك صورت عمومیه ده تعینی
 حقنده بین الملل برائتلاف حصوله کدکمزین مساعی ایچون
 بو وجهله تشکیلات ملیه وجوده کتیرلسی ممکن اوله میه جفی
 ظاهر در . قولک تیویزم بوکون اشتراکیونك همان اکثری
 طرفندن قبول ایدلمکده اولان برمسلك در .

آ نارشیزمه کمنجه بومسلك برحالت اجتماعیه تصور ایدر که
 اونده بوتون افراد غایت مساعد شرائط مادیه ومعنویه ایچنده
 طوغوب بویویه رك صورت متساویه ده صاغلان بر بدن صاغلان
 بر فکر صاحبی اوله حق، یکدیگرینك حقوق طبیعیه سینه رعایت
 وبر برینه ممکن اولدینی مرتبه واسع معاونته بولمق، یینلرنده
 سربستجه عقد ایده جکلری مقاولات احکامنی محافظه ایچون
 هیچ بر حکومت احتیاج کورونمیه جکدر . بو افراد بر طاقم

هېئتلر وجوده كټيره رك اوراده هر كس دېكرلرى و دېكرى ده. هر كس اېچون چالېشه جق، هر كسك قابلىتى سربستىء تام اېچنده وسعت بوله رق قوا و ملكاتنى كال سربستى ايله استعمال ايدە جك چالېشانلر محصول مساعىسنى بر آرايه قويه رق چالېشان چالېشه ميان كېمسه لك هېسى هر نوع احتياجلرىنى طوېلانان شېدن استىفا ايليه جكدر . فوريه نك فكر اساسىسى بو ايدى. قونت له ئون تولستوئىنك نظريه سى ده بو اولسه كرك .

بومسالك طرفدارانى مقصدلرىنى موقع اجرايه قويىق اېچون قوللاندىقلرى وسائطه كوره انقلابچى، تكامل طرفدارى اولىق اوزره ايكيه آيريلير. برنجيلر جمعيت حاضره نك اصلاحي قابل اولميه جق درجه ده معلول اولدىغى ادعا ايله هر شىء بردن بره آلت اوست ايدە رك كندى اساسلرېنه كوره يكيدين تنظيم ايتىمك ايسترلر، افرادك ويا احوال حاضره دن مستفيد اولان صنوفك مقاومتى قيرىق اېچون ولو شدتك اك مفرط اشكالنه مراجعته مجبوريت كورلسون . بابوف ، زغه ست ، قروپوتكىن ك فكرى بودر. دېكرلرى ايسه جمعيتى يكيدين تشكيكه تشبث ايتىمزدن اول تشكىلات اجتماعيه نك لموزون برمدتدر ارثاً دولم ايدن تاثيرات مشئومه سيله بوزولمش اولان افرادك تدريجاً اصلاحي وباخصوص مساعينك تنظيمى ، چوجوقلرك و شبايك حسن تريبه سى، ايش كورمكدن عاجز اولانلرك مستحق اولدىغى مظاهره ته نائلىتى اېچون تنظيم ايديله جك قوانينه يكي اساسلرك

ادخالنی موافق کورمکده درلر . سن فوریه، سن سیمون، ژان ژورس، ا. فورنیه ر ایله تولستوئی بوفکرده در .

صاحب‌لرینک سوء نیتی ویا اهلیتسنزلکندن طولای ثروت شخصیه‌نک سبب اولدینی سوءاستعمالاتی میدانیه قویمده مختلف مکتبلره منسوب اشتراکیونک اصابت ایتدکلری تصدیق ایدملیدر. دیگر طرفدن تخیل ایتدکلری حیات اجتماعیه دخی، ایلك نظرده، انسانی مفتون ایده‌جک کیدز . والحاصل اکثر علمای اشتراکیونک حسن نیتنه تقدیرخوان اولمق اقتضا ایدر .

مع‌مافییه ایکی نقطه‌دن شدتله مؤاخذه‌یه دوچار اولمقده درلر :

۱ — سیئات حاضره‌نک تصویرنده، تشکیلات اجتماعیه‌علیه‌نده‌کی

ادعالرنده افراطه واردکلری حالده حال حاضرک ایی جهت‌لری حقنده هیچ برشی یاخود پک آز برشی سویله‌ملری .

۲ — ، مقصودلرینک موقع تطبیقه‌وضعی ایچون قوللانیله‌جق

وسائط و باخصوص آرزو ایتدکلری تشکیلات مستقبله‌حقنده‌کی فکرلری

کی و ظائفک تقسیمی ایچون افراد بیننده و افراد ایله جماعتلر

آره‌سنده، استحصال و مبادله‌نک حسن جریانی ایچون جماعتلر

آراسنده وقوع بوله‌جق ولو اقتصادی مناسباتک تنظیمی حقنده‌کی

فکرلرینک عمومیت اوزره بهم و غیر معین اولسی .

هر حالده تکامل طرفداری اولانلر انقلابچیلره قارشی

حقلیدر : جمعیتک حال حاضری بر چوق عصرلرک نتیجه‌سی

اولوب بوکون یاشایان انسانلر ایه بدنأ و روحأ اوکا کوره بر

استعداد ارثی حاصل ایتش بولنده لرندن دیگر شکلده بر جمعیتک در حال وجوده کتیر یله بیلسی ایچون اشیا ده شرائط مقتضیه، افرادده قابلیت وحسیات لازمه بولمق ممکن اوله ماز. بو یولده کی بر چوق تشبثات صلحیرو رانه نك عدم موفقیتله نتیجه لنمسی موجب اولان باشلیجه سبب بودر، شدتک ایسه حصوله کتیره جکی عکس العمل ایله نتیجه سز قالمسی احتمالی ده ا زیاده. اشتراکیونک غایه تصور اتی اولسه اولسه پک اوزاق برماضیده و آغیر بر تکامل اثری اوله رق جبری اولمقدن زیاده صلحیرو رانه بر صورتده موقع فعله چیقاییلیر.

بوکا انتظاراً الله بولنان ایله اوزلاشمق و اونی مقصده یاقلاشه جق وجهله ممکن مرتبه اصلاحه جهد ایتک مناسب اولور.

بوندن باشقه تملمکده کی اصول شخصیتک صلاحات اجتماعیه ایله و یا هیج اولمزه مساوی حاضره نك تقلیلی ایله غیر قابل تألیف اولدینی تماماً اثبات ایدلمشیدر؟ ثروت شخصیه نك قالدیرلمسی کړك هیئت مجموعه بشرک و کړك بر چوق افرادک ترقیات مادیه و معنویه سنه ایراث خلل ایده جکی سویلیانلر عجباً حق سزمیدر؟

خلاصه حال حاضرده کی فنالقلر تصرفلری تابع اولدینی اصولدن زیاده بونک بالخاصه ماده محدود و عقیم، اخلاقاً منفور اولان خود پرستی تأثیری آلتنده سوء استعماله او غرامه سندن

متولددر . — اگر افراد نفس‌لرینی سومك و كندی خیر و سعادت شخصیه‌لرینی آراشدیرمقه برابر منفعت حقیقه‌لرینك دیگر انسانلرك منفعتیه، سعادتلرینك دیگرلرینك سعادتیه ارتباطی آكلامش اولسه‌لر؛ اگر هم حیثیت شخصیه‌لرینی کوزته‌رك هم‌ده حرکتلرنده محافظه اعتدال‌ایله دیگرلرینه قارشى وظیفه‌لرینی ایفا ایدهرك عدالت و مرحمت قواعد واساسلرینه توفیق معامله ایتسه‌لر، اگر تملکك برحق ویرمکدن زیاده انسانه وظائف شخصیه واجتماعیه تحمیل ایتدیکنی ملاحظه ایدهرك وضع‌ایتمش اولدقلری منابع ثروتی دیگرلرینی چالیشدیرمق باخصوص کندی چالیشمق صورتیه ایدی استفاده ترک ایتسه‌لر؛ اگر عملیه‌ی استخدام ایدن کیمسه‌لر کندی استفاده‌لرینك تزیادنندن اونلری‌ده حصه‌دار ایدهرك عدالته رعایت ایتسه‌لر؛ نهایت زینکینلر ثروتلرینك فضله‌سندن بویوک بر قسمی آثار خیریه و معاونت متقابلیه‌ی تأمین ایدن مؤسسات وجوده کتیرمکه‌صرف ایلسه‌لر حق تملکك شخصه اولسنه اسناد ایدیلن فناقللرك بر چوغی کندیلککندن زائل اولمسی و ثروتک بی‌نهایه تزیایدیله اکثریت عظیمه‌نك بحق انسانه یاقیشیر بر حیاته نائلیتنی تأمین ایدهرك اسباب حضور ورفاهلری آرتمه‌سی محقق دکلیدر؟

بوندن شو نتیجه چیقارکه حال یاحضرده هرکس کندینی معناً اصلاحه چالیشمق و همجنسینك دخی حسن اخلاق صاحبی، عادل و حس تعاون ایله متحسس و حق تملکك تحمیل ایلدیکی

وظائف شخصی و اجتماعی بی ایفایه مقدم اولسی ایچون بوتون نفوذ و تأثیرینی استعمال ایتک وظیفه سیله مکلفدر .

قوانینک و باخصوص سرمایه ایله سعی بیننده کی مناسباته، شبابت تربیه سنه، مؤسسات خیریه و امور عدلیه متعلق اولانلرک اصلاحی ایچون چالیشمق لزومی دخی ظاهر در . بوکاموفق اولمق ایچون کرک افراد ملتدن بری و کرک مأموریندن اوله رق هر هانکی صفتله اولورسه اولسون ایفای وظیفه ایدر ایکن بولزومی دائماً پیش تأملده بولندیرمه سی و مسائل اجتماعی بی تدقیق و تنبیع ایله تنویر افکار اتمه سی لازمدر .

فقط قانون کافی دکدر ؛ حتی جمعیتی توجیه و اصلاح ایتک وظیفه سنی صرف حکومته تحمیل ایتک شایان تأسفدر، حکومتک وظیفه حقیقه سی تشبثات خصوصه بی تحریک ایتک و اوکا مظاهر تده بولتمقددر . یوقسه بوتشبتاته وکالت ایتک، مانع اولمق دکل . ایمدی بوتشبتات یالکز حرکات منفردده صورتنده تظاهر ایتکله قالمیه رق نتایج قطعیه ویرمک ایچون بالخاصه اشتراک مساعی و مجاهدات صورتنده تجلی ایتلیدر .

ایشته اولاد وطنه بالخاصه تعلم ایدلسنی ارزو ایتدیکمز نقطه اساسیه بودر: تملک هرشیدن اول وظیفه ایکنجی درجه ده حق تولید ایدر .

اساساً حق تملک قبولنی موجب اولان شی فائده سی نفع خصوصیسندن زیاده نفع اجتماعیسدر. تشکیلات اجتماعیه

سایه‌سندہ ہر کس کرک فرداً و کرک مجتمہاً حق تملکک ادامہ و توسعہ و لوکہ بالواسطہ یار دیم ایدر۔ تملکدہ کی شکل شخصینک شکل مشترکہ غلبہ سی دخی منافع اجتماعیہ ایجابنددر۔ ہانکی شکلہ اولورسہ اولسون افرادک قازاندینی، محافظہ ایدوب ایشلتدیک حالدہ جمعیتک و بناء علیہ تمثالی اولان حکومتک بر حصہ سی بولندیغندن نظارت و قونترول حق دہ وارددر۔ عین زماندہ حکومت اومالی تکفل ایتک وظیفہ سیلہ دہ مکلف اولور۔

حکومت بو حق اولجہ اولدینی کبی شمدی دہ ویرکی آلہرق، فراغ وانتقال و ہبہ معاملاتندہ خرج استیفا ایلیرک، منافع عمومیہ ایچون استملاک ایدہرک استعمال ایتکدہدر۔ فقط اخلاق نقطہ نظرندن دہا ایلری کیتلی۔ فکر مزجہ شو بحبہ خاتمہ اولہرق ایراد ایدہرکمز قواعد اساسیہ نک وضعی لازمدر۔

۱ — ہر شخص قازانوب احتیاجاتی دفع ایلہ استقلال حیاتیسی و حیثیت ذاتیہ سنی تأمین ایتک و سعادت عمومیہ نک آرتمہ سہ یار دیم اینک ایچون چالیشمق و تصرف ایتک وظیفہ شخصیہ و اجتماعیہ سیلہ مکلفدر۔

۲ — ہر ہانکی بر ثروت صاحبی الندہ بولنان شو امانتدن طولای کندیخی ہیئت اجتماعیہ قارشی مسئلہ عد ایدہرک بو ثروتی ایشلتمک و ایادی استفادہ یہ وضع ایتک مجبوریت تطبیہ سندہ بولمیلیدر۔

۳ — نہ قدر زنکین اولورسہ اولسون ہیچ بر کیسہ

ایشمنز وبوش اوطور مق حقنه مالک دکدر. زیرا کندیسنه
 بوقدر منافع تأمین ایدن جمعیه قارشى وظیفه شنى ایفا ایتمه رك
 حقیقى سرقت، بر حقسزلق ارتكاب ایتمش اولور .
 بوقواعده برشكل قانونى ویروب مخالف حرکت ایدنلری
 جزالندرمغه قدر وارمق شبهه سز افراطه دوشمکدر . شوقدر
 وارکه دهموقراسینك مسئله اجتماعیه یی حل ایچون مراجعت
 ایلدیكى قوانین مختلفه یه . مطلوب اولان تأئیری ویره جك شی ده
 انجق بوافكارك قبول وحسن تطبیقیدر .

يدنجى فصل

وطن و انسانيت

وطن فكري خصوصيله حسيات وطنپرورانه ، محبت وطنيه ايله انسانيت محبتك تاليفى حقيقه و منطقاً ممكن اولديغنه ذاهب اولان ، بعض كيمسه لرك شدتلى تنقيداتنه حتى مهاجراتنه معروض قالدينى كوروليور . افراطپرورانه اولغله برابر ياكلشلفى ظاهر اولان بو مدعا طرفدارلرينك مغفل و صحى مبهم بر طاقم دلائله استناد ايتلرندن طولايى فضله اوله رق تهلكه ليدر . بوكا ، محاكات عاديه ايله اقناعه و كندى سويه سندن يوكسك افكار و حسياته مجلوبيت و تبعيته مستعد افكار . بسيطه اعجابندن باشقه كيمسه قاريشماز . بر زماندن برى ، وطنپرورلك علمينده كى افكار عامه آره سنده ترقى ايله جدى اندیشه لره محل و يردى كنى ، ماده كورويورز بلكه ايشك تهلكه سى مفرطانه دوشونوليور ؛ فقط هر حالده بونى نظر دقته آلاماق دوشونجه سزلك اولور . تهلكه يى بر طرف ايتك ايچون ايسه منور الافكار كيمسه لرك بو مسئله يى ، تصوب ايتيوب بالعكس اساسى صاغلام اولديغنى انظار عموميه يه ارائه مقصديله ، بطوغريدن طوغرى يه تدقيقه كيريشملرى لازمدز . بو وظيفه ، خصوصيله ، مربى ء شباب اولان ذواته توجه ايدر .

وطنپرورلك عليهنده بولنانلر ، وطن و وطنپرورلك حقهنده کی بعض طرز تلقیرك موجب اولدینی حرکات مفرطانه بی ایضاح ایله ، مدعالینه بر سبب ظاهری بولدقلری منکر دکدر . فی الحقیقه بعض کیسه لرك وطنلری ایچون پرستشکارانه و تعصب درجه سنده بر محبتی واردر . بونلرك تصویرینه کوره بر آدم کندی مملکتی ، دیگرلری تحقیر ایتمکسین سوه مز ، فکرلری اقوامک مجادلات متقدمه سی خاطر اتیه ، نخوت ظفر ویا کین ادبار و مغلوبیت ایله مشبوع اولان بویکسه لر ملت لرینک ایلك صیره ده کی موقعلرینی سلاح قوتیه محافظه ایتمکدن یا خود اونلری او مرتبه یه ایصالدن باشقه برشی دوشونمز لر . بوشکله برابر وطنپرور اولق نقطه نظرندن ، اکثریا موهوم بر طاقم حقوقی ادعایه ، اساسنر حقسنر لقلردن اخذثاره وهر حالده بر از ای دوشونوش و سکون سایه سنده دائما بر طرف ایدیه بیلمسی تمکن بر طاقم مشکلات ، حیات مفرطه لرینک ناحق و مناسبتنر مداخلاتیه ایقاعه دائما حاضر مفرط بر سرعت انفعاله مالکدر لر . بویولده بر دوشونوش ، تعمم ایتدیکی تقدیرده ، اقوام آره سنده دائمی بر مخصوصه نك وجودینه ونشوو نماسنه ، مجادلات دائمه و متجدده احداثه سبب اوله جفی امر آشکاردر . اوت ، بزده سویلکده تردد ایتیزکه ؛ اکر وطن آنجق بو صورتله تلقی ایدیلیر و وطنپرولک بویولده تطبیق اولنورسه او حالده انسانیت نامه بونی رد و جرح ایتمک لازمدر . چوق شکرکه بز وطنی بو افکار مفرطه اصبافی کبی

طابق و اوئی بونلرک یاپدینی کبی تعبد ایدرجه سنه سومک اصلا لازم اولمديغه قانعر . وبغض اشخاص ايله اولان خصوصى دوستلق دیکر لرینه بغض وعداوتی ایجاب ایتدیرمدیکی ، عائله محبتی دیگر عائله لرک اییلکنه چالیشمقدن صرف نظرله انسانک کندی عائله سنه منحصر اولیه جفی کبی وطن محبتی ده دیگر ملتله قارشی خیرخواه اولغه خصوصیه عالم بشریتیه قارشی محبت بسلمکه مانع اوله مز . بالعکس عائله ایچنده وعائله واسطه سیله عدالت ، شفقت بالعمل اوکره نیلدیکی ، ودوستلرینی سون کیمسه لر همجنسلری حقنده محبت قوتی بالذات نفسلرنده تمیه ایتدکلی کبی انسانیتیه خدمت ومحبته ده انحق وطنی سوه رک و اوکا حسن خدمتی درعهده ایده رک اوکره نیلیر دیمک جائزدر .

فقط « وطن » نهدر ؟ چوق دفعه بونک تعریفه چالیشلمش وانسانک طوغوب بویودیکی یردر دییه تعریف اولنمشدر . وطنی وجوده کتیرن شی جنس ، لسان ، حسیات ، افکار ، اخلاق حتی منافعک اشتراکی اولدینی ادعا ایدیلیور . بو تعریفاتک هیج بری ، ناقص ونا تمام اولسی جهتیله ، طوغزو دکادر ؛ حتی بعضلری یاکلشدر . باشقه مثال آرامغه حاجت یوق . کوچک اسویچره بی نظر دقه آلام : بو مملکتکه ، یکرمی درت جهتنده جنس ، لسان وتشکلاتی تمامیه متخالف یکرمی درت حکومت بولوندینی حالده ، اوراده وطنپرورلک ، اسویچره اقوامنک شو «برکشی هرکس ایچون وهرکس برکشی

ایچون « یولنده کی کوزل حکمیاته مطابق اوله رق ، پک یارلاق و حرارتلیدر. «وطن» حقنده طوغروب مفهوم الده ایتک ایچون هر شیدن اول حادثاتی نظر دقته آلاق بر « وطن » ک ناصل تشکل ایتدیکنی استنتاج ایتک لازم کلیر. «وطن» ده وجودایله روحی یکدیگردن تمیز ایتلیدر .

وجود کله نک معناستندن دخی آکلاشیله جنی اوزره ، اجدادک اوزرنده یاشادقلری طوپراق وبرطاقم اشخاص ، نسللر، عائله لک بر آرایه طوپالانوب ایستر ایسته مز بعض اشتراک منافعیله ایچنده یاشامغه مجبور اولدقلری قطعه اراضیدر. بوقطعه طوپر غک ارتفاعی وصولرک جریانیله واضحاً تعیین اولنور . آوراده ساکن اولان اشخاص و جماعات یکدیگریله اولا ماده ، بعده بالتدریج اخلاق نقطه نظرندن مناسبات متزایده و صمیمیه کیریشه رک بویله جه مملکتک سکنه سی اوزرنده و سکنه نک مملکت اوزرنده تاثیرات متقابله سی حصوله کلیر .

سکنه ، مملکتی هر نوع احتیاجلرینه کوره ایشلرینه یارایه جق بر قالبه صوقارلر ؛ اونی آچارلر ؛ اوراده کویلر ، شهرلر بنا ایدرلر ، یوللر یاپارلر، قاناللر آچارلر : حاصلی فعالیت جسمانیه ، فکر ، و اخلاقیه لرینک نتایجنی ضم و الحاق ایده رک اونک شکلنی دکیشدیرلر . بطون متعاقبه دخی ایشلنلمش اولان او اراضی ده کندیلرینک هر نوع آثار و معمولاتی ، آثار صنایعه لرینی و زراعت، صنعت و تجارتک بخش ایتدیکی فوایدی محاسنیه تتویج

ایدن صنایع نفیسه لری مبدعاتی جمع ایدر لر خاطرات ماضیه بو صورتله بلا انقطاع دوام ایده رک هر بطن یکدیگرینی متعاقباً بوکا محبت و حرمت ایتمکی اوکره نیر لر . و نهایت محصولدار قیلمق، کوزلشدر مک ایچون چالیشدقلری و بو صورتله اخلافک انظار تقدیسنه ترک ایتدکلری بویرده هر بطن متناوباً حوابگاه ایدیلرینه چکیلر لر . جسم وطن ایشته بودر : فقط اک زیاده اهمیت حائز اولان « روح وطن » در . بوندن مقصود نه اوله بیلیر؟ بز بونی تفهیم ایچون بر مملکتک، اخلاق و طبایعی تبدیل ایده رک ، سکنه سی اوزرنده ناصل اجرای تأثیر ایتدیکنی ارئه ایده جکز : اولاً ، مملکت طبایع اوزرنده اجرای تأثیر ایدر ؛ بر نوزادک بر مملکتده اقامتی ایچون اونک اقلیمله الفتی یعنی عضویتنک اوراده حصول بولمسی ایجاب ایدر . بو الفت مسئله سی حقیقه اوزون سوره ر؛ بطون متعاقبه آره سنده توارث واسطه سیله دوام ایدر طور در . بویله جه یاواش یاواش تأثیرات جغرافیه و اقلیمیه ایله هم آهنگ بر طبیعت تشکل ایدر که بو طبیعت او تأثیراتنک نتیجه سیدر . بوقاعده ، عینی قطعه ده طوبلانان مختلف اساسلره منسوب ، عناصر نسبیته نک هیج اولمزایسه اشکال اساسیه سنده عینی طبیعت و عینی اخلاقی ارئه ایتمکه چالشمسینی ده ایضاح ایدر . فرانسزلری ، روسلری انکلیزلری حصوله کتیرن طوغرودن طوغری به طبیعت دکلدز . غایت ظاهر اولان بو اختلافی انلرده حصوله کتیرن ، (مملکتدر) . حیات اجتماعینک کافئه شرائط

مادیه و اخلاقیه سی دخی بوکا علاوه اولدینی نظر دفته آلنیرسه
 آکلاشیلیرکه ؛ مختلف اساسلره منسوب عناصر آره سنده کی
 تخالف ، مناسبات ایله واکثریا ابتداده اختلاف و مجادله صوکره
 رقابت دائمه ایله تنافس ایدر ، حرکت ، تفکر و حس ایتمک
 اعتیاداتی حصوله کلیرکه بونلر اساسده کی تخالی تمامیه ازاله
 ایتمکله برابر اخلاق و طبایعی تزاید تدریجی ایله برلشدرمکه سعی
 ایدرلر : نورماندیالیر ، پرووانسیلیر ، بورغونیالیر ،
 پروتانیالیرک هریری مختلف عرقلره منسوب اولدقلری پک
 بللی اولدینی حالده یکدیگرینه بکزمه یان علائم وجهیه لری ، و طورلری
 طرز تکلم و حرکتلریله همنهری اولدقلری پک قولای آکلاشیلیر .
 سائر ملتلرک مختلف ولایتلرینه منسوب یرلی اهایلی ده بویله در .
 ترقیات اقتصادیته بالضروره انتاج ایتدیکی تشکیلات مدنییه و
 سیاسییه سایه سنده ، اشخاص و جماعاتده تظاهر ایدن وحدت و
 تعاون ، اخلاق و بونک ایجاباتندن اوله رق طبایعک رابطه پیدا
 ایتسنه سبب اولیور . آز چوق اوزون برزمان صوکره ؛
 (چونکه فرانسه ده غولوالیر ، رومالیر ایله باربارلرک امتزاج
 و توحیدی آلتی عصره یاقین بر مدته حصول بولمشدر) ،
 اوت اوزون برزمان صوکره ، یتیشان اشخاصک اخلاق و
 طبایعده کی وحدت و مشابته اونلری ، دیگر مملکتلرده مختلف
 جنس و طبیعتده کی آدملر ایله بر آراده بولنمه دنسه بالریتهک مملکتنده

عین شرائط آلتنده طوغوب بویویان کیمسه لر ایله برابر یاشامق و سائطنی احضار ایدر .

استما تشکیل ایتکله برابر، برچو غنک کندی آبا و اجدادینک مملکتندن آلوب دیگر بریرده محل ولادتنی اصلا بیلیمکسزین بویودلدیکی واقعدر . و بوجو جوغک آلدینی تربیه تأییریه او محله آلیشمسی ده امر محققدر . شو قدر وارکه کندی طبیعی همشهریلرینه اولان محبت استعدادینی محافظه ایدر . و بو استعداد بر فرصت دوشونجه میدان چیقار .

وقوعات بو افاداتمزی تأیید ایسور ؛ « نانت » فرماننک فسخدن بری آلمانیا، هولاندا و انکلتیره فرار ایدن فرانسز اخلاقی ، او وقتدن بری کچن زمانه و وقوعبولان تصالب عرقه رغماً ، اخلاق و طبایع اجدادینک علامات فارقه سنی محافظه ایتمشلردر و بونلر هر نه قدر فرانسز یورکلی دکلر ایسه ده هیچ اولمز ایسه دائماً فرانسز افکاری طاشیرلر .

بو حال اون دردنجی لوئینک اوغللری اولمردن طولانی ، اسکی وطنه قارشی هیچ برکبن وعداوت آثاری بسله میان قانادالی فرانسزلرده فضله سیله کورولور . شهه سز ، قانادالیر انکلتیره ایمراطورلغنک صادق افرادیدر و هیچ برشی مقابله بو ایمراطورلق داخلنده کی مختاریتلرینی ترک ایله قانونه توفیقاً تکرار فرانسه لی اولوق ایستمزلر ؛ فقط هر نقطه نظر دن بزمه سویشیرلر و فرانسه نی نه درجه سومه من لازم کلدیکی حقنده کراتله بزه مثال ارا نه ایتمشلردر .

چوق شکر که بر شخصک طوغد یغندن اعتبار آ و طنندن
 آیروب منشائی اصلا بی سلسله کمزین بویودلدیکی غایت نادر در ؛
 فقط بر چو جو غک باباسنک مملکتی خار جنده طوغوب بویودیکی
 اکثریتیه واقعدر که بوده وطنک ، طوغوب بویونان مملکت یولنده کی
 تمریفنک نه قدر یا کلاش اولدیغنی کوسریر . بو تمریف آنجق
 کوچوک و طه یعنی دروننده انسانک تربیه ابتدائیه سنی
 الدینی محدود بر دائرئیه قابل تطبیق در ؛ مادی و معنوی پیدا
 ایدیلان بر طاقم اعتیادات اون هیج اولمزایسه ، اخلاقاً طو پر اغک
 اوبوجاغنه و اوراده ساکن اولان کیمسه لره ربط ایدر و بونک
 ایچوندر که دائماً اورایه کیتمک آرزو ایدیلیر و حتی اورایه
 دوشونمکله تذ ایدیلیر . واحوالدن بحث ایتک ایچون اورایه
 منسوب اولانلر دائماً آراشدیریلیر . هر شهرده عین ولایت ،
 مملکت اهالی سینک دائماً بر آرایه طو پلان دقلرینی کورمزیمز .
 ایشته تربیه ابتدائیه نک اشخاصی کوچوک و وطننه ، مسقط رأسنه ،
 هم شهریلرینه و عرقنه ربط ایتیمی بو اسبابه مبتنیدر .
 بیانات سالفیه نظراً ، وطنپرورلک ، صرف مسقط رأسه
 اولان محبت معناسیله قاریشدیریلیر سه بر طرز محدودده آکلاشمش
 و تطبیق ایدلمش اولور . مسقط رأسه اولان محبت وطنپرورلکه
 طوغر و تکامل ایتک ایچون حس تعاونک اولا کوچوک مواعدن
 باشلایوب نشو و نما بولسی و قوتلشمسندن صوکره ولایتلره
 یکجمنی و بویله جه صنوف اجتماعیه یه انتقالی صورتیه بر چوق

عصر یکمش و بوتعاون ، بحران عمومی ایچنده کنديسني حس ایدوب ثمراتی حصوله کتیرمشدر . بونک یالکز فرانسه ده کی مثاللرینی ذکر ایدلم ؛ یوز سنه محاربه سی ائسانسندہ انکلیزلره مقاومت ایچون ایدیلان مجاهدات ، ژان دارقده تشخص ایدن حسیات وطنپرورانه فورانی ، درمانز اهالی یی اون دردنجی لوئیک دعوتنه جواب ویردیروب (دنه ن، مالپلان) کونلرینی حصوله کتیرن حرارت افاده و باخصوص اجنبیلرک تجاوز لرینه قارش ی برغیظ و او یغما کرانی وطنک مقدس طوپرانی خارجه قوغق آرزوی عموم یستیه فرانسزلرک اکثریت عظیمه سی « والی » ده طوپلاتان اشمزاز غضب فی الحقیقه ژان دارقدن اختلاله قدر وطنپرورلک چوق انکسافه اوزراد ی و حتی اختلالات ائسانسندہ اصحاب امتیازک کنیدیله برابر مادر وطن علیهنه یورومک ایچون اجنبیلری دعوت ایتدکلی کورولدی . فقط او وقتدن بری حسیات وطنپرورینک تکاملی تمامه ایردیکی و بعدما کوچوک وطنه اولان پرستش و محبت بویوک وطنک ، وطن عمومی نککندن آیریلیمه جفی ظن اوله بیلیر .

باخصوص و طنداشلر فرانسز حیاتیله یاشامق ایچون دائماً بولوشمنی ، بر آرایه طوپلانغنی سوه لر . بوحال ، وطن داخلمندہ بولنمایشک وطن احتیاجنی و اونک دکرنی ده ا زیاده احساس ایتسندن ایلری کلیر ، و مملکتلری خارچنده طوغوب بویوان فرانسزلرک اورادن اصلا اوزاقلاشما یانلردن زیاده حسیات

وطنپرورانه مالک اولملرینک اسبابی ده بودر . فرانسه ایچون
ترلمکه ساعتلی طنین انداز اولونجه کوریلورکه، مالک اجنبیه ده
یرلشان وطن اولادی وطنداشیرینه قارشى بسله دیکی محبت سوقیه
اوراده کی بوتون منافعی فدا ایدهرک غایت اوزاق یرلردن قالقوب
کلیر وسنجاغک اطرافده اخذ موقع ایدرلر .

فرانسه وفرانسزلر حقمنده بوسویدیکمز شیرماضی وحالده
استخراج اولمان مثاللر ایله دیگر ملتلر حقمنده ده سویله بیلیر.
آلمان وطنپرورلکی، اون طقوزنجی عصرک خارق العاده نتایجی
مشاهده ایتدیکی اوحرارته او یاندران اختلالاتک وایمراطورلغک
محارباتی دکیدر ؟

اوحالده « وطن، نرده ای یاشایرایسه اوراسیدر » دیانلر
فضله آلدانیورلر دیتکدر. حیاتک فوائد ماده سندن پک زیاده
محروم قالان محتاجین، وطنک خارجنده حقیقه ای یاشایه بیلپورلرمی؟
عالمک بو محروم آدملی دکیدرکه انجق دروننده راحتجه تنفس
ایذه بیه جکلری بو هوای محیط اخلاقیه الک زیاده محتاج اولسون.
بو خصوصده قناعت حصوله احتیاج واریسه (Livre de peuple)
نام کتابک کوزل فصللرینی او قوملیدر . کورولیورکه اوراده
مؤلف (لامونه) مفسا کدرلرینی او قدر آجیقلی بر طرزده
تصویر ایتمش وهر فصلی شو حزن انکیز نقرات ایله اتمام ایلشدره
« منفی هر یرده یالکزدر. »

مطالعات سالفه « بویوک وطن » یاخود « علی العاده وطن »

نرمه سی اولدینغی سویلکه بزی سوق ایدیور :

وطن، اولاً تولد ثانیاً تربیه ایله طبیعت و اخلاقده مشترک
عین افکار و حسیات و اخلاقه مالک اولان عین قانون و تشکیلات
تحتنده یاشایان انسانلرک هیئت مجموعه سیدرکه بونلرک سائر
اقوامکندن آیری برطوپراقده ینه آیری تشکیلات ، اخلاق ،
افکار ، حسیاتده ؛ — ظفرلر ایله واجدادک مجتمه آ دوچار
اولدقلى آلام ایله نامدار اولان برماضیه پرستش ایدر ، —
متحد قالمق ایچون قطعی آرزولری واردر بو حسیات عصر حاضر
انسانلرین انسال قدیمه و مستقباه ایله برلشدریر . — روح وطن
نامی و یردیکمز ایشته بودر .

اکثریای رقابت و خصومت سائقه سیله اشخاص ، جمعیات ،
شهرلر و ایالات دیکدیگریله چار بشیرلر . فقط مادی و معنوی منافع
عمومیه مسئله سی ظهور ایدنجه رقیبلرک ، دشمنلرک غاوغانی
براقه رق باریشدقلىخی و تعاون لزومنی حس ایتدکلرینی کورورسکز .
اکر وطن تهلکه یه دوشرده فدای جان ایتک لازم کلیرسه ضعیف
آدملره ، قادین و چوجوقلره وارنجه یه قدر بوتون افرادن ملتک
برر قهرمان کسیدلیکی کورولور .

فقط بومرتبه یه واصل اولان وطنیه و رلک انسانلرک ، اقوام
بیننده کی اختلافاتک ازانه سندن انسانیت محبتده انتقال ایچون ،
مرورینه مجبور اولدینغی بر صفحه تکامل مشابه سنده در
دینه جک . — شهرلر و ایالتلر بیننده کی اختلاف وضدیت

مرور زمانه زائل اولدینی کبی برکون کلوب اقوام بیننده کی
فرقلرک دخی اورتهدن قالقه جنی شیمیدین کشف و تخمین
ایدیله مزمی ؟ اقوامک بری برینه قارشى خصوصیت و نفرت
بسله میوب عادلانه و دوستانه معامله ده بولنه سی لزومی درک
ایدیلیور . دها ایلریمی امید ایدیله مزمی ؟ یر یوزنده بوتون
انسانلرک سوشوب یکدیگرینه قارداش کبی معامله ایتدکلی
زمانه بر آن اول واصل اولمق ایچون چالیشمالیمیدر ؟ اوزمانده که
حدود دنیلن بوصنی انکلر اورتهدن قالقه جقدر . بوانکلر
باقی قالدقه خودینلک سائقه سیاه و منفعتک لایقیه تقدیر
ایدیله مامسی یوزندن دائما بر جدال مسلح ظهورندن قورقو لمازی ؟
وطنپرورلک عايله داری و انسانیت محب اولانلر بویله سویلرلر .
بودواتک حسیلنده کی علویت و صمیمینه اعتراض یوقدر .
فقط ظنمزجه تصورلری بر خیالدر . حقیقته مقرون اولماسی
لازم کلسه بیله بشریت ایچون حقیقی بر ضرر تشکیل ایدردی .
مرور ایامله شهرلر و ایالتلر بیننده کی فرقلرک زائل اوله جق
مرتبه ده آزالدینی طوغری دکدر . کوچوک وطن محبتک
زمانزده هروقتدن زیاده شدتلی اولدینی کورو یورز . بو محبت
هر نوع جمعیات دوستانه و عدم مرکزیت تشبثاتیه ظاهر اولمقده در .
بو جمعیاته داخل اولان ، بوقیل تشبثاتده بولسان فرانسلرک
فرانسه یی پارچه لمق نیتی و وطنی آلتی یدی عصر اوله ارجاع
تصوریه اتهام ایدیله بیلیری ؟ بوهم حقسز و هم عبث اولور . بالعکس .

لا یقیه آکلاشیلوب اجرا ایدیلاں کوچوک وطن محبتی بویوک
 وطن محبتی برقاتدها تقویه و تنویر ایدر و هرکسک مولدی اولان
 ولایتک خصوصاً تنه کرره اقبال و شمشه سنی تزییده چالیشمه سندن
 بوتون فرانسه ماده و معماً مستفید اولور .

اقوامک انسانیت قارشو سنده کی حالی ده نه ایچون بویله
 اولماسون ؟

بر کون کلوبده قومیتک اورتهدن قالقه جفی مطالعہ سی
 ناصل اولورده جدیدته مدافعه ایدیله بیلیر .

عین اسباب عمومیه نک عین شرائط آلتنده اجرای تاثیر
 ایتمکده بردوام اولسی و بناء علیه نتائج حصوله کتیرمسی بر قاعده
 طبیلیه در . له پنینچک : « حال حاضر ماضی ایله طولو اولدینی
 ایچون استقبالی ده حاملدر . » دیمکه حق واردر . مادامک ماضیده
 مؤثرات ارضیه و اقتصادیه ، تأثیرات پیسیقولوجیه و فیزیولوجیه نک
 انضمامیه انسانلرک اقوام مختلفه یه ایرلسنی موجب اولمشدر .
 اقوام حاضر نک تماماً مقرض اولدینی فرض ایداسه بیله دیگر
 اقوامک تشکلی ضرویدر .

تاریخده بومطالعات نظریه یی اثبات ایتمکده در . بر چوق
 کره فاتحلرک اقوامی بولوب کچهرک وجسیم ممالکی تحت انقیاده
 آلهرق محکوملره عین قرانینی و عین حکومتی تحمیل ایتدکلری .
 کورولمشدر . فقط آزچوق اوزون بر زمان صوکره بویوک
 دولتر غائب اولمش واسکی قومیتلر یکیدن میدانه چیقمادیسه بیله

اولئك یرینه دیگر یکی قومیتلر ظهور ایلشدر .

شبهه سز فنون و تطبیقاتلک فتوحاتیه اقوامک مناسباتی کوندن کونه چو غالوب، افکار و حسیات مشترکهک مقدار ی چو غاله رق اخلاق و اثر لرنده مشابہت کیت کیده تزايد ایدہ جکدر . بونقطه نظر دن ژاپونیا لیلرک و چین لیلرک اقوام غربیه ایله مناسبتلرینک تاثیراتی واضح بر مثالدر . فقط اقوامک عین مزاج و عین اوصافی و بناء علیه عین اخلاقی حائر اوله رق عین تأسیسات عین قولینه مالیکتی موجب اوله جق قدر یکدیگرینه بکزه لیرینک امکانی اولمدیغنی حادثات کوستردیکی کبی نظریات دخی بوس بوتون تأمین ایدر . بوتیجه جان صیقه جق یرده ممنونتی موجب اولمیدر . اختلاف و تنوع مضر مجادلاته سببیت ویرمیدیکی تقدیرده شبهه سز ترقی و تکامله سبیدر .

بناءً علیه قویاً امید اولور که کوندن کونه چو غالوب سهولت بولان مناسبات و رابط سایه سنده اقوام یکدیگری ده ائی طانیه جق و آرا لرنده کی حرمت و محبت آرته جق و تعاونک لزومی تقدیر اوله رق معاملات بین الاقوام عادلانه و دوستانه بر شکل آله جق و هر قوم تکمل ایچون دیگر یله یاریشه رق ترقیات عمومیه کیتدکجه سرعت و وسعت پیدا ایدہ جکدر .

بو بولده شایان قید ترقیات وجوده کلدیکی انکار ایدیله مز .

بن الاقوام حب موالات کوندن کونه آرتقمده در . لاهی

محکمہ سی، تحکیمہ متعلق معاہدات، قوانین، سرکیر، جرائم
 و غلہ مسئولیہ قارشی مدافعہ مشترکہ مقصدیہ و یا خود تجارت
 و حرف و صنایع حمایتی ایچون عقدایدیلن انتلافلر صلح عمومی
 طرافدارلرینک امیدلرینی تقویہ ایدہ جک برر علامتدر .

سکزنجی فصل

رفائیل مدنیہ — خدمت عسکریت

اردو و حکومت عوام

وطن فکرنک و وطن محبتک هیچ دکلہ آکلادیغمزہ
کورہ قیمت و ماہیتی تمین ایدلدکن صوکرہ بر دہ موقراسیدہ کی
تربیہ و طنپورانهک نہدن عبارت اولہ جفنی کوسترمک سہولت
پیدا ایدر .

اول امرده شونی تکرار ایدلم کہ وظیفہ سادہ جہ و طنی
سومک دکلدر . ایلکین بر قابلیت جبلیہ ایلہ و بعدہ تربیہ سوبیلہ
ابوین ناصل سویلترسہ وطن دہ اویلہ سویلر . فقط اوئی ای
سومک لازمدر کہ ایشک ایجہ نقطہ سیدہ بودر . آریستونک
فضیلتک افراط ایلہ تفریط آراسندہ، اعتدالده اولدینی حقندہ کی
نظریہ مشہورہ سنی در خاطر ایتمک تام یریدر . — غرور
و طنپورانهک «شوونیزم» ک نہ قدر مدخول و ناحق اولدینی
یوقاریدہ سویلشدک . دیگر جہتندن دہ بر چوق کیمسہ لڑک
و طنلرینہ اولان محبتی، و طنپور لک مخالفت مرتبہ سنہ وار مقسزین
اویوشوب قالمشدر . شہہ سز تہلکہ زمانندہ قلبلرنده کی حسیات
قومیہ اویانیر، اهتزاز ایدر، فقط علی العادہ مملکتی همان دوشونور
دوشونغز کیمدرلر .

ایمدی حقیقی وطنپرور لک سائر فضائل کبی بر اعتیاد ثابت اولمی و انسانک بوتون حرکاتی اوزرینه اجرای تأثیر ایتلیدر اوصورتله که افعالک کافه سندن مملکت ایچون بر خیر تولد ایدیه جکدر . بر قومک اقبال مادی و معنویسی چفجیلرینک ، صنعتکارلرینک ، تاجرلرینک ، عمله سنک ، ارباب هنرینک ، علماسنک ، حتی وظائف بیتیه لرینک ایفا سنده و مسلک لرنده بیه فکر وطنپرورینک ایجاباته درجه اتباع لرله متناسبدر .

فقط بر طاقم وظائف وارد در که بونلر طوغریدن طوغری به وظائف وطنیه بی تشکیل ایدر و اوچ قسمه آیریله بیلیر : قانونه رعایت ، حق انتخابک استعمالی و خدمت عسکریه .

قانونه رعایت بعضاً سویلندیکی وجهله قوانینه کورکورینه اطاعت ایتک دکدر ؛ زیرا واضع قانون اولانلر نه قدر حسن نیت صاحبی فرض ایدلسه (فی الحقیقه اکثریت اوزره او یله در لرده) هر حالده انساندر ببناء علیه خطایه معروضدر لر . دیگر جهتدن بر زمان ، و بر طاقم شرائط آلتنده غایت موافق اولان بر قانون حال اجتماعی تحول ایدنجه فائده سز ، مضر و حتی مغایر عدالت اولورده تعدیل ویا الغاسی اقتضا ایدر . ببناء علیه منورالفکر بر کیمسه نک ، بر قانونک ، — قذاعت وجدانیه سنه مخالف — اوامر و نواهیسنه اطاعت ایله مکلف اولماسی ایجاب ایدر . فقط بر قانون باقی قالد بیه هیچ اولماز سه عدم اطاعت حالده استلزام ایتدیکی جزایه قانلانهرق اوکا ، طولایسیله اولسون

تابع اولق لازمدر . وجدانك كوسه تردیکی خط حرکندن
آته لیره خوش کورونمک ایچون انحراف ایتک ایسته میان
سوقراط بویله یامش و قانونه اطاعت ایتماش اولماق ایچون
حاکمیری طرفندن ویریلن جزای اعدای قبول ایده رک بر
سکون قهرمانانه ایله زهری ایچیویرمشدی :

افراد وطندن هریری ، قوانین موجوده حقننده دوشوندکیری
سویلمک ، بونلرک اصلاحی ایچون النیدن کلنی یامق ، و
وطنداشلیری ده کندی فکرینه تشریک ایتک اوزره - شبهه سز
حریتلرینه تجاوز ایتمکسزین - صرف مقدرت ایتک حتی محافظه
ایدر . هر حالده رأی ویرمکدن قطعاً چکینماملیدر . بر آدم
رأیندن واز کچرسه مضر کوردیکی احوالک دواوی و یاخود
نامزد اولدینی ایشه لایق و مستحق کورمدیکی بر وکیلک انتخابی
مسئولیتنی درعهده ایتمش اولور . بونلر کنجلره وملتک افراد
مستقبله سینه سهولته آکلاتیلوب قبول ایتدیریله جک قواعد
اساسیه در . بناء علیه بویاده ده فضلّه سوزه احتیاج یوقدر .
وظیفه عسکریه کنبجه بونک اساسنه اعتراض ایدنلر بولندی
کبی ایفاسی ده هر حالده مشکلدر .

شبهه سز حرب مدّش بر آقندر . واولجهده سویلدیکمز
وجهله اقوامک افراد کبی یکدیگرینه عدالت و محبت قواعدینه
کوره معامله ایتدکیری وینلرنده کی اختلافاتک ندرت پیدا ایتدیکی
وظهوری حالنده صورت مصلحانهده حل ایدیله بیله جکی زمانک

وړودنی بوتون قلبمزه تمنی ایدرز . اوزمان که قوملر تعاونک لزومنی تقدیر ایدهرک انسانیتک ترقیات مادیه ومعنویه سنه مشترکاً چالیشه جقلردر . بعض کیمسه لړک ادعا ایتدیکی وجهه بوزمانک اوقدر اوزاق اولدیغنی کوستره لړک تسلی وامید ویره جک وقایع کوندن کونه تکرر ایتکده در . فقط شوده کوریلور که صلح عمومی فجر شمشه داری هنوز انفلاقپذیر اولمامشدر .

دیگر جهتدن کینلک اثبات ایتدی کمز وجهه اقوام مختلفه نلک اورتدن قلوب بولرک یرینه انسانیتک قائم اولماسی خیالنه ده قایلیمیدر . بالعکس اقوام مختلفه نلک و آیری آیری وظینلرک بقاسی انسانیت ایچون مر جب فائده در . بناء علیه هر قوم دیگر ی طرفدن هجومه اوغرا دینی تقدیرده مدافیه آماده بولنسی و حقوقی طانیوب آیاق آلتنه آلدینی زمان مطالباده بوله بیلیمسی ایچون وطنک افراد مستقبه سنه بر تربیه عسکریه ویره لړک حاضر لنسی لازم کلیر .

عسکرلک ایچون البته اول امرده قابلیت جسمانیه و اوصاف فکریه و اخلاقیه لازمدر . فقط بونی آنجق بر تربیه مخصوصه نقطه مطلوبه ایصال ایدر . تعلیم عسکری زمانک ممکن اولدینی قدر قیصالمه سی هم افراد وهمده جمعیت ایچون شبهه سز فائده لیدر و بوکا تحصیل و تربیه متقدمه سایه سنده موفق اولنه بیلیر .

ابوین چو جوقلرینی افساد ایتمز و معلمین بو چو جوقلرک ذکالرینی ، — وطن و فکر مدنی القا ایدهرک — ابوینک معاونیله ،

اخلاق و قلبلرینی تربیه ایدر لرسه عسکر معلم و مربیلرینک وظیفه سی چوق تسهیل ایدلمش اولور .

دیگر طرفدن جیمناستیک تدریساتی مکتبلرک درسلی میاننده بر موقع مهم اشغال ایتلی . جیمناستیک صحت بدنیه ایچون اولدینی قدر روحک صحتی ایچون ده الزمدر . بنیه یه اعتدال ، اعضایه قوت ، حرکاته سهولت و جرأت نظرو فکره اصابت ، اراده یه قطعیت و جسارت ویرر . بونک ایچون مکتبدن چیقدقدن صکره دخی جیمناستیک جمعیتلرینه داخل اولان کنجبلر پک زیاده تقدیره لایقدرلر . کندیلککندن بویولده هوش کوسترمیان چو جو ققلرک آنا و بابازی اولادلرینی تشویق و ترغیب ایتک وظیفه سیله مکلفدر . جیمناستیک جمعیتلرینی اداره ایدن ذوات دخی کنجبلره حرکات منظمه یی ، قوشوب آتلامنی اوکره تهرک بومؤسسهری عسکرلک تحصیلی ایچون برر اعدادی مکتبی حالنه قویمقده کی منفعت عظیمه یی تقدیر ایتشلردر .

فقط مکتبده وبالاخره داخل اولدقلری جمعیات مختلفه ده کنجبلر عسکر ایچون الزم دیگر بر خاصه ده اکتساب ایدرلرکه بوده فکر اطاعتدر . اطاعتکار اولمق آلدان اوامره آکلامقسزین کورکورینه اطاعت ایتک هله جزایه اوغرامق قورقوسیه انقیاد ایلک دکلددر . بویله بر اطاعت آنجق برماکنه یه ، بر حیوان ویا اسیره یاقیشیر .

اطاعت دوشونوب رضا کوستربله رک اجرا ایدلمدکجه بر قیمت

اخلاقیه و فائده حقیقیه بی حائز اوله ماز . اطاعت ایدن کیمسه نك، آمرک ناموس و صلاحیتیه اعتمادی اولمیدر . بوصولته اطاعت بر اطاعت احرارانه در ؛ زیرا آمر بر مقصد مشترکه ساعی دها منور و دها مسئول بر عضو ، بر ترجمان موقعنده اولدیغندن ، کندی وجدان و عقله اطاعت حکمنده در .

فکرا طاعت بویولده تلقی ایدلدیکی تقدیرده یالکیز عسکره دکل ؛ عملیه ، هر هانکی بر اثری مشترکاً وجوده کتیرمک ایچون چالیشان کیمسه لره و مکتبیلره لازمدر . شبهه سز بوحس اطاعت و انضباط مکتبده اوکرنمکه باشلانیر . شبابک تحصیل و تربیه سی حقنده شویندکاریمز بونی مع زیادۀ اثباته کافیدر .

بو خصوصده مؤسسات تدریسیه ایله کنجترک داخل اولدقلری جمعیات مختلفه ، بالخاصه معاونت متقابل و جمیاسیتیک جمعیتلری بروظیفه ایفا ایدر . زیرا بوراده کی اطاعت صرف اختیاریدر . جمعیت افرادی جمعیتک نظاماتنه ، اوکره نوب قبول ایتدکدن صکره اطاعت ایتدکاری کبی رئیسلیزینک انتخابنه دخی اشتراک ایدر لر . مقدم ، دقتلی و غیور اولوق صرف کندی ایسته دکلیرینه قالمشدر ؛ تشبث شخصیلریله تربیه لرینی اکیال ایده جکلردر . بوصولته اوافق بردائر داخلنده حیات عمومی و مدنیه نك و مقتضیات و وظائف مختلفه سنه عملی اوله رق آلیشیر . کنجدر روحلرنده اویانمش اولان اذواق عالییه مآذونین جمعیتلری ، مطالعه انجمنلری کبی مؤسساتده دخی بول بول غذا

بولورلر ؛ موزه و کتابخانه لری حسابہ قاتیمورز . ایسته بویله کرک بدناً و کرک معناً صحت ، متانت ، قابلیت و ظرافت اکتساب ایدرک صاعلام وجود صاعلام بدنده بولنور حکمت قدیمه سنی ممکن اولدینی مرتبه موقع تطبیقه وضع ایتیش اولورلر .

فقط بولر کافی دکلدر . کنجلرک کرک تربیه مدینه و کرک تربیه عسکریه لری اکیلاچون عساکر منتظمه نک قادرولرندن کچرک تربیه مشترکیه تابع اولسی مقتضیدر .

خدمت فعلیه معترض اولانلر وار . عمومیت اوزره آلایده کچیریلان زمان کرک افراد و کرک جمعیت ایچون ضایع اولمش عدا اولنور . فقیرز نکین حکم قانونه تبعیتدن مجتنب بولنورلر . قشله لرده هپ برآزاده کچیریلان حیات غایت قرانلق تصور اولور ، تعلیمک و یردیکی یورغونلانی ، خدمت عسکریه نک قیودات و شدتی اعظام ایدیلرک تحمل فرسا عدا اولور . دیمک عسکرلکدن قور تولق ایچون الدن کلدیکی قدر چالیشمقدن باشقه چاره یوق . ممکن اوله مزسه قانونه ایسته میهرک زور زورینه اطاعت ایتمک ایجاب ایده کچدر . بو حال ایله قانونک ملت و افراد دن بکله دیکی فداکارلقدن بحق حصه دار اولق ناصل ممکن اوله بیلیر . بو حاله سبب اولان فکر باطلک سقامت و مضرتی ، میدان قویمق الزمدر .

یوقاریده بیان ایتدیکنز اساسلری شو مناسبتله در خاطر ایتمک کافی : صلح عمومی و ترک تسلیم حاته انتظاراً حال خاضردن

اختلافات مسلحہ ظہوری دائماً ملحوظ بولدیغدن حاضر بولمقی
لابددر . افراد ملت عسکرک ایچون حاضرلوب بووظیفہی
حسن ایضا ایدہجک خالدہ بولمیرلمدجہ ملت مسلحہنک ناأل
مظفریت اولہمیہجفی ایسہ محققد ر .

بناءً علیہ خدمت عسکریہہ عائد مجبوریت قانونیہنک
ایستہمیہرک دکل جان وکوکلدن برشوق ایلہ قبول ایدیلہرک
خدمت فعلیہنک دوا میمدتجہ آمرلرک ویردیکی ہردرلودرسندن
بحق استفادہیہ غیرت ایدلمسی ایجاب ایدر .

بوندن باشقہ حال حاضرده کی خدمت عسکریہی تربیہ
مدنیہنک برمتتم لازمی اولہرق تلقی ایدیورز .

کنجدرک مساواتی اوکر نہسی ایچون اردودن دہا ای بر
مکتب بولہ بیلیرمی؟ اورادہ آراتق نہصنف، نہثروت وتربیہ
فرقی قلامش ہسی قاریشوب بلیرسز اولمشدر « بوکون قانون
بوتون جہہلرہ عین سویہ وقار ویردی . زینت، سفالت ایکسیدہ
قیافتک یکنسقلانی آلتندہ برلشہرک غائب اولور . افندی ایلہ
اوشاق، اوستہ ایلہ ایرغاد برر عسکردر، باشقہ برشی دکل . ہر
درلو طرز معیشت بر موجودیت مشترکیہ انقلاب ایدہرک درلو
درلو تمایلات عین قانونہ انقیاد ایلہرک متجانس برخلیطہ وجودہ
کتیرمشدر [*] » .

رفاه حاله نائل اولان صنوفه منسوب کنجلر ایچون باشقه درلو تربیه کورن و طنداشلرینی طایبق و تقدیر ایدوب سومک ایچون عسکرلک الک ایی بلسکه یکانه برفرستدر ؛ زیرا ظرفک خشونت و قبالی آلتنده اکثریت اوزره بر عقل سلیم ؛ حتی نزاکت فکر و حسیات رقیقه مخفی ؛ هر حالده طوغریلق وایسک موجوددر . بوتون آرقداشلر عین وطنک اولادی اولدقلرینی اثبات ایده‌جک اوصاف مشترکه اراانه ایدر .

بو عناصر مختلفه‌نک مصادفه و امتراجی باقک نه کوزل نتیجه‌لر ویریور : « وطنک مدافعه‌سنه تقویت ویرمک ایچون هر برینک کتیردیکی اوصاف شویله خلاصه اوله‌بیلیر : کویلی تحمل ، ایش‌جی غیرت ، مسائلک فکریه اربابی تحصیل ايله بارلادلش بر ذکا کتیرر . شو اوصاف ثلثه امتزاج ایدره‌ک داغیلوب بوزولماز بر حزمه وجوده کتیرر . بوندن باشقه تماس نتیجه‌سی اوله‌رق هر عنصرک اوصاف مخصوصه‌سی دیکرینه انتقال ایتدیکی حاده نقایس تحفیف ایدر . الویررکه قصورلر تصحیح و اوصاف ممدوحه‌یی تمییه ایچون آمرلر صورت دائمه‌ده اجرای نفوذ ایتسونلر . »

بو کنجلر آره‌سنده آنجق مزیت مدار تمیز اوله‌بیلیر که اکتسابی ایچون الک باشلی واسطه هر کس ایچون ممکن اولان حسن یتدر . زیرا عمومیت اوزره موفقیّت سعی و اقدامک مکافاتیدر . بو حالده حیات مدنیّه مراتب‌بنجه کریده بولمان برکیمسه

مراتب عسکریده ایلرویه کجه بیلیرکه تربیه اجتماعیه ایچون بویوک برفائدمدر . بوفوئاددن بحق استفاده ایچون ایسه اولجه حاضرلشم اولمق شرطدر. اونک ایچون ابراز لیاقتله استحصال ایدیلن آمرینه اطاعت واک اوافق مراتب اصحابنه بیه حرمت و انقیاد خصوصنده ذیکرلرینه نمونه اوله جقینه ای تربیه کورمش کنبجلا در.

منشأ و تربیه اعتباریه او قدر مختلف افراد ایچون عسکرلک خدمات متقابلده بولونمغه نه مساعد بر زمین فرستدر. اوسایده حسن تعاون کسب تقویت ایدر. تحصیل و تربیه سی مکمل اولانلر آرقداشلرینک سویه اخلاقیه سهولته یوکسلیتمویرر. اگرکنج عسکرلر بو حقایقه نفوذ ایتمش اولسه لر بر چوق سوء تفهیمات زائل اوله رق صنوف مختلفه بیننده کی بیسود منازعات مندفع اولوردی .

وظائف عسکرینه نک لایقیه آکلاشیله رق اجرا ایدلمه سی اوصاف مدنیه اوزرینه دخی پک زیاده حسن تأثیر ایدر . ده موقراسیده ای بر وطنپرور حریتک نشوؤ مشوشیله مست اوله رق هر درلو نواهییه و آمرینه قارشو عصیان ایدر بر آدم دکدر . بلکه یوقاروده کوس تردیکمز وجهله حریتی عتله توفیقاً بالذات تنظیم ایتکی بیلیر و آخرک حریتیه رعایت و قانونه اطاعت ایدر بر آدمدر. بوتون بو اوصافی اکتساب ایچون ایسه قطعات عسکریده بولونان منور الفکر و حسن نیت صاحبی

امرانك معیتده مساعد بریر بولونه ماز .
 ضابطلرک عادتاً حکومت ایچنده حکومت کبی ملت ایچنده
 آیری بر صنف تشکیل ایتدکبری زمانده دکاز . اوزمانلر افراد
 حرب ایچون تلمیم ایدلدیکندن کورکوزینه وعادتاً ماکنه واری
 بر اطاعتله مکلف طوتولوردی . ضابطلرله عسکر آراسنده بر
 اوچورووم واردی . بوکون ایسه ضابطلری عزکیت کیده آکلایورلرکه
 ملت کندیلرینه الک قیمتدار شیئی ، شبانی بر مدت ایچون
 تودیعی ایتمشدر . بوشبانی هر نقطه نظر دن اصلاح ایدرهک
 اعاده ایتمکه مجبوردرلر .

ملکتهک مدافه سنی احضار ایتکینه وظیفه اساسیه لیرینی
 تشکیل ایدر . بوندن باشقه بزده مربیلک وظیفه سیله مکلفدرلرکه
 ایکنجی درجه ده اولمقله برابر عین اهمیت حائزدر . اللرندن
 چیقان کنج . فکر اخلاقی صاعلام بوتون قوا و ملکاته
 صاحب بر مملکت آدمی اولمیدر . حیات عائله نک لذارنددن حیات
 مدنیه نک سر بستیسندن بر مدت محروم اولمغه مقابل تربیه سنی
 اکمال ایتمش بولونمیدر . بو فکر جدید سایه سننده قوماندا
 ایدنلر وظیفه اجتماعیه سنک اهمیت و مسئولیتنی لایققله تقدیر
 و اطاعت ایلینلر بکرک نفسلرینه و کرک وطنلرینه قارشو الک
 بویوک بر حسنیت ابراز ایتک ایلله مکلف اولدقلرینی آکلایه رق
 ایکی طرف ییننده افکار و حسیاتجه بر اتحاد صمیمی حصول
 بولور . واردو حکومت عوامده حائز اولمسی لازم کلن ماهیتی

اگتساب ایلہ بوتون ملتک برتمثال محتشمی اولور .
 فکر عسکرینک بزی بی لزوم محارباته سوق ایدہ رک صلح
 داخلی وخارجی بی اخلاص ایتہ سندن قور قولماز . بر آدم اسقریم
 وبوقس اوکرنمک وکولش ایتکی بیلمک ایلہ مطلقا غاوغاجی
 ودوکوشکن اولماسی اقتضا ایتمز . بالعکس قوت ومہارت صاحبی
 اولمق انسانہ اکثریتہ صبر علوجناب ویرر . عین زمانہ قوتی
 بیلنر طرفندن دہا زیادہ حرمتہ مظهر اولور . اقوام ایچوندہ
 حال بویلہ در . قوملردہ کندی قوتی نہ قدر حس ایدرسہ
 او قدرده سکوت ووقارینی محافظہ ایدر . وقارشوسندہ حقارت
 وحقسزلغہ جرأت ایدہ جکلردہ دوشونمکہ مجبور قالیر . برملتی
 ایستہ دیکنی ویاہ بیلہ جکفی بحق حس ایدہ جک حالہ کتیرن شی
 ایسہ یوقاریدہ ایضاح ایتدیکمز شرائط داخلندہ کورہ جکی تربیہ
 عسکریہ در . اوصورتلہ کہ اردو صلح اجتماعی و بین المللہ بر مانہ
 کبی عد اولونہ جق یردہ صلحک بر لازم غیر مفارقی واقوامک
 دائما نصب نظر وامل ایتدیکی آہنک عمومی دورینہ طوغری
 ترقیسی ایچون برواسطہ لازمہ اولہرق تلقی ایدملیدر .

طلقونجي فصل

ده روز فراسيده قاديانك رظيفه اجتماعي

افكار و عادات و تاسيسات جديده نك ترقيا تي قاديانك
عائله ده، حيات عمومي ده و حتي حيات سياسي ده كي وظيفه اجتماعي سني
تعيين مسئله سي اوزرينه انظار دقي جاب ايتكده در .
هر حالده بو وظيفه پك بويوك بر اهميتي حائز در . قادين
خلقۀ مهيب بر قوته مظهر در ، بوني سوء استعمال ايده بيله چكي
كي عمومه پك نافع بر صورتده ده صرف ايده بيلير . او صورتله كه
بر قومك قادينلرينك باخصوص زوجه و والده اولمق اعتباري
ايله دكري نه ايسه او قومك ده دكري اودر ادعاسي تاريخ ايله اثبات اولونه
بيلير . زوجه و والده لرك دكري ايسه قانونك كنديلرينه ويرديكي موقع ،
آلقلري تربيه و كوردكلري معامله ايله متناسبدر . قادين اسارت
آلتنده بولونديني يرلرده كنديني اسير ايدنلري افساد ايدهرك
رخاوت و مذلته كرفتار ايليهرك اخذنار ايدر .

سوقراطك وقتيله بيان ايتديكي اوزره قادين معنوي نقطه
نظردن ار ككه مساويدر . طبيعتك عائله ده كندينه باخصوص
چو جو قلك تربيه سي خصوصنده تحمیل ايتديكي وظائفني حسن ايفا
ايد بيلورسه في الحقيقه قادين ار ككه متساوي اولمش اولور .

محبت ، شكران و حرمت پناهي اولان والده چو جو قلكري

نظرندہ وجدان اخلاقیك ، وظیفہك بر تمثال مجسمی اولہ بیلیر
و اولہ لیدردہ ؛ چو جو قمر ایچون والدہ لری اوکندہ موجب
حجاب اولہ جق بر حرکتندہ بولونماق بر اندیشہ دائمہ حالی آلمیدر .
زوجه یہ کلبجہ رفیتی ایچون دائما مظاهرتہ آمادہ بر یارصادتی ،
فکرنندہ استفادہ ایدیلیر بر مشاور اولوق کرکدر . زوجه
اویخی سویلی بر یووا جالہ قویہ بیلملیدر . بونک باشلیجہ زینتی
ینہ کنیدر . زوجنک عین زماندہ ہم باعث نشاطی و ہمدمہ
مدار مفخرتی اولہ جقدر .

بناء علیہ قادینک زوجه و والدہ اولوق اعتباریلہ کندینہ
توجه ایدہ جک وظائفہ موافق بر تربیہ کورمسی لازم کلیر .
وحتی قادینک تربیہ سنہ ارککلرنکندن زیادہ اہتمام کوسترمک
اقتضا ایدر .

قادین ایچون ایستدیکمز شی ارککنکی قدر واسع بر
تہذیب فکری دکلدیر . فکر نسوانک بونقطہ نظرندن قابلیتہ
ایراث نقیصہ ایتکی قطعاً خاطرہ کتیرمیہ رک دیرزکہ بعض
استاذہ الرذن صرف نظر قادین الذ زیادہ بر مخلوق حساسدر . حسیاتنک
نزاکتی معلوماتندن نقصانلری مع زیادہ تلافی ایدہ بیلیر . بزم
ایچون حائر اہمیت اولان قادینک چوق شی بیلہ سندن زیادہ
طوغری و سالم بر تمیزہ ، متین بر ارادہ مالک اولمسی و وظیفہ سنی
بحق ادراک ایلہ اوکالایقی وجہلہ حاضرلہ رق نہایت اووظیفہ سنی
حسن ایفا ایدہ بیلہ سیدر . بویلہ اولدقدن صکرہ مولیہ رک سویلی

(هانریهت) ی « یونان لساننی بیسلمکمزین » « نفوذ نظره مالک » اولماسنه هیج برمانع یوقدر . وحقی زوجنه رفاقت فکریهده بولمق ، چوجوقلرینک ایلمک مربیه سی اولمق و بالا خره مکتبده کی مساعیلرینه نظارتله تحصیلرینه معاونت ایتک ایچون قادینه بو وقوف و عرفان لازمدر .

فقط بوتون بونلر قادینک صرف امور یتیمه ایله مشغول اوله رق عائله نك اعاشه سی تأمین خصوصنده یالکیز ارککه عائد بولونماسی مقتضیدر . فی الحقیقهده بویله اولمیدر . مع التأسف فعالیت اقتصادیه شرائطک تحولاتی آرزو اولونان بوخاله مخالف بر نتیجه ویرمشدردر . کندی امکله یله کچمه که ویا هیج اولمازسه عائله نك اعاشه سنه یاردیم ایتکه مجبور اولان کنج قیزلره قادینلرک مقداری کیتدکجه آرتقمدهدر . بو حال یوقاروده بحث ایتدی کمز وجهله عائله لرك رونق ورفاهنی غائب ایتسنه الکزیاده تاثیرایدن اسبابدن بریدردر . فکر مزه قالیرسه زمان حاضرک اخلاق و روشندهده مخالفدر . یواش یواش قادینلرک بر چوق صنعتلرده ارککلرله رقابتیه باشلایه رق یومیه نك تنزلنه سببیت ویررلر . بوندن طوغریدن طوغرییه ویا طولایسیله الکزیاده متضرر اولان ینه کندیلریدردر .

فقاله ناصل چاره ساز اولمالی ؟ بو غایت نازک بر مسئلهدر . قانون وضع ایدنلرک حسن نیتلرینه رغماً شمدییه قدر شایان اهمیت بر نتیجه په دسترس اولدقلری کورلمپور . بالعکس مثلاً

چو جو قلك و قادينلرك دستكاه ، فابريقه و اوجاقلرده
استخدامى حقنדה تنظيم ايديلن قانون منتظر اولان نتيجه
ايله طببان طبانه ضدنتايح حاصل ايتديكى كورلمكده در .

بوراده دخی دوا بالخاصه معنويدر . كنجلرك چالشمغه ،
اعتدال واقتصاده آليشديرلسى وقادينك بالخاصه اموريبيتيه
حصرمساعى ايتمنه مساعد شرائط ايچنده برآن اول برعائله
تشكيل ايتك آرزوى قطميسنى بسله مسى لازم كليز . زوجينك
هربرى طرفندن اجرا ايديله جك تصرفات قادينك اول امرده
صحتى و ثانياً عائله نك رفاه مادی و معنويسى ضررينه اوله رق
قازانه جنى حقير اجرتى مع زياده تلافى ايدر فكرنده يز . منتظم
برحيات كچيرن قادينك اوندن آيرلمقسزين قادينلغه ياراشير ال
ايشاريله مشغول اوله جق وقت بوله رق حين حاجتده زوجنك
قازانجه كندى طرفندن ده برشتى علاوه ايتمنه نه مانع واردر .
بويله اولسه ار ككلر ده از ياده قازانير و عموم دها كارلى چيقاردى .
كرى يه حيات عموميه و حيات سياسيه قاليور . بر قاچ سنه دن
برى قادينك بوتون حقوق سياسيه و مدنيه يه نائل اولماسنى طلب
ايدن فمنيستلرك مدعياتى قارشوسنده بولنيورز . بوبابده ناصل
بر مطالعه ده بولنقى ايجاب ايدر .

بزه قاليورسه قادينلرك حقوق مدنيه دن تماماً مستفيد اولمامسنده
هيچ بر محذور متصور . دكلدر . قادينك فكر آراككك
مادوننده عدايدلديكى وعقل سليمه مالكيكى قبول اولنمهرق بر

تابعیت دائمه آلتنده بولغسی ادعاایدیلکی زمانده دکلز . وقایع وافکارک ترقیسی بوبی معنا و منفور خرافهیی ابطال ایدهرک قوانین بونقطه نظر دن تمذیل ایدلمکه باشلادی . سن رشده واصل اولان بوتون قادیلرک عقوداتده شهادتلی قبول ایدیلور ؛ تجارتله مشغول اولان قادیلر مأمورین تجاریه نك انتخابنده صاحب رأیدرلر . ذات الزوج بر قادین سعی ذاتیه قزانیدی شیک صاحب منفردی اوله رق طانمقده در . بوصورتله حرکت حقوقیه دوم ایدهرک نهایت قادیله ارککک حقوق مدنیه جه مساوات تامه سی تأسس ایده جکی محققدر .

حقوق سیاسیه کلنجه بونلری الده ایتدکدن قادین نه قازانیر بز آکلایه میورز بالعکس ضایع ایده جکی شیلر میدانده در .

قادین منتخب و منتخب اوله بیلیرسه مجادلات سیاسیه قاریشمه سی اقتضایده جکدر . عجبابونی کرک کندی و کرک عائله سنک حیثیتی اخلاص ایتدکسزین اجرا ایده بیله جکی ؟ ارککلر ایچون بیله اکثریتله تهلکلی و تحملفر سادر . بومجادلاته قادیلر ناصل تحمل ایده بیله جک ؟ — قصور وارسه زمان حاضرک اخلاق و مشوارنده در ؛ قادینک حیات سیاسیه مداخله سی بونواقصی ازاله یه مدار اولور دینه جک . فقط محققی ؟ بزجه بونقطه تمام آشکو کدر ، بخصوص منتخب و نامزد اولان قادینک مخاصات سیاسیه دن چیقهرق عائله سی ایچنه عودتیده زوجیه

ووالدهك مزيتمك پك زياده دوچار ضعف اولمش بولونم سندن
قورقارز .

بالعكس قادين عائله دن آيرلمق سزین غایت نافع برتأثیر سیاسی
اجرا ایده بیلیر . وایتملیدر ظن ایدرز .

برقادی نك بر مملكت آدمی اولماسنه و امور سیاسیة ايله علاقه
دار اوله رق قوانینده اجرا ایله جك تعديلات حقن ده بیان
مطالعه ایتمه مسنه هیچ بر مانع یوقدر . چوجق قلی نك مربیه سی
اولان قادی ن اوغللرینه بوتون وظائف و مسئولیتی ادراك
ایده رك حریشامنی اوكره ته جك وقیزلرینك ده كندی نك حائز
اولدینی اوصاف و مزایایه مالکیتنی تامین ایله جكدیر . قارده شلر -
ینك ، قوجه لرینك محرم اسراری و مشاوری اولماسی لازم کلن
قادی نلر اولنره اعتماد ، محبت و حرمت حسیاتی تلقین ایده رك
فکرو ارادتلری اوزرینه برتأثیر مسعود اجرا ایتمه لری طبعیدر .
بونك ایچون قادی نلر تاریخك هردوره سنده مهم بروظیفه ایفا
ایتمشدر . كرك ایلك و كرك فناق اولسون بوتون بویوك شیلر
دائما اولنرك معاوتیه وجوده كمشدر .

فلاكت شونده كه ارككلرك حرکاتی اوزرنده قادی نلرك
حصوله كتیردیکی بوتأثیر اك زياده احتراصات نفسانی نك برتأثیر
مشئومی شكنده مشهود اولمقده در . فقط خلاصه كوستردی كمز
قواعد اساسیه دائره سنده تربیه كورن قادی نلر بوصوله اندیشه یه
محلی قالماز .

خلاصە كلام قادينىڭ تربيەسى خىصوصىدە تۈسىيە ايدىلەجك غايەشودر : — قادينىڭ ئىمكان اولدىنى قدر اولرى خارچىندە چاللىشمق مجبوريتىدن قورتارمق . — اونلرى ھرشىدن اول وبالخاصە عائلە حياتى اىچون تشدىرىمك . ادمان ايلە صحت بدنيەلرى تىففىيە ايتىلى ، حفظالصحة واداره بىتيەك اساس وقواعدىنى ذھنلرىنە يرلىشىدىرملى ، فكرلرىنى آچوب قوۋ تىمىزيەلرىنى آرتىرەرق وجدانە سلامت ووطن محبە شەدت ويرەجك بوتون انوار عرفاندىن فىض آلمىدەر . تاكەھم زوجلرىنىڭ باعث حرمت ومحبتى ، قومك دە ايلك واك اساسلى مريىسى اولە بىلسونلر .

بوصورتلە كىلەك مەنئى لطيف ومونسە كۈرە يتشدىرىلان قادينلر عائلە خارچىندەكى حيات سياسى اجتىاجىندن وارستەدەرلر . بو حيات سياسىدىن تامما قىطاع علاقە ايتەمككە برابر دائرە شمولى فوقدە برموقع على اشغال ايدرلر . اوغللرىنىڭ حرىت فكرىيە وحس تعاونى احضار واونلرە حقوق آخىرە رعايتكار اولغى اوكرەتەرك حيات سياسىيەنىڭ نواقىصنى اصلاح ايدەجك ىنە كىندىلر يدر .

قادىن حيات عمومىيە دىگەر بصورتلەدە قارىشە بىلىر ، معاونت اجتماعىە مؤسسەتەنى تىنظىم واداره ايتەك اونلرە بالخاصە اونلرە ياقىشەماز مى ؟ اوغللرىنى وطنپرور ، عسكار ياپەقدىن صوكرە حربك آلام ومصائبىنى وقت صلحەدە دوشونەرك چارە سامم اولمق دە اونلرە عائد كىلدەر ؟

کوریوورز که قادیانر بوکوزل وظیفه یی برچسوق زماندن
بری تقدیر ایتشلر در .

انتیحصال ایدیلن نتایج مفیده ایسه موفقیات مستقبه ایچون
بویوک امیدلر ویره کده در .



اوننجی فصل

مکرمت عوامده ایی بر فرد — زار لالو ،

ده مرقراسی ایچنده آرد-مرقراسی

در عهده ایتدیکمز وظیفه یی ختامه ایصال ایتدک . حکومت عوام دشمنلرینک مطالعاتی رد و جرحه موفق اولدوقی ؟ بو خصوصده کی حکم قارئه عاآدر . فقط بزهر حالده او مطالعاتک درجه شمولی ابطاله یارایه جق مطالعات عدیده یی ، نظریات و حادثاتی قارئک نظر دقته عرض ایتدیکمزى ظن ایدیورز . بیاناتمزى مختصراً خلاصه ایده لم :

اول امرده حکومت عوامک تکملى وطنپرورلکه ، وطن محبتی ده انسانیت محبتنه بر ضرر ایران ایتیمه جکن اثباته چالیشدق . بو فضائی حائز اولمق ایچون انسان کندى مملکتنى ، لازم کلدیکی وجهله ، تولدک تهیه وتریبه نک قوت و رقت و یردیکی او حرارت ، او عولوجناب و اونزا کتله و فقط علی العمیا ایدیلان کبر و غرورى و حقمنز خصومت و حسدلى رفع ایدن عقل و تدبیر ایله سومک کافیدر . ذاتاً اولاً وطنه قوی و یک خصوصی شکله محبت ایدلمزسه انسانیتی جدأ سومک غیر ممکندر .

بو اساسی موضوع بحث ایدهرک اثبات ایتدک که دائماً صلح عمومی یی امل ایدهرک ، دائماً اختلافات اسبابی تقلیله ، وسایل

مخاصماتی خصوصیه ملنر آرمندہ کی محاسبات مسلحہ و سائنی دفع و رفعہ چالیشمقلہ برابر (کہ معقول وطن پرورک تمامیہ بو وظیفہ بی ایفا ایدہ بیلیر) کمال شوق ایلہ وظیفہ عسکریہ بی قبول ایدہ رک محاربہ حالی اولدن دوشونوب و احتیاطی و حاضر بولونمق لازمدر . بوندن باشقہ بر حکومت عامہ دہیئت عمومیہ مملکتک نشأتکاهی اولان وارنک حسیات و اخلاقنی افادہ ایدن اردو فرد مستقبلک ہر نقطہ نظر دن تربیہ سنی اکمال ایدہ جک بر مکتب اولمق ایجاب حال دن بولندیغنی دہ ارانہ ایلدک .

« سالم فکر صاعلام وجوددہ بولونور » حکمت قدیمہ سنک روح و معناسنہ توفیق ایدیلن بر تربیہ نک سربست فکری ، عزم قوی صاحبی ، عالیجناب ، حیثیت شخصیہ سنی طایر ، بوتون وظائفنی ایفاء آمادہ ، حقوقنی کوزہ دیر ، فقط عین زماندہ آخرک حقوقدہ رعایتکار ، عدالتہ عشق و پرستشی غایت واسع برتہ اون اجراسہ قدر وار دیران بحق انسان آدملر یتیشدیرہ جکنی کوستردک .

بو صورتلہ یتیشہ جک کنج افراد وطن حیاتک جدیتی تقدیر ایلہ یالکز کندی نقسنہ قارشو دکل دیکرینہ قارشودہ مسئول اولدیغنی آکلاہرق یاشادقہ تربیہ شخصیت سنی اکمال ایدوب تکمل ایتمک آرزو سنی حاصل ایدہ جکدرکہ بوندن دیکر لری دہ کندی قدر و بلدکہ دہا زیادہ مستفید اولوز .

وظیفہ سہ بی ایفا ایلہ ، مستفید اولہ جنی منافع مادیہ نہ اولورسہ

اولمون، ثروٲ عمومیه نك ادامہ و تزیادینه خدمت ایدہ جکی کبی
 ہر حالده ارباب مساعی بہ نمونہ امتثال اولہ جقدر۔ سکرک بالذات
 چالیشہ رق قزان دینی و کرک طالعک بخش ایتدیکی ہر نوع نم
 وفوائدن و طنداشلرینی، قارده شلرینی دہ حصہ دار ایتمک آرزو
 بالخاصہ فکر احرار اناہ سنک مستقیض اولدینی انوار عرفانی نشرہ
 غیرت ایدہ جقدر۔

وطنک کنج لری حقوق و باخصوص وظائف مدنیہ بہ بحق
 واقف اولہ جقدر۔ تاریخ مطالعہ سی ایلہ مملکتلرینک ماضیسنہ
 عائد وقایع اساسیہ بہ مطلع و آلدق لری تربیہ عملیہ سایہ سندہ حالک
 ایجابات و تمایلاتنہ آکاہ اولدق لرندن وطنلرینک تعقیب ایتدیکی
 مقصدی و سیر تکاملنی آکلایہ رق ماضی و حال اوزرینہ اعطای
 حکم ایدہ جکلر و سیاست ویرلسی لازم کلن استقامت عمومیه پی
 تعیین ایدہ رک قوہ تشریعینک و حکومنک مساعی و اجرا آتی
 تقدیر ایدہ بیلہ جکلر، دوشوندکلرینی کمال جسارتلہ سویلہ رک،
 صرہ سی کلنجه رأی و رقہ سی ایلہ ایستدکلرینی ارانہ ایدہ جکلر در۔
 بوندن باشقہ ایرکندن برعائلہ تشکیل ایتمک احتیاجنی حس
 ایلہ چو جو قلرینک والدہ سی وایلک مرہبہ سی اولہ جق رفیقہ
 حیاتی کمال اہتماملہ انتخاب ایلہ جقدر۔

آریستونک و قتیلہ سویلہ مش اولدینی و جہلہ فضائل شخصیہ
 واجتماعیہ عائلہ حیاتی ایچندہ انکشاف ایدر۔
 فکر مزجہ زوجہ، والدہ و طیفہ مدنیہ سنی عائلہ ایچندہ

اجرا ایتمکه اکتفا ایلیرک عالم‌سیاسته داخل اولمقدن توقی ایلیدر . چونکه اوراده قزانه جغندن زیاده غائب ایده جکدر . فقط زوجه و بابا اولان اړکک نه ایچون بوش زمانلرینی مبادیده هیچ اولمازسه محدود بر دائره داخلنده امورسیاسیه ایله اشتغاله حصر ایتسون ؟ اکر وطنداشلری کندینی لایق و مستحق کورورسه نه ایچون یواش یواش دها واسغ وقاریشیق وظائف درعهده ایتسون ؟ اځ آشانی مرتبه دن سعی ذاتیسیله اځ بویوک خدماته قدر یوکسله رک ابراز ایتدیکی قابلیت و لیاقتیه اسکی اصیلزاده کانت احفادینی و حتی حکمدارلری بیله دوچار حیرت ایلین کیسه لر نادریدر ؟ سربست آمریقا، قدیم هلوتیا، آفریقای - جنوبی جمهوریتلری فرانسه ایله برابر بویله آدملرک اځ نامدار نمونه لرینی تشدید مشدر. بلکه دنیاده هیچ بر مملکت یوقدر که مدار افتخاری اولان رجال مهمه سیاسیه سی میاننده برچوق فقیر چو جوقلری بولونماسون .

فقط بو احوال مستنادر : وطنپروریمز مغرور دکدر، ایفاسنه کمدنده لیاقت کوردیکی خدمات عمومیه ده بولونمخی آرزوایدرسده بحق ایفا ایده میه جکی خدمتلری قبولدن اجتناب ایدر. اکثریت اوزره اپی بر منتخب واپی برعائله بابایی اولقله اکتفا ایده رک کمال شوقله مسلکنده چالیشیر : اځ بویوک املی چو جوقلرینه مزاج و اخلاقی میراث و حیساتی نمونه و یادکار برافقدر . بو صورتله بر اصالت تأسیس ایتمش اولور که عین

تربیه‌ی آلمش اولان اوغل و قیزلری اعتبارینی تزیید ایده جک لر دره .
اصالت فکر باطلده پک طوغری و غایت کوزل بعض شیر
بولدیفنی آچیقجه سویله ملیز .

اساساً اصیل، اوصاف عالیه سیله باخصوص شدت عزم
وارادتیله کندینی همجنس لرینه طانیتان کیسه در . بو اوصاف
سایه سنده او کیسه احرارز ایتدیکی تفوقک کندینه بخش ایتدیکی
مادی و معنوی منافع ایله برخاندان تاسیس ایدر . اولاد و اخفادی
شوامتیزات سایه سنده بدناً ، فکر آ و اخلاقاً تکمل ایده رک
خاندانک داخل اولدینی محیط اجتماعی اوزرنده تأثیرینی تزییده
موفق اوله بیلیرلر . فقط تاریخمده زادکانک حرکات مفرطه سی
خلق ایچون پک آجیقلی و ضرر نتیجه لر ویردیکی ده محققدر ؛
دیگر جهتمدن اکثریتنه حتی زمانمزده بیله مشهور برنام و یاخود
بویوک بر ثروتک وارنلری طالی کدیلرینک کی قدر بارلاق
اولیان و طنداشلرینه تحقیر آمیز معامله ده بولونمغه کندیلرنده
بر صلاحیت زعم ایدرلر . نسبلرینک بخش ایتدیکی امتیازاتی
ظاهری نزا کت لرینه رغماً غایت سفیل و آواره بر حیات کچیرمک
ایچون وسیله و واسطه اتخاذا ایدرلر .

بو ساخته اصیللر لایق اولدقلری معامله یی کورملی چوق
اولدی . وقتیه زووه نال روماده بونلری تزییف ایدیوردی
بووالو ایسه ۱۸ نجی عصرده ماهیتلرینی تماماً میدان قویدی .
اجدادک شهرتسه توارث ایتک ایستیانلر بونامه لایق

اولدقلرینی کوسترمه جک خدمات جدیه ابراز ایدمه جک بریوره ک
طاشیمیورلرسه اجدادک شهرتی نه فائده ویرر . بلکه اوبویوک
اجداده لایق اولدقلرینی میداننه قویار .

تعمیر آخرله اصالت انجق شخصک . اصالت اخلاقیه سیدر .
فقط توارث جهت مادیه و معنویه دن اصالت شخصیه بی تسهیل
ایدر . مثلاً عائله خاطراتی هر بطنه سلسله اجدادک مظاهرتی
تأمین ایلیه رک بطون . مستقبله نک احضاری وظیفه سنی ده
اخطار ایدر .

بناءً علیه اصالت بو صورتله تلقی ایدیلنجه آرتق معین
برصنفه مخصوص اوله ماز ؛ هر کسه آچیقدر . اصل کیمسه لرک
آرتمه سی ترقیات عامه نک اک کوزل نتایجندن عد ایدمک طبیعیدر .
قادین ، ارکک افراد ملتدن هر کس اوله ترقیات ذاتیه سنی
تکملاتیه ، کندی نظرنده ، بده اخلاقنک صلاحتی و حیاتنک
تمیزلکی ایله خلق نظرنده اکتساب اصالت ایتمک امل علوی سنی
بسله ملیدر . ابوین بو صورتله اصالتلرینی تمادی ایتدیرمه جک
چو جو قور ی تشدیرمکه چالشیر ، هر عائله اجدادک شجره شان
و شرفنی بو یوتمکه موفق اولور .

بناءً علیه حکومت عوامک نهایت مملکتی بیاغی کیمسه لرک
حکم و نفوذی آلتنده بر اقمه منجر اوجمنه دائر در میان ایدیلن
فکر قدر یا کلش بر فکر اوله ماز .

بومطالعه انجق الی لاید وظائف و حقوقندن بیخبر قاله جق
برده موقراسی ایچون وارددر .

حال بوکه حادثات و وقایع خلقک کوندن کونه تنور ایندیکنی
و تنور ایندیجه تعالی ایلدیکنی و کندیلرینی اداره ایچون اک ایی
کیمسه لری انتخاب ایله اداره حکومتی خواصه ترک ایده رک
معنای صحیحیه بر آریستو قراتی وجوده کنیزمه موفق اولدیفنی
کو ستر مکده در ..

صوک

فهرس

- برنجی فصل : اشکال حکومتک عوامه طوغری تکاملی ۷
- ایکنجی فصل : حکومت عوامک معارضلری ۱۷
- » ده موقراسی تربیه سنک لزوم وامکانی ۲۲
- اوچنجی فصل : ده موقراسیده عائله نک وظیفه سی ۳۲
- دردنجی فصل : افراد مستقبله نک تربیه فکریه و اخلاقیه سی ۴۴
- بشنجی فصل : تربیه اجتماعیه — تعاون ۵۹
- آلتنجی فصل : تربیه عامه ومسئله اجتماعیه ۷۶
- یدنجی فصل : وطن وانسانیت ۹۲
- سکزنجی فصل : وظائف مدنیه — خدمت عسکریه ۱۰۷
- طقوزنجی فصل : ده موقراسیده قادینک وظیفه اجتماعیه سی ۱۱۹
- اونجی فصل : حکومت عوامده انی زادکانلغ ،
- آریستوقراسی ۱۲۶